

## DIŽA' GÜEN DAN' BZOJ SAN LUCAS

### *Da' nga bzoj Lucasen' par Teófilo*

<sup>1-4</sup> Teófilo, naco' bene' zaca' na' chzoja' le' diža' quinga cont nezdo' da' li ca nac da' ba bosozejni'ide' le' che da' ca' ba gosac. Bene' zan bach bosozoje' che Jesúsén', gosó'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsén'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwnabyoža' can' goquen' na' gwyazlaža' gwzojan' tcho'a cont nezdo', Teófilo.

### *To angl gwdixjue'ede' galje Juan*

<sup>5</sup> Ca tiemp caten' gwnabia' rey Herodes distritw gana' nzi' Judea, na' gwzoa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža che da' bxož Aarón.

<sup>6</sup> Na' Zacarías len Elisabeten' zja'accze' to licha len Diosen' na' gosonyane' yogo'loł da' non Xancho Diosen' mandadw da'na' nyoj le'e ley che'na'.

<sup>7</sup> Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

<sup>8</sup> Na' goquen' beyala' Zacaríasen' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonxene' Dios.

9 Na' b<sub>x</sub>oz ca' yogo' n<sub>i</sub>'a chesone' rifa cont chata'bia' noe' choj gwzeye' yal lo' yodao' blao čhegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'.

10 Na' šlac bzeye' yala' gosenita' yogo'lol bene' zan ca' chy'ole bosol güiže' Diosen'.

11 Na' to angl bene' gwseła' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'.

12 Na' cate' ble'e Zacaríasen' anglen', benit bechol lo' yichjlažda'ogüe' na' bžebchgüe'.

13 Perw anglen' gože' le':

—Bitw žebo' Zacarías. Diosa' ba bzenague' che dan' gw<sub>n</sub>abdo'ne', na' no'ol čhio' Elisabeten' sane' to xi'ino', na' gws<sub>i</sub>'obe' Juan.

14 Na' so' mbalaz na' yebedo' na' lecz be<sub>n</sub>e' zan yesyebede' še ba goljbe'.

15 Gacbe' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'.

16 Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyala' yesonxene' le'.

17 Na' cuialaobe' lao Xancho', na' soa Spiritw che Diosen' len lebe' can' gwzoan len da' Elíasen', na' lecz ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xancho' cate' yide'.

18 Nach Zacaríasen' gože' anglen':

—¿Nac gac nezda' da' nga? Neda' naca' bene' gole na' lec ca' no'ol chian' ba naque' bene' gole.

<sup>19</sup> Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui.

<sup>20</sup> Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yenio' da' yoble. Na' da' li gwžin ža gac can' gwnia'.

<sup>21</sup> Na' bene' ca' že' chyo'ole chesebeze' Zacariásen' besyebande' da' gwžede' lo' yodao' blaona'.

<sup>22</sup> Na' cate' bechoj Zacariásen', bene' señw len ne'e da' bi goc nie'. Nach gosacbe'e bene' ca' ble'ebande' lo' yodao'na'.

<sup>23</sup> Na' cate' beyož bdelaze' dan' bene' žin lo' yodao'na', beyej liže'.

<sup>24</sup> Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'.

<sup>25</sup> Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson benača' xbab bibi zaca'.

### *To angl gwđixjue'ede' galje Jesucriston'*

<sup>26</sup> Goc xop bio' noa' Elisabeten' bidaon', Diosen' besele' anglen' ben' le Gabriel, gwyeje' to yež da'na' nzi' Nazaret gan' mbane distritw Galilea.

<sup>27</sup> Gwsele' le' gan' zoa to no'ol güego' le' María. Na' Marían' napši'ichgua cuine'. Na' to bene' le' José bač naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'.

28 Na' bžin to angl be<sub>ne</sub>' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'lo<sub>l</sub> no'ole yezica'chle.

29 Cate' ble'e Marían' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox.

30 Na' anglen' gože'ne':

—Bitw žebo' María, Diosen' nži'ide' le'.

31 Na'a gua' xi'ino' to bi' byo dao', na' sano'be', na' go'o labe' Jesús.

32 Na' Jesúsen' gaque' to be<sub>ne</sub>' blao na' be<sub>na</sub>chen' yososi'ene' Xi'in Dios, Dios ben' naque' la'zelagüe be<sub>ne</sub>' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David.

33 Na' le' nabi'e nación Israelen' toli toca<sub>ne</sub>, na' gwbat te yela' gwnabia' chen'.

34 Nach gož Marían' angla':

—¿Nacxe gac sana' bdaon'? Bitw nžaga' be<sub>ne</sub>' byo.

35 Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe be<sub>ne</sub>' blao. Da'nan' bidaon' za' galje gacbe' laždao' xilaže' na' yososi'ebe' Xi'in Dios.

36 Na' be<sub>ne</sub>' xna'o Elisabeten' lecze bach gwchen-dao' bidao' lo' le'e la'czla' ba naque' be<sub>ne</sub>' gole. Ba goc xop bio' no'e to bi' byo dao', len gosene' naque' no'ole güiž.

37 Bibi de da' nacho da' cbi gac gon Dios.

38 Nach gož Marían' anglen':

—Ni zoa' naca' xmos Xana' Diosen'. Gacšca chia' con can' ba gwnao'.

Nach beza' anglen' gan' zoa Marían'.

*Marían' jane'e Elisabeten'*

<sup>39</sup> Gwde na' la' gwyejte Marían' to yež da' žia to lo ya'a gan' mbane distritw Judean',

<sup>40</sup> na' bžine' liž Zacaríasen'. Na' gwyo'e bguape' Elisabeten' tiox.

<sup>41</sup> Na' cate' Elisabeten' bende' choł güiž Marían' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten'

<sup>42</sup> na' gwne' zižje da' bebechgüede', gože' Marían': —Zo' mbalazch ca yogo'lol' no'ole yezica'chle. Na' lecze bidaon' no'ona' soabe' mbalaz.

<sup>43</sup> Chebanda' le' naco' xna' Xana' zedena'o neda'.

<sup>44</sup> Con cate' benda' chguapo' neda' tiox, bidao' chian' lecze bebebe', bxite' bžiabe' lo' lian'.

<sup>45</sup> Zo' mbalaz da' gwyejli'o gac can' gwna xtiža' Diosen' dan' gož anglen' le'.

<sup>46</sup> Nach Marían' gwne':

Chonxena' Xancho Diosen' do yichj do laža'.

<sup>47</sup> Na' do yichj do laža' chebechgüeda' Dios ben' bebeje' neda' lo da' malen'.

<sup>48</sup> Ba beyaše'de' neda' naca' xmose' la'czla' bibi zaca'.

Na' na'a bene' yesenita' toli tocaņe yesene' neda' zoa' mbalaz.

<sup>49</sup> Dios ben' chac chon da' nono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

<sup>50</sup> Na' note'teze bene' chesape' le' bala'an do yichj do laže', Diosen' cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in  
diaža čegaque' ca'.

51 Bač blo'e Diosen' beñachen' yela' guac che'.

Na' ba bolague' bene' ya'laže' ca'.

52 Ba bene' contbene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue'  
latje yesaque' bene' blao.

53 Na' bene' chesedon, Diosen' ba bnežjue' legaque'  
da' zan da' güen.

Na' bene' gwñi'a ca', ba bose'e legaque', bibi  
bonežjue' legaque'.

54 Nach ba goclene' chio' bene' Israel naccho ca  
xmose'.

Ba blo'ede' bitw ganlaže' chio', san ba cheyaše'  
cheži'ilaže'de' chio'.

55 Ba bene' can' gože' da' Abraham len yezica'chle  
da' xozxta'ocho.

Na' soacze' yeyaše' yeži'ilaže'de' xi'in diaža che da'  
Abrahanna' toli tocañe.

56 Na' cate' ba goc šone bio' zoa Marían' len  
Elisabeten', nach Marían' beyej liže'.

### *Golje Juan bene' bzoe' bene' nis*

57 Na' cate' bžin ža san Elisabeten', gwzane' bi'  
byo dao'.

58 Na' cate' goseneze bene' gualiz čegaquen'  
na' diaža čegaquen' Xancho Diosen' ba beyaše'  
beži'ilaže'de' Elisabeten', nach besyebechgüede'  
len le'.

59 Na' goc xono' ža goljbe' na' jasezoe'be' señw  
dan' že' circuncisión can' gosone' len yogo' bi' byo  
dao' bi' gosaljbe' lo diaža che da' Abraham. Na'  
gosaclaže' si' labe' Zacarías can' le xaben',

60 perw xña'be' gwne':

—Bi gac. Cheya<sub>la</sub>' si'be' Juan.

<sup>61</sup> Na' lega<sub>que</sub>' gose'ene':

—Notno diaža chele nita' be<sub>ne</sub>' zjale ca', neca xozxta'ole.

<sup>62</sup> Na' gosone' señw gosen<sub>abde</sub>' xaben' nac che'nde' si' labe'.

<sup>63</sup> Nach bene' señw gwn<sub>abe</sub>' to yagla' dao' da' bzoje': "Si' labe' Juan." Na' yogüe' besyebande'.

<sup>64</sup> Beyož bzoje' da'na', la' gocte be<sub>nie</sub>', nach la' gwzolaote be'e diža' benxene' Diosen'.

<sup>65</sup> Na' besyebane be<sub>ne</sub>' gualiž chegaquen'. Na' xtiža'gaquen' gos gw<sub>laljen</sub> doxen yež ca' zjachi' lo ya'ana' gan' mbane distritw Judean'.

<sup>66</sup> Na' yogo'lo be<sub>ne</sub>' gosende' dižan' gosone' xbab lo' yichjlažda'ogüe' che da' ca', na' gosene':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

*Diža' da' be' Zacarías*

<sup>67</sup> Nach gwn<sub>abia</sub>' Spiritw che Diosen' yichjlaždao' Zacaríasen', nach be'e xtiža' Diosen', gwne':

<sup>68</sup> Chonxena' Xancho Dios ben' chonxen chio' be<sub>ne</sub>' Israel.

Cheyaše' cheži'ilaže'de' chio' naccho nación che' na' ba chse<sub>le</sub>' be<sub>ne</sub>' yebej chio' lo da' malen'.

<sup>69</sup> Na' bena' bač za' cont yebej chio' lo da' malen', naque' be<sub>ne</sub>' gwn<sub>abia</sub>' gual,

na' naque' xi'īn diaža che da' rey David ben' goc xmos Diosen'.

<sup>70</sup> Chac can' gwna Diosen' len cho'a da' be<sub>ne</sub>' ca' gwse<sub>le</sub>' cani', be<sub>ne</sub>' gosac lo ne'e goso'e xtižen'.

71 Ba za' ben' gwne' yosle' chio' lo na' yogo' bene' chesegue'e chio'.

72 Chac can' gože' da' xoxxta'ocho ca' yeyaše' yeži'ilaže'de' legaque'.

Bi chanlaže', san chone' yogo' da' ba gwne' gone' gaclene' chio'.

73 Diosen' chone' can' gwlo'e da' baļi lao da' xoxxta'ocho da' Abraham gože'ne' gaccze can' gwnen'.

74-75 Gwne' yosle' chio' lo na' bene' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebcho,  
na' šejcho licha gonxenchone' šlac de yela' mban checho.

76 Nach Zacaríasen' gože' bdao' chen':

Bdao' chia', benach yesene' chio' naco' bene' choe' xtiža' Dios, Dios ben' naque' la'zelagüe bene' blao.

Yesene' ca' da' cuialaguo' lao Xanchon' na' go'o xtižen' cont nita' bene' yosozenague' che' cate' yide'.

77 Gwsed gwlo'edo' neto' can' chaclaže' Diosa' yebeje' chio' naccho nación che' lo da' mala' na' yezi'xene' xtoļa'chon'.

78 Diosen' cheyaše' cheži'ilaže'de' chio',

le len' gwlo'e be'ni' che' lo' laždao' chio' benach.

79 Cue'e be'ni' che' lo' yichjlaždao' chio' naccho ca bene' chaš ga nac chol, chio' chžebcho gatcho.

Na' gwzejni'ide' chio' benach naquen' soa cuezcho yežlio nga.

Can' be' Zacaríasen' xtiža' Diosen'.



80 Na' Juanna' zej chcha'obe' zejte chac yichjlažda'oben' can' chazlaže' Diosen'. Na' jasoe' latje daš. Na'ate zoe' cate' gwzologüe' gwduxjue'ede' xtiža' Diosen' len bene' Israel ca'.

## 2

### *Caten' golje Jesúsen'* (Mt. 1:18-25)

1 Na' lecz šlac gwnabia' rey César Augusto, bene' mandadw gwyas to censo cont nezde' bał bene' že' to to yež da' zjachi' doxen yežlio gan' chnabi'e.

2 Na' lecz cana' Cirenio naque' gobernador gan' nzi' Siria. Na' naquen da' nechw bchele' bał bene' že' to to yež.

3 Na' yogo'lol bene' jaya'aque' lažgaque' jasyede cuent cuine' cont bosochele' le'.

4 Na' José naque' diaža che da' rey David. Da'nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea.

5 Beyeje' jayde cuine' cuent na' zenche'e no'ol che' Marían' perw biņa' yeseca'a lježe'. Na' Marían' ba no'e bdao'.

6 Na' šlac nite' Belén bžin ža sane'.

7 Na' gwthane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesónna' par legaque'.

### *Angl ca' bosozende' bene' güeyoe xila' ba golje Jesúsen'*

8 Na' že'na' yixe' che yež Belén na'ate že' bene' güeyoe xila' chesape' xila' chen'.

9 Na' to angl be<sub>ne</sub>' gwsela' Xancho Diosen' bžine' gan' nita' be<sub>ne</sub>' güeyoe xila' ca', na' be'ni' che Xancho Diosa' gwyechjen bse<sub>n</sub>'in' gan' nite'na'. Na' besežebchgüe'.

10 Na' gož angla' lega<sub>que</sub>':

—Bitw žeble. Na'a chixjue'eda' le'e to diža' güen da' yesebechgüe yogo'lo<sub>l</sub> be<sub>ne</sub>'.

11 Na'aža lo yež che rey David ba golje bena' gac yebeje' be<sub>n</sub>a<sub>chen</sub>' lo da' mal. Na<sub>que</sub>' Cristo, na' zeje diža' na<sub>que</sub>' ben' gwsela' Dios cont nabi'e, na' lecze na<sub>que</sub>' Xancho.

12 Cont yeželele bdao'na', quinga na<sub>quen</sub>: bdao'na' ba ntobe'be' lache' na' debe' gan' chesagw beyixe' ca'.

13 Beyož gwna angla' ca' la' besežinte be<sub>ne</sub>' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

14 ꞑChonxencho Diosa' ben' zoa yaba, na' lo yežlio yesezoa yesebez be<sub>n</sub>a<sub>chen</sub>' bin<sub>lo</sub>, con bena' cheson can' chazlaže' Diosen'.

15 Na' cate' besyeya'ac angl ca' zjaya'aque' yaba, na' be<sub>ne</sub>' güeyoe xila' ca' gose' lježe':

—Yeyejcho Belén šjayna'cho dan' ba goc can' nac dan' gwsela' Xanchon' angl quinga bedesedixjue'ede' chio'.

16 Na' beseya'aces be<sub>ne</sub>' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'.

17 Beyož besele'ede' can' ba goquen, na' goso'e diža' che bdao'na' len be<sub>ne</sub>' ca' yezica'chle ca nac dan' gož anglen' lega<sub>que</sub>'.

18 Na' yogo'loḷ bene' ca' gosende' diža' dan' gosoe' bene' güeyoe xila' ca' besyebande'.

19 Na' lecze Marían' gwlo'o yichje' yogo'loḷ diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen.

20 Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'loḷ da' ba gosende' na' besele'ede' dan' gož anglen' legaue'.

*Diaža che Jesús en' jasesane'be' lo' yodao' blaona'*

21 Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e labe' Jesús, can' ben anglen' mandadw cate' za' gua Marían' lebe'.

22 Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'.

23 Gosone' can' nyoj ley che' dan' ža: “Yogo' bi' byo dao' bi' nechw cheyaḷa' gacbe' lo' na' Dios.”

24 Nach gosonxene' Diosen', gosone' can' ža ley che Xancho Dios dan' žan: “Cheyaḷa' gotle chop ngolbex o chope plomxtil.”

25 Na' Jerusalénna' gwzoa to bene' le' Simeón. Benan' gwyejcz'e' bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo' da' mal. Na' Spiritw che Diosen' gwyo'on lo' yichjlaždao' Simeón,

26 na' bzejni'in le' bi gate' še biḅa' le'ede' Criston'.

27 Na' Spiriton' benen cont gwyeje' yodao' blaona', na' zoe' yodao'na' cate' besežin xaxḅa'

Jesúsen' zjano'ebe' cont yesone' len lebe' can' non ley čhegaquen' mandadw.

<sup>28</sup> Nach Simeónna' gwlene'be' nach benxene' Diosen', gože'ne':

<sup>29</sup> Xana' Dios, bačh goc can' gwnaon'.

Ben latje yeyeda' binlo gana' zo'na', neda' naca' xmoso'.

<sup>30</sup> Ba ble'eda' bena' zedyelej neto' lo da' mal.

<sup>31</sup> Naque' bene' gwnalažo' gwselo' neche yogo'lol benačh.

<sup>32</sup> Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

<sup>33</sup> Nach xaben' len xna'ben' besyebande' ca diža' čhebe' dan' be' Simeónna'.

<sup>34</sup> Na' Simeónna' gwnabde' Diosen' cont gac güen čhegaque'. Na' gože' Marían':

—Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' benačhen' can' chaclaže' Diosen' goncho, perw zane' bi yesejle'e che'.

<sup>35</sup> Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguo' catequen' žaglaguo' len da' gac che'.

<sup>36</sup> Na' lecze yodao' blaona' gwzoo to no'ole le Ana, na' cho'e xtiza' Diosen'. Naque' xi'in da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzoalene' bene' che' na' gote', na' bga'ane' güezebe. Na' Anan' ba naque' to bene' gole,

37 taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüeje bene' gwbas na' con gwzoachgüe' boļ güiže' Diosen'.

38 Na' goquen' gwbiga' Anan' gan' zoa Josén' len Marían' lo' yodao'na' na' be'e yela' choxclen che Diosen' bach gwsele' Jesúsén'. Na' be'e diža' che Jesúsén' len yogo' bene' ca' že' Jerusalén ben' chesebeze' batca' seļa' Diosen' ben' yebeje' legaque' lo da' malen'.

### *Jaya'aque' Nazaret*

39 Nach Josén' len Marían' cate' beyož gosone' yogo'loļ dan' non ley che Xancho Diosen' mandaw yesone', jaya'ac lažgaque' Nazaret gan' mbane distritw Galilea.

40 Na' Jesúsén' zej chcha'ogüe' na' zej chchachlaže'. Na' ca' zej chcha'ogüe' na' zej chejni'ichde', na' Diosen' nži'ilaže'de'ne'.

### *Can' ben Jesúsén' chašil yodao' blaona'*

41-42 Na' xaxne'e ca' yogüiz chja'aque' lni da' chala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsén' cate' goseche' xaxne'en le' ja'aque' lnin' Jerusalén.

43 Na' cate' gwde lnina' besyeya'aque', perw Jesúsén' bega'ane' ciuda Jerusalén. Na' xne'ena' len Joséna' bi gosacbe'ede'.

44 Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža chegaque' na' no bene' xmigüe',

<sup>45</sup> perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

<sup>46</sup> Na' beyon žach besyeželde' Jesúsen' chašil yodao' blaona', chi'e gachol bene' ca' chososed chosolo'ede' dan' bzoj da' Moisés. Jesúsen' chzenague' xtiža'gaquen' na' zanen chñabde' legaque'.

<sup>47</sup> Na' yogo'lol bene' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' bene' ca' zjansed dan' bzoj da' Moisés.

<sup>48</sup> Na' cate' besele'e xaxne'en le', besyebande', na' xne'en gože' le':

—Xi'indagua', ¿bixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

<sup>49</sup> Jesúsen' gože' legaque':

—¿Biçhen' beyiljwle neda'? ¿Bi nezele liž Xa' ngan' cheyala' soa'?

<sup>50</sup> Perw xaxne'e bitw gosejni'ide' bi zejen dan' gože' legaque'.

<sup>51</sup> Na' beyeje' yež Nazaret len xaxne'e bzenague' čhegaque'. Na' gwlec yichj xne'ena' yogo'lol dan' goca'.

<sup>52</sup> Na' ca' chac zej chejni'iche Jesúsen' na' zej gwcha'oche', na' Diosen' len benacha' zej chesa-zlaže'che' le'.

### 3

*Juan gwduxjue'ede' diža' güen che Diosa'  
(Mt. 3:1-12; Mr. 1:1-8; Jn. 1:19-28)*

1 Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Tracnite. Na' goc Lisantias gobernador che distritw Abilinia.

2 Nach lecze izna' Anás na' Caifás gosacche' b̄xoz blao che bene' Israel. Izna' Juan ben' naque' xi'in Zacarías gwzoe' to latje daš. Nach Diosen' be'lene' Juanna' diža'.

3 Na' Juanna' gwyeye' yogo'lol yež dan' nita' gała'ze yegw Jordán, jatixjue'ede' yogo'lol bene' cheyala' yesyetinjde' xtolā'gaque' na' yesezoe' nis cont nitlao xtolā'gaquen'.

4 Juanna' bene' dan' bzoj da' Isaías ben' be' xtiža' Diosen' cani'te, gana' žan:

Bena' chne' zižje latje dašen', že':

“Le gonšagüe' yichjlažda'olen' cont soale gwzenagle che Xanchon' cate' yide',

le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

5 Gwžin ža cate' yogo' ya'a yegw ca' yesyeyaquen laše',

na' no nez da' nacchgua bxoca' yesyeyaquen licha, na' no nez da' nžaš nche'ene yesyeyaquen ba'a.

6 Na' yogo'lol bene' yesacbe'ede' can' chaclaže' Diosen' yebeje' benachen' lo da' mal.”

7 Na' bene' zan ja'aque' gan' gwzoe' Juanna' cont gwzoe'ne' nis. Na' Juanna' gože' legaque':

—Le'e nacchguale bene' zgot na' bene' gwxiye'.  
¿Chaquale guac yelale lao castigw dan' sela' Diosen'  
caten' gone' yela' justis che benachen'?

<sup>8</sup> Še da' li ba betinjele xtoła'le, cheyala' gonle  
da' nac güen cont yesacbe'e bene' ba boša'  
yichjlažda'olen'. Na' bitw gonle xbab gaquale  
Diosen' bitw gone' le'e castigw che xtoła'len'  
lagüe da' nacle xi'in diaža che da' Abrahanna'.  
Bitw nacho leca chyažje Diosen' le'e. Guac gone'  
cont yej quinga yesyeyaquen xi'in diaža che da'  
Abrahanna'.

<sup>9</sup> Ca nac le'e, še bi chonle can' chazlaže' Diosen',  
zaca'leble ca to yag frut da' bibi chbia. Na' yogo'te  
yag frut da' bibi chbia, chog xan yaga' len na'  
gwzeyen'.

<sup>10</sup> Nach bene' ca' chosozenag xtiže'na' gosenabde'  
Juanna', gose'ene':

—¿Bica' da' cheyala' gonto'?

<sup>11</sup> Na' gože' legaque':

—Ben' nape' chope camis cheyala' gwnežjue' ton  
che bene' bi de che'. Na' lecze ca' che ben' de da'  
gagüe', cheyala' gwnežjue' che ben' bi de gagüe'.

<sup>12</sup> Na' cate' to chope bene' güechixjw ca'  
jasebigue' cont gwzoa Juanna' legaque' nis, na'  
gose'ene':

—Maestrw, ¿bica' da' cheyala' gonto'?

<sup>13</sup> Na' gože' legaque':

—Bitw gwchixjwchle ca da' cheyala' yeseyixjue'.

<sup>14</sup> Na' to chope bene' ca' zjanac soldadw lecze  
gosenabde' le', gose'ene':

—¿Chix neto'? ¿Bica'ch da' cheyala' gonto'?

Na' Juanna' gože' legaque':



—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechw-gaque'. Le gon banez len laxjwle.

<sup>15</sup> Na' bene' ca' gosezoe' lez yid Cristo ben' naquen sela' Diosen' yedenabi'e, na' gosacde' še Juanna' naque' Cristo.

<sup>16</sup> Na' Juanna' gocbe'ede' xbab chegaquen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca' yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lechja' no xele'.

<sup>17</sup> Benan' gone' len benachen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', sele' legaque' lo' yi' gabilen' dan' cbi cheyol chenit.

<sup>18</sup> Da' zanch da' gwna Juanna' gwdixjue'ede' legaque' diža' güen, na' gwneyoede' legaque' yesejle'en.

<sup>19</sup> Nach Juanna' gwdile' gobernador Herodes ca nac da' mal da' bene' beque'e Herodías ca xo'ole', le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'lol da' mal dan' ba ben Herodes.

<sup>20</sup> Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

*Can' goc caten' gwzoa Jesúsén' nis  
(Mt. 3:13-17; Mr. 1:9-11)*

21 Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesús'en' gwzoe' nis. Na' lo hora' Jesús'en' bol güiže' Diosen' na' la' byaljwte yaba gan' zoa Diosen'.

22 Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

### *Diaža che Jesús'en'*

*(Mt. 1:1-17)*

23 Na' ca do šichoa ize Jesús'en' cate' gwzolao bene' yogo'lol da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí,

24 na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José.

25 Na' Joséna' naque' xi'in Matatías, na' Matatías'en' naque' xi'in Amós, na' Amósen' naque' xi'in Nahum, na' Nahunna' naque' xi'in Esli. Na' Eslin' naque' xi'in Nagai,

26 na' Nagain' naque' xi'in Maat, na' Maata' naque' xi'in Matatías, na' Matatías'en' naque' xi'in Semei, na' Semein' naque' xi'in José, na' Josén' naque' xi'in Judá.

27 Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri,

28 na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er.

29 Na' Era' naque' xi'in Josué, na' Josuén' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat.

30 Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim.

31 Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán.

32 Na' Natánna' naque' xi'in David, na' Davida' naque' xi'in Isaí, na' Isaín' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón.

33 Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá,

34 na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor.

35 Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala,

36 na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in

Sem, na' Senṇa' naque' xi'in Noé, na' Noén' naque' xi'in Lamec.

<sup>37</sup> Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán,

<sup>38</sup> na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

## 4

*Satanásen' goclažen' co'oyelan' Jesúsén' cont gone' da' mal*

*(Mt. 4:1-11; Mr. 1:12-13)*

<sup>1</sup> Na' Spiritw che Diosen' gwnabian' yichjlaždao' Jesúsén'. Na' Jesúsén' beze'e cho'a yegw Jordán, na' Spiritua' benen cont gwyeje' latje daš.

<sup>2</sup> Choa ža gwzoe' latje dašen' na' lao choa žan' bicze bi gwdagüe'. Na' cate' gwde choa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal.

<sup>3</sup> Nach gož Satanásen' le':

—Še le' naco' Xi'in Dios, gož yej nga yeyaquen yetextil.

<sup>4</sup> Na' gož Jesúsén' len:

—Nyojczé Xtiža' Diosa' žan: “Gague yela' guagw na'zen' chyažje chio' benačh cont gac bancho, san lecze chyažjecho yogo'lol diža' dan' ža Diosen'.”

<sup>5</sup> Na' gwche' Satanásen' le' to lo ya'a sibe na' be-dao'nez blo'en le' yogo'lol nación da' zjachi' yežlio.

<sup>6-7</sup> Nach gožen le':

—Doxen yel<sub>a</sub>' gwnabia' da' de yežlio nga naquen lo na' cont gwnežjuan' con no che'nda'. Še le' gwzoa xibo' gonxeno' neda', nach goṇa' le' yel<sub>a</sub>' gwnabia' che naci<sub>o</sub>n ca' zjachi' yežlio nga na' len yel<sub>a</sub>' zaca' yel<sub>a</sub>' xdan che naci<sub>o</sub>n ca'.

<sup>8</sup> Nach Jesúsen' gože' Satanásen':

—Becuas ca'ale Satanás. Nyoj<sub>c</sub>ze Xtiža' Diosen' žan: “Cheyala' šejnilaže'cho Xancho Diosen' na' toz le' gonxenko.”

<sup>9</sup> Nach Satanásen' gozche'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino',

<sup>10</sup> le nyoj<sub>c</sub>ze Xtiža' Diosen', žan:

Sela' Diosen' beṇe' ca' zjanac angl che' yesaclene' le' na' yesape' le',

<sup>11</sup> yesoxe' le' cont bi chego' no yej.

<sup>12</sup> Nach Jesúsen' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

<sup>13</sup> Beyož gota'bia' bi gwzoe Satanásen' co'oyelan' Jesúsen' gone' da' mal, nach becuasen šlož len le'.

*Jesúsen' gwzolaküe' chyixjue'ede' diža' güen che Diosen' distritw Galilea*

*(Mt. 4:12-17; Mr. 1:14-15)*

<sup>14</sup> Nach Jesúsen' beyeje' distritw Galilea, na' yel<sub>a</sub>' guac che Spiritw che Diosen' gwzoan len le'. Na' yogo'loḷ beṇe' že' yež ca' zjachi' doxen Galilea gosenezde' che Jesúsen'.

<sup>15</sup> Na' Jesúsen' bsed blo'ede' legaque' lo' yodao' chegaquen', na' yogo'loḷ beṇe' ca' gosonxene' le'.

*Bežin Jesúsen' Nazaret*  
(Mt. 13:53-58; Mr. 6:1-6)

16 Na' bežin Jesúsen' yež Nazaret gan' gwcha'ogüe', na' gwyo'e yodao' ža che Dios can' ba yolagüe' chone', na' gwzechede' cont gwlabē'.

17 Na' ben' yo'o lo ne'e yodao'na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

18 Zoa Spiritw che Diosa' len neda', na' Diosen' gwleje' neda' zedeya' diža' güen len beņe' yaše'.

Na' gwsele' neda' zedeyena' cont yesyeyaclaže' beņe' ca' chesacyaše'de'.

Na' za'a cont gwsana' beņe' ca' zjade ližya.

Na' zedeyena' cont yesyele'e beņe' lchol.

Na' beņe' chyi chzaca', zedeyena' cont noch no yosoči yososaque' legaque'.

19 Na' zedetixjue'eda' ba bžin ža gaclen Diosen' beņachen'.

20 Jesúsen' botobe' yišen' na' bonežjuen' ben' yo'o lo ne'e yodaon' na' gwchi'e. Na' yogo' beņe' ca' nita' yodaon' la' gosenat'ie' le'.

21 Nach gwzolao be'e diža' gwne':

—Ža na'aža ba chac can' ža Xtiža' Diosen' dan' ba benele nga.

22 Na' yogo' beņe' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague benga xi'in Josén'?

23 Nach gož Jesúsen' legaque':

—Ye'ljale neda' can' ža diža' dan' de: "Beņe' güen rmed le', beyon cuino'." Na' lecze ye'ljale neda':

“Dan' chesene' beno' yež Capernaum da' bebane be<sub>ne</sub>' , lecz can' cheya<sub>la</sub>' gono' lažcho nga.”

<sup>24</sup> Nach goze'e le<sub>gaque</sub>' :

—Da' li chnia' le'e, be<sub>ne</sub>' gualaž che note'teze be<sub>ne</sub>' choe' xtiža' Diosen' bitw chesezi'e che'.

<sup>25</sup> Ca tiemp che da' Elías ben' be' xtiža' Diosen' cani', bibi yejw goc šon iz yo gašje na' goc gwbin juisyw che<sub>gaque</sub>' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca tiempa' ,

<sup>26</sup> perw Diosen' bi gwse<sub>le</sub>' Elíasen' cont gaclene' ne to be<sub>ne</sub>' güezeb ca'. Gwse<sub>le</sub>' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe.

<sup>27</sup> Na' lecz ca' tiemp che da' Eliseo ben' be' xtiža' Diosen' cani', gwnita' zan be<sub>ne</sub>' Israel be<sub>ne</sub>' gosacšene len yižgüe' da' nzi' lepra. Ne to le<sub>gaque</sub>' bi beyon Eliseon'. Toz be<sub>ne</sub>' zito' be<sub>ne</sub>' Siria, ben' le' Naamán, beyon Eliseon'.

<sup>28</sup> Na' yogo' be<sub>ne</sub>' ca' že' yodao'na' cate' gosende' dan' gwna Jesúsen' beseža'achgüe'.

<sup>29</sup> Na' la' besyezoža'te' na' besyebeje' Jesúsen' yežen', na' goseche'ene' to lo ya'a da' zoa ga<sub>la</sub>'ze, gosac<sub>laže</sub>' yosos<sub>lažoe</sub>'ne' lo ya'a na'ate,

<sup>30</sup> perw bibi goc yesonde' le'. Con beza' Jesúsen' bedie' gachol<sub>gaque</sub>'.

*Jesúsen' bebeje' da' xigüe' dan' yo'o yichjlaždao' be<sub>ne</sub>'*

*(Mr. 1:21-28)*

<sup>31</sup> Na' jasoe' yež Capernaum gan' mbane Galilean', na' ža che Dios bsed blo'ede' be<sub>ne</sub>' ca' že' lo' yodao'na'.

<sup>32</sup> Na' be<sub>ne</sub>' ca' besyebande' ca' nac dan' b<sub>sed</sub> blo'eden', le bzejni'ide' cacze to be<sub>ne</sub>' ne<sub>zde</sub>' cayanen' nac xbab che Diosen'.

<sup>33</sup> Lo' yodao'na' gwzoa to be<sub>ne</sub>' yo'o nyaze' da' xigüen'. Na' bosye'e gwne':

<sup>34</sup> —¿Bixchen' chgoša' chlaže' chio' len neto', Jesús be<sub>ne</sub>' Nazaret? ¿Zedežiayo'o neto'? Neda' nombi'a le' na' nezda' naco' be<sub>ne</sub>' laždao' xilaže' juisyw ben' gwsela' Diosen'.

<sup>35</sup> Nach Jesús<sub>en</sub>' gwdile' da' xigüen' na' gožen':

—iššago! Bechoj yichjlaždao' benga.

Na' bchix da' xigüen' bena' gachol be<sub>ne</sub>' ca' že'na' nach bechojen. Perw bitw benen le' zi'.

<sup>36</sup> Na' leca besyebane yogo' be<sub>ne</sub>' ca', nach gose' lježe':

—¿Bixen' chac? ¿Bixe da' coben' chlo'e benga? Nachia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz be<sub>ne</sub>'.

<sup>37</sup> Na' ca' nac dan' ben Jesús<sub>en</sub>' gos gwlalje dižan' doxen lagüe yež ca' zjachi' do na'.

*Jesús<sub>en</sub>' beyone' taobi'in che Simónna'*

*(Mt. 8:14-15; Mr. 1:29-31)*

<sup>38</sup> Na' cate' beze'e yodao'na', na' gwyeje' liž Simón. Na' taobi'in che Simónna' chacšende', yo'e da' la. Na' bosol güiže' Jesús<sub>en</sub>' cont yeyone' le'.

<sup>39</sup> Na' Jesús<sub>en</sub>' gwzeche' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsiñi'e da' gose'ej gosagüe'.

*Jesús<sub>en</sub>' beyone' bene' zan*

*(Mt. 8:16-17; Mr. 1:32-34)*



40 Na' cate' ba chxoá gwbižen' goseče'e con yogo' bene' chese'e yižgüe' jasesane' legaque' lao Jesúsna'. Na' Jesúsén' gwxoá ne'e yichj to toe' na' beyone' legaque'.

41 Na' lecz ca' bebej Jesúsén' da' xigüe' da' yo'o yichjlaždao' bene' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsén' gwdile' legaquen na' bitw be'e latje bi yesenan, le gosenezen naque' Cristo ben' gwlej Diosén' cont yedenabi'e.

*Jesúsna' gwde' doxen Galilean' bsed blo'ede'*  
(Mr. 1:35-39)

42 Na' beteyo cate' gwye'ni', beze'e na' beyeje' to latje ga nono nla'. Na' bene' ca' besyeyiljue'ne' na' ja'aque' gan' zoen'. Na' gosaclačže' yosozague' Jesúsén' cont bi yeze'e.

43 Na' Jesúsén' gože' legaque':

—Lecz ca' bene' ca' nita' yež yoble cheyala' šjalo'eda'ne' cont yosozenague' če Diosén' na' nabi'e yichjlažda'ogaque'. Diosén' gwsele' neda' cont šjatixjue'eda' legaque' xtižen'.

44 Ca' goquen', Jesúsén' gwde' to to yež če distritw Galilea na' bsed blo'ede' bene' ca' lo' yodao' čhegaquen'.

## 5

*Gosezene' be zan belya'a*  
(Mt. 4:18-22; Mr. 1:16-20)

1 Na' šlac zecha Jesúsén' cho'a nisdao' da'na' nzi' Genesaret, besežag bene' zan na' bosochite'

Jesúsen' da' gosaclaže' yosozenague' xtiža' Diosen' dan' bi'e cho'a nesdaon'.

<sup>2</sup> Na' Jesúsen' ble'ede' chope barcw dao' cho'a nesdaon'. Na' beñe' gwxcn bel' ca' ba besyežaše' lo' barcon' ba chesyeyibe' yixjw bel' chegaquen'.

<sup>3</sup> Na' Jesúsen' gwyo'e lo' barcw che Simónna' na' gwñabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' beñe' ca' že'na'.

<sup>4</sup> Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

<sup>5</sup> Nach Simónna' gože' Jesúsen':

—Maestrw, ba bento' žin do yel na' ñe to nono bdoła'. Perw le' ba gwnao' yezolaoto', na' gwzala'to' yixjw ca' da' yoble.

<sup>6</sup> Na' beyož bosozala' yixjw chegaquen' zjanyico'ten belen', yezeze ca' yesyecheza'ten.

<sup>7</sup> Na' beñe' ca' zjanita' lo' barcw che Simónna' gosone' señw gosaxe' beñe' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e bel' zan lo'enna'.

<sup>8</sup> Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to beñe' mal, bibi zaca' par so' nga len neda'.

<sup>9</sup> Gwne' ca' le le' txen len beñe' lježe' ca' že' lo' barcon' besyebanchgüede' da' gosezene' bel' zanna'.

<sup>10</sup> Lecz ca' besyebane xi'ñ ben' le Zebedeo, zjanac chop biše'tie', Jacobo len Juan. Beñe' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' be<sub>ne</sub>' gw<sub>x</sub>en be<sub>l</sub>, na' chebejo' be<sub>l</sub>en' lo' nisen'; perw na'a gona' cont gaxle be<sub>ne</sub>' yesyechoje' lo da' malen'.

<sup>11</sup> Na' cate' besyežin<sub>l</sub>ene' barcon' yo biž, nach gosebejyichje' barcon' len yogo' xšin<sub>l</sub>aže' ca' na' ja'aclene' Jesúsen'.

*Jesúsen' beyone' to be<sub>ne</sub>' che'ede' yižgüe' dan' nzi' lepra*

*(Mt. 8:1-4; Mr. 1:40-45)*

<sup>12</sup> Na' šlac Jesúsen' zoe' to yež na' bžin to be<sub>ne</sub>' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' bo<sub>l</sub> güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

<sup>13</sup> Nach Jesúsen' b<sub>l</sub>i ne'e na' gw<sub>x</sub>oen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'.

<sup>14</sup> Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyej ja<sub>n</sub>a' b<sub>x</sub>oza' cont le'ede' ba<sub>ch</sub> beyacdo'. Na' bnežjo da' cheya<sub>l</sub>a' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' be<sub>ne</sub>' yesenezde' ba beyacdo'.

<sup>15</sup> Na' tža tža gos gw<sub>l</sub>alje diža' ca nac yela' guac dan' ben Jesúsen'. Na' besedob be<sub>ne</sub>' zan cont bosozenague' xtiža' Jesúsen' na' cont beyone' lega<sub>que</sub>' len bite'teze yižgüe' da' chese'ede'.

<sup>16</sup> Nach Jesúsen' bchoje' to ši'i güeje ja<sub>l</sub> güiže' Diosen' to latje daš.

*Jesúsen' beyone' to bene' bi chda šla'a ni'a ne'e*  
(Mt. 9:1-8; Mr. 2:1-12)

17 Nach to ža zoa Jesúsen' to yo'o gan' chsed chlo'ede' bene'. Na' gała'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'lol yež ca' gan' mbane distritw Galilea len distritw Judea, na' lecze bałe' za'aque' ciuda Jerusalén. Na' bosozenague' diža' da' be' Jesúsen'. Na' yeła' guac che Xancho Diosen' zoan len Jesúsá' na' beyone' bene' güe' ca'.

18 Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le' to lo cam dao'. Na' gosaclaže' yesedie' šjasesane' le' lao Jesúsá'.

19 Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gosesaljue' goseque'e tej na' beseletje'ne' len xcame'na' gachol bene' ca' že' lo' yo'ona' cont bžine' lao Jesúsen'.

20 Cate' gocbe'e Jesúsen' gosejnilaže' le' na' gože' bene' güe'na':

—Xi'ina', ba bezi'xena' xtolon'.

21 Na' bene' ca' chososed chosolo'e dan' bzoj Moisésa' na' bene' fariseo ca' gosene':

—¿Non' chaque bengá naque' chne' ca'? Chon cuine' ca' Dios. Le nono zoa bene' gac yezi'xene' xtoła' benachen'. Toz Diosen' gac yezi'xenen'.

22 Jesúsen' gocbe'ede' ca' nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole?

23 Še yapa'ne': "Ba bezi'xena' xtoło'na'", bi ņezele še napa' yela' gwnabia' cont yezi'xena' xtole'na'. San še yapa'ne': "Gwyas na' gwda", na' nacbia' še napa' yela' guac gac can' gwnian'.

24 Na'ach gona' cont gache'ele napa' yela' gwnabia' cont yezi'xena' xtoła' beñach, neda' naca' bena' gwsela' Diosen' golja' beñach.

Nach gože' beñe' xinja':

—Chapa' le' beyas, beyoa' xcamon', na' beyej ližo'.

25 Nach la' beyaste beñe' xinja', chesena'te beñe' ca' nita'na'. Nach beyoa' xcamen' na' beze'e zjayda liže' chonxene' Diosen'.

26 Na' yogo'loł beñe' ca' že'na' besyebande' yela' guac che Jesúsen' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo ņa'aža.

*Jesúsen' gwleje' Leví cont goque' le' txen*

*(Mt. 9:9-13; Mr. 2:13-17)*

27 Gwdena' beza' Jesúsen' na' ble'ede' to beñe' güechixjw beñe' le' Leví, chi'e latje gan' chchixjue'. Na' Jesúsen' gože' le':

—Da len neda'.

28 Nach gwzoža' Levín' gwlejjichje' yogo' xšinlaze' na' gweyjlene' Jesúsen'.

29 Nach Levína' bene' to lni xen ližen' par Jesúsen', na' ja'ac beñe' zan beñe' güechixjw ca' na' beñe' yezica'chle na' gosebe'lene' le' cho'a mesen' gosagüe'.

30 Na' beñe' ca' chososed chosolo'ede' dan' bzoj Moisésen' na' len beñe' fariseo ca' gosacyožlene' beñe' ca' zjanaque' Jesúsen' txen, gose'e legaque':

—¿Nacxe<sub>ch</sub>en' che'ej chagwle txen len bene' güe<sub>ch</sub>xijw na' yebale bene' güen da' xin<sub>j</sub> ca'?

<sup>31</sup> Jesúsen' gože' lega<sub>que</sub>':

—Bene' cbi chesacšene bitw cheseyažjde' bene' güen rmed. Bene' ca' chesacšene, lega<sub>quen</sub>' cheseyažjde' bene' güen rmed.

<sup>32</sup> Gague bene' ba zjana<sub>que</sub>' bene' güen len Diosen' zedeneyoeda' cont yesyeti<sub>n</sub>jde' xtolen', san bene' güen da' xin<sub>j</sub>. Lega<sub>que</sub>' zjana<sub>que</sub>' ca bene' cheseyažjde' bene' güen rmed.

*Gosenabde' Jesúsen' bix<sub>ch</sub>en' cbi gwleje' tgüeje ža gwbas*

*(Mt. 9:14-17; Mr. 2:18-22)*

<sup>33</sup> Nach ba<sub>l</sub> bene' gose'e le':

—Bene' ca' zjana<sub>que</sub>' txen len Juan na' bene' zjana<sub>que</sub>' txen len bene' fariseo ca' chesonchgüe' gwbas choso<sub>l</sub> güiže' Diosen'. Perw na' bene' ca' zjana<sub>que</sub>' le' txen chese'ej chesagüe'. ¿Bix<sub>ch</sub>en'?

<sup>34</sup> Nach gož Jesúsen' lega<sub>que</sub>':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zoalene' lega<sub>que</sub>'? Bi gac.

<sup>35</sup> Perw žin ža cate' bich soe' len lega<sub>que</sub>', cana'ch yesone' gwbas. Na' ca'cze naquen len neda' na' len bene' ca' zjana<sub>que</sub>' neda' txen.

<sup>36</sup> Na' Jesúsen' be'e jem<sub>pl</sub> nga bzejni'ide' lega<sub>que</sub>':

—Notno zoa bene' cheza' xe' da' cobe na' yode'en de'exo'. Še gone' ca' gwž<sub>i</sub>aye'e xe' da' coben' na' xe' de'exon' bitw gac leben len lache' coben'.

<sup>37</sup> Na' ne<sub>ca</sub> zoa bene' chgue'e vino cobe lo' bzod yide'exo', le vino coben' chšon' yide'exon' na' la<sub>l</sub>je vino na' yesebiayi' chopen.

38 Cheya<sub>l</sub>a' yese<sub>g</sub>ue'e vino coben' lo' yid cobe cont bibi gaquen.

39 Na' ca nac be<sub>n</sub>e' ba<sub>ch</sub> yolagüe' che'eje' vino golen', bitw ye'nde' ye'eje' vino coben', san že': "Vino golen' nacchen güen."

## 6

*Be<sub>n</sub>e' ca' zjanaque' Jesúsen' txen gosele<sub>ch</sub>jje' trigon' gosagüen' ža che Dios*

*(Mt. 12:1-8; Mr. 2:23-28)*

<sup>1</sup> Na' to ža nac ža che Dios, Jesúsen' gw<sub>wd</sub>ie' gan' nyaž trigw len be<sub>n</sub>e' ca' zjanaque' le' txen. Nach be<sub>n</sub>e' ca' zjanaque' le' txen gosele<sub>ch</sub>jje' trigon' na' gosexoben' gosagüen'.

<sup>2</sup> Na' besele'e ba<sub>l</sub> be<sub>n</sub>e' fariseon' can' gosone' na' gose'e lega<sub>que</sub>':

—¿Bi<sub>ch</sub>en' chon<sub>le</sub> da' bi de l<sub>s</sub>ens goncho ža che Dios?

<sup>3</sup> Na' Jesúsen' gože' lega<sub>que</sub>':

—¿Bi<sub>n</sub>a' gw<sub>w</sub>lable can' ben da' rey David to ža cate' le' na' be<sub>n</sub>e' lježe' ca' gosedone'?

<sup>4</sup> Gwyo'o Davin' liž Dios na' ja<sub>x</sub>i'e yetextil da' nac che Dios da' bi chac gagw be<sub>n</sub>e' bi nac b<sub>x</sub>oz, na' gw<sub>w</sub>dagüen', na' le<sub>c</sub>ze bnežjue' che be<sub>n</sub>e' zja'ac len le'.

<sup>5</sup> Na' le<sub>c</sub>z ca' gwna Jesúsen':

—Naquen lo na' n<sub>i</sub>a' bi da' nac güen goncho cate' nac ža che Dios, neda' naca' ben' gw<sub>w</sub>sel<sub>a</sub>' Diosen' golja' be<sub>n</sub>a<sub>ch</sub>.

*Beyac to be<sub>n</sub>e' n<sub>x</sub>o'on šla'a taque'*

*(Mt. 12:9-14; Mr. 3:1-6)*

<sup>6</sup> Na' yeto ža che Dios gozeje' lo' yodaon' na' bsd blo'ede' be<sub>ne</sub>' ca' že'na'. Na' ladjo be<sub>ne</sub>' ca' zjaže'na' yo'o to be<sub>ne</sub>' n<sub>xo</sub>'o<sub>n</sub> taque' li<sub>cha</sub>.

<sup>7</sup> Na' be<sub>ne</sub>' ca' chososed chosolo'e dan' bzoj da' Moisés na' be<sub>ne</sub>' fariseo ca' chosogüia chesene'e Jesúsén' še yeyone' bena' ža che Dios cont de da' yosode'ede' yesagüe' xya che'.

<sup>8</sup> Na' go<sub>be</sub>'e Jesúsén' can' chesone' xbaben', na' gože' ben' n<sub>xo</sub>'o<sub>n</sub> taque':

—Gwzoža' na' gwzecha nga gachol.

Nach bena' bžine' gwzeche' lagüen'.

<sup>9</sup> Na' Jesúsén' gože' be<sub>ne</sub>' ca' že'na':

—¿Bi da' cheya<sub>la</sub>' goncho ža che Dios? ¿Goncho da' güen, še goncho da' mal? ¿Cheya<sub>la</sub>' yoslacho be<sub>ne</sub>', še gwžiyi' chone'?

<sup>10</sup> Jesúsén' gw<sub>ne</sub>'e yogo'te ben' že'na', nach gože' ben' n<sub>xo</sub>'o<sub>n</sub> taque':

—Bli naon'.

Nach bli<sub>en</sub>' na' taquen' beyaquen bin<sub>lo</sub>.

<sup>11</sup> Na' be<sub>ne</sub>' ca' chososed chosolo'e leyna' na' len be<sub>ne</sub>' fariseon' leca beseže'e na' gwzolao bosoxi'e nacle yesone' len Jesúsén'.

### *Jesúsén' gwleje' šiz<sub>in</sub>w postlw*

*(Mt. 10:1-4; Mr. 3:13-19)*

<sup>12</sup> Na' to ža gwyej Jesúsén' to lo ya'a jel güiže' Diosén'. Na' do yel be'lene' Diosén' diža'.

<sup>13</sup> Na' cate' gwye'ni', goxe' be<sub>ne</sub>' ca' zjanaque' le' txen, nach gwleje' šiz<sub>in</sub>ue' na' bsi'e le<sub>ga</sub>que' postlw.

<sup>14</sup> Be<sub>ne</sub>' qui gwleje': Simón ben' bsi'e Pedro, na' be<sub>ne</sub>' biše' Andrés, na' Jacobo, na' Juan, na' Felipe, na' Bartolomé,



15 na' Mateo, na' Tomás, na' Jacobo xi'in Alfeo, na' Simón ben nac cananista,

16 na' Judas bene' biše' Jacobo, nach Judas Iscariote ben' bdie' Jesúsēn' lo na' bene' chesegue'ede' le'.

*Jesúsēn' bzejni'ide' bene' zan*

*(Mt. 4:23-25)*

17 Na' beyetje' lo ya'an len legaque' na' gwzeche' ga nac to laše' len bene' ca' zjanaque' le' txen. Na' lecze nita' bene' zan bene' za'ac doxen Judean', do ciuda Jerusalēnna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len bene' ca' nita' chosozenague' xtiža' Jesúsēn' zjančixē bał bene' chese'e yižgüe'. Na' Jesúsēn' beyone' legaque'.

18 Na' bene' ca' zjajo'o zjanyaz da' xigüēn' yichjlažda'ogaque', Jesúsēn' bebejen'.

19 Na' yogo' bene' goseyiljue' nacle yesone' cont yeselapa' na'gaquen' le', le gosēnezde' nape' yela' guac cont yega'a yižgüe' čhegaquen' še yesechele'ne'.

*Non' zoa mbalaz na' non' cbi zoa mbalaz*

*(Mt. 5:1-12)*

20 Na' Jesúsēn' gwłis lagüe' gwne'e bene' ca' zjanaque' le' txen na' gože' legaque':

—Mbalaz zoa le'e bene' yaše', le'e chzenagle čhe Diosen' cont chnabi'e yichjlažda'olen'.

21 'Mbalaz zoa le'e chdonle na'a, gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

22 'Neda' naca' ben' gwsela' Diosen' golja' beṇač. Na' mbalaz soale še dan' chejnilaže'le

neda' chesegue'e bene' le'e, na' chesyebeje' le'e lo' yodao' chegaque', na' cheseneye'e chele, na' chesene' nacle bene' mal.

23 Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ogaque' len da' bene' ca' goso'e xtiža' Diosen' cani'.

24 'Na' nyaše'chguaze nac le'e bene' gwñi'a. Chac güen chele na'a, perw gague toli tocanen' gac chele ca'.

25 'Nyaše'chguaze nac le'e dechgua da' chagwle na'a. Gwžin ža cate' bich bi gata' chele.

'Nyaše'chguaze nac le'e chxižle na'a. Gwžin ža cate' yegüine'le na' cuežyaše'le.

26 'Nyaše'chguaze nac le'e chesonxen yogo'lol bene' le'e. Ca'czen' goson da' xozxta'ogaque', gosonxene' bene' ca' goseziye'e gosene' cheso'e xtiža' Diosen' cani'.

*Cheyała' gaquecho bene' chesegue'ede' chio'*  
(Mt. 5:38-48; 7:12)

27 'Le'e chzenagle chia', cheyała' gaquele bene' chesegue'ede' le'e. Cheyała' gonle da' güen len bene' ca' chesegue'ede' le'e.

28 Le nab cont bene' chesegue'ede' le'e nite' mbalaz. Le soa le nabe Diosen' gaclene' bene' chososaca'zi' le'e.

29 Še to bene' chaze' šla'a xaga'le, le güe' dan' yešla'a. Še to bene' que'e xadon chele, le güe' latje lechje' len xcamisle.

<sup>30</sup> Note'teze be<sub>ne</sub>' bi dan' nabde' le'e, le gwnežjon. Še to be<sub>ne</sub>' que'e bite'teze da' de chele, bitw ye<sub>n</sub>ablen.

<sup>31</sup> Con yogo' da' güen da' chaclaže'le yeson be<sub>n</sub>a<sub>ch</sub>en' len le'e, le<sub>c</sub>ze ca' cheya<sub>l</sub>a' gon<sub>l</sub>e len lega<sub>q</sub>ue'.

<sup>32</sup> 'Še chaquele šinze be<sub>ne</sub>' chacde' le'e na' bi chaquele be<sub>ne</sub>' yoble, ĵbix<sub>ch</sub>en' chaquele chebe Diosen' can' chon<sub>l</sub>e? Ca'cze cheson be<sub>ne</sub>' güen da' mal ca'.

<sup>33</sup> Le<sub>c</sub>ze še chon<sub>l</sub>e da' güen len be<sub>ne</sub>' ca' cheson da' güen len le'e na' bi chon<sub>l</sub>e güen len be<sub>ne</sub>' yoble, ĵbix<sub>ch</sub>en' chaquele chebe Diosen' can' chon<sub>l</sub>e? Ca'cze cheson be<sub>ne</sub>' güen da' mal ca'.

<sup>34</sup> Še chbejle bi da' chbejle len be<sub>ne</sub>' chaquele yesyeyon<sub>n</sub>' le'e, ĵbix<sub>ch</sub>en' chaquele chebe Diosen' can' chon<sub>l</sub>e? Ca'cze cheson be<sub>ne</sub>' güen da' mal ca', chesebeje' bi dan' chesebej lježga<sub>q</sub>ue', na' nite' lez yosyonežjuen'.

<sup>35</sup> Perw na' le'e, le soa le ga<sub>q</sub>ue be<sub>ne</sub>' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyon<sub>n</sub>'. Še gon<sub>l</sub>e ca dan' ba gwnia' le'e, gwlo'ele nacle xi'in Dios ben' nac la'zelagüe be<sub>ne</sub>' bla<sub>o</sub>, na' Diosen' güebi'icze' güen len le'e. Le'na' na<sub>q</sub>ue' be<sub>ne</sub>' šagüe' len be<sub>ne</sub>' ca' bi cheso'e yela' cho<sub>x</sub>clen che' na' len yezica'chle be<sub>ne</sub>' güen da' mal ca'.

<sup>36</sup> Na' ca Xacho Diosen' ben' zoa yaba cheyaše' cheži'ilaže'de' yogo' be<sub>n</sub>a<sub>ch</sub>en', ca'cze cheya<sub>l</sub>a' yeyaše' yeži'ilaže'le ljež be<sub>n</sub>a<sub>ch</sub>len'.

*Bitw zaca'cho n̄acho beṇe' zjanape' dola'*  
*(Mt. 7:1-5)*

37 'Bitw gonle xbab zaca'le n̄ale beṇe' zjanape' dola'. Še n̄ale che beṇe' zjanape' dola', ca'cze Diosen' n̄e' le'e n̄aple dola'. Na' bibi yosbaga'le beṇe' cont Diosen' bibi yosbague'de' le'e. Le soa le yezi'xen che beṇe' cont Diosen' yezi'xene' chele.

38 Le soa le gwnežjo bi da' gwnežjwle beṇe' na' Diosen' güeyoṇcze' chele. Baḷ beṇe' leca nala' chosochixe' bi dan' chesote', chosochiše' lao yagarm chegaquen' na' chesebiben' na' choso-zoaya'aten'. Ca'czen' cheyala' gonle gwnežjwle bi dan' cheseyažje beṇe' na' lecz ca' gon Diosen' len le'e.

39 Nach Jesúsēn' be'lene' beṇe' že'na' to jempl, gwne':

—¿Guaque to beṇe' l̄chol̄ cue'e nez yeto beṇe' l̄chol̄? Bī gac. Le n̄ezecho chopte' šjasebixe' to lo' yechw.

40 Ca nac cate' to beṇe' chsede' len to maestrw, bi n̄acho naque' beṇe' blaoch ca maestroa'. Na' la'czla' še ben' chseda' gwda' yichje' yogo'loḷ dan' blo'e maestron' le', bitw naque' beṇe' sina'ch ca maestroa'.

41 ¿Bixchen' chṇa'le beb dao' dan' yo'o lo' yejlao beṇe' l̄ježle, na' bi chache'ele naquech beb xen dan' yo'o lo' yejlaolen'?

42 Na' še le'e yo'o to da' xen lo' yejlaolen' ¿nacxechen' che'le beṇe' l̄ježlen': "Beṇ yebeja' beb dao' dan' yo'o lo' yejlaguon'"? ¡Beṇe' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao beṇe' l̄ježle.

*Dan' choncho chlo'en bin'yo'o lo'yichjlažda'ochon'  
(Mt. 7:17-20; 12:34-35)*

<sup>43</sup> Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen.

<sup>44</sup> Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas.

<sup>45</sup> To beñe' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

*Chope bene' na'yo'o da' chon to toe'  
(Mt. 7:24-27)*

<sup>46</sup> '¿Bichen' che'le neda': “Xana”, na' bi chonle can' nona' mandadw?

<sup>47</sup> Na'a nia' nac zaca'lebe beñe' nao' neda' na' chzenague' xtiža'na' chone' can' nona' mandadw.

<sup>48</sup> Naque' ca to beñe' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan.

<sup>49</sup> Na' yogo' beñe' chende' xtiža'na'na' bi chone' can' žia'na' naque' ca yeto beñe' ben yo'o, con benen' lo yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiayi'te yo'on.

## 7

*Jesúsen' beyone' xmos to xan soldadw  
(Mt. 8:5-13)*

1 Na' cate' beyož be' Jesúsen' diža' len bene' ca', beyeje' yež Capernaum.

2 Na' zoa to xan soldadw bene' bitw naque' bene' Israel. Na' zoa to xnose' chacšenchgüede', na' yelez ba de' par gate'. Na' xan soldadon' chacchhgüede' le'.

3 Na' cate' xan soldadon' bende' diža' che Jesúsen', gwsele' bal bene' gole blao che bene' Israel cont jaseñabde' Jesúsen' šeje' liže' yeyone' xnose'.

4 Nach cate' besežine' gan' zoa Jesúsen', gosenabde' le' gaclene' xan soldadon'. Na' gose'e Jesúsen':

—Xan soldadon' naque' to bene' zaque' gacleno',

5 le chacde' chio' bene' Israel, na' le' bene' yodao' cheto' nga len xmechue'.

6 Nach gwyej Jesúsen' len legaque', perw za' yesežine' liže'na' cate' gwseła' xan soldadon' bal bene' migw che' lao Jesúsen' na' gose'ene':

—Xan soldadon' že' bitw gwša'a yichjo' yido' liže'na', le nežde' bitw zaque' cont šo' liže'na'.

7 Da'nan' bitw beyaxjde' yide' ñabde' le' gacleno'ne'. Con che'nde' gonšco' mandadw yeyaque xnose'na'.

8 Xan soldadon' že' zoa bene' chnabia' le' perw lecze nita' soldadw che' na' chnabi'e legaque'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono", na' chonen'. Na' nežde' con ñao' yeyac xnose'na' na' yeyacde'.

9 Na' Jesúsen' cate' bende' diža' dan' gose' bene' migw che' xan soldadon' le', bebande' na' beyechje' gože' bene' zan ca' zjanao' le':

—Žia' le'e ne toze bene' Israel bina' šejnilaže' neda' ca chejnilaže' benga bi naque' bene' Israel.

<sup>10</sup> Nach jaya'ac bene' ca' gwseła' xan soldadon'. Cate' besyežine' liže'na' ba beyaque xmosen'.

*Jesúsen' bosbane' xi'in to no'ole güezebe*

<sup>11</sup> Jesúsen' gwyeje' to yež dan' nzi' Naín len bene' ca' zjanaque' le' txen na' zan bene' yoble.

<sup>12</sup> Ba zja'aque' gała'ze par yesežine' cho'a puert che yežna' cate' besele'ede' chesechoj xonj bene' cho'a puerten' zjanlene' to bene' guat. Na' ben' goten' naque' bene' tliša', na' xne'en naque' no'ole güezebe. Na' bene' zan bene' lo yeža' zja'aclene' xna' bene' guaten'.

<sup>13</sup> Na' cate' ble'e Xanchon' no'olen', beyaše'de' le' na' gože'ne':

—Bitw cuežo'.

<sup>14</sup> Nach gwyeje' jaḡoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

—Bene' güego', neda' žia', beyas.

<sup>15</sup> Nach bene' guaten' gwchi'e na' gwzolagüe' bene'. Na' Jesúsen' beyone' le' lo na' xne'e.

<sup>16</sup> Na' yogo'lol bene' ca' besežebe' dan' beban bene' guata' nach gosonxene' Diosen' gosene':

—Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gac-lene' chio' naccho nación che'.

<sup>17</sup> Ca nac dan' ben Jesúsen' gos gwłalj diža' chen' doxen Judea na' yogo'lol yež ca' dan' zjanita' gała'ze.

*Juanna' gwsele' chope ben' gosaque' le' txen gan' zoa Jesúsen'*

*(Mt. 11:2-19)*

<sup>18</sup> Nach bene' ca' zjanaque' txen len Juanna' jas-eye'lene' le' diža' yogo'loḷ ca nac dan' chon Jesúsen'. Nach gox Juanna' chope bene' ca'

<sup>19</sup> nach gože' legaque':

—Le šja'ac gan' zoa Jesúsen' na' ye'lene': “¿Len' naco' ben' chbezto' seḷa' Diosen' o še cheyaḷa' cuezchto' yid bene' yoble?”

<sup>20</sup> Nach bene' ca' chope cate' besežine' gan' zoa Jesúsen' gose'ene':

—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' seḷa' Diosen' o še cuezchto' yid bene' yoble.

<sup>21</sup> Šlacte ne' nita' chope bene' ca', Jesúsen' beyone' bene' zan bene' ca' chesacšene na' bene' chese'ede' yižgüe' gual. Lecze bebeje' da' xižgüe' da' zjajo'o zjanyaz yichjlaždao' bene' zan. Na' bene' cont besyele'e zan bene' lchol.

<sup>22</sup> Nach Jesúsen' boži'e xtiža' bene' ca' gwseḷa' Juanna' lagüe'na', gože' legaque':

—Le šjaya'ac na' le šjajež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen len bene' yaše' ca'.

<sup>23</sup> Mbalaz zoa bene' chejle'e chia' na' bi chdebde'.

<sup>24</sup> Na' cate' besyeya'ac bene' ca' gwseḷa' Juanna', nach Jesúsen' be'lene' bene' ca' zjandoben' xtiža' Juanna', gože' legaque':



—¿Nacxe nac ben' jale'ele latje dašen'? ¿Šayichj šayen chaque'? Bi naque' ca'.

<sup>25</sup> ¿Nac naque' caten' jale'elne'? ¿Nyaze' lache' šagüe'? ¿še bitw? le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž bene' gwnabia'.

<sup>26</sup> ¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios.

<sup>27</sup> Che benga nyojen le'e Xtiža' Diosen' žan:  
Neda' Dios seļa' to bene' cuialagüe' laguo' güe'e  
xtižon'

cont cate' yido' ba nita' bene' yesonxene' le'.

<sup>28</sup> Chnia' le'e, notech no benach na' soa bene' naquech bene' blaoch ca Juanna'. Perw na' note'teze bene' gwzenague' che Diosen' cont Diosen' nabi'e yichjlažda'ogüe', la'czla' bi naque' bene' blao, gwžin ža cate' šejni'ichde' chia' clal ca Juanna'.

<sup>29</sup> Ba bzoa Juanna' bene' zan nis na' len bal bene' güechixjw. Na' yogo' bene' ca' gosacbe'ede' Diosen' zejcze' to licha dan' gwsele' Juanna' jatixjue'ede' legaque' yesyetiñjde' xtoļa'gaque'.

<sup>30</sup> Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetiñjde' xtoļa'gaquen' can' goclaže' Diosen'. Bi gosaclaže' gwzoa Juanna' legaque' nis.

<sup>31</sup> Nach Jesús'en gože' legaque':

—¿No gwsaca'lebda' le'e zoale na'a? ¿No chon can' chonlen'?

32 Nacle ca bidao' neche bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': “Ba bcuežto' bžejo, neca bya'ale, na' ba bilyaše'to', neca gwchežle.”

33 Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca güe'ej'e' vino, nach gwnale che': “Yo'o nyaz da' xigüen' yichjlažda'ogüe'.”

34 Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwseła' Diosen' golja' benach. Na' lecze žale naca' migw che' bene' güe'chixjw ca' na' migw che' nochle bene' güen da' xinj.

35 Perw na' bene' chosozenag che' Diosen' zjanape' to yela' sina' na' chesone' cont nacbia' Diosa' naque' la'zelagüe' bene' sina'.

### *Jesúsen' gweje' liž Simón bene' fariseo*

36 To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'.

37 Na' to no'ole lo ciudan', no'ole zle', gwnezde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chlā' zix.

38 Na' jabigue' gała'ze xni'a Jesúsen' na' gwcheže' na' nis xchež chen' bžonen ni'a Jesúsen' gwbsisen. Na' bxie' ni'ena' len yiša' yichje' na' bnopen' na' gwdeben' set zixen'.

39 Na' ben' goxe' Jesúsen' ližen', cate' ble'ede' can' chon no'ola' na' godce': “Šaca' benga naque' to

be<sub>ne</sub>' choe' xtiža' Dios, guacbe'ede' no'olen' chgan  
ni'ena' naque' no'ole zle'".

<sup>40</sup> Nach Jesús<sub>en</sub>' gože'ne':

—Simón, de to da' che'nda' yapa' le'.

Nach Simón<sub>na</sub>' gože' Jesús<sub>en</sub>':

—Gwnan Maestw.

<sup>41</sup> Jesús<sub>en</sub>' gože'ne':

—Gwzoa to be<sub>ne</sub>' na' nita' chope be<sub>ne</sub>' chesale'  
xmechue'. Toe' chale' gayo' gayoa mechw da' nzi'  
denario, na' ben' yeto chale' šiyon mechw lecze  
denario.

<sup>42</sup> Na' chopte be<sub>ne</sub>' ca' ne toe' ca de chegaque'  
cont yesyeyixjue' xyan'. Na' ben' gwlej mechon'  
gwlejyichje' dan' chesale' chen'. Gwnašc neda',  
¿noe' be<sub>ne</sub>' ca' chope' gosacchde' che'?

<sup>43</sup> Nach Simón<sub>na</sub>' gože'ne':

—Šeca ben' goc xya chen' da' xench na' gwle-  
jyichjen'.

Jesús<sub>en</sub>' gože'ne':

—Da' li can' ba gwnao'na' naquen.

<sup>44</sup> Nach Jesús<sub>en</sub>' gwyečhje' gwne'e no'ola' na'  
gože' Simón<sub>na</sub>':

—¿Chle'edo' no'ole nga? Neda' ba gwyo'a ližo'  
nga na' bi be<sub>no</sub>' nis čhib ni'a, perw no'ole nga ba  
gwdibe' ni'an' len nis xčež chen' bxien' len yiša'  
yichje'.

<sup>45</sup> Bi bnopo' neda', perw na' no'ole nga cate'  
bla'atia' gwzolagüe' chnope' ni'a nga.

<sup>46</sup> Bi gwdebo' set yichja', perw no'ole nga ba  
gwdebe' set zix ni'a nga.

<sup>47</sup> Na' žia' le', xtole'na' gosaquen da' zan, perw  
ba bezi'xena' che'. Da'nan' chacchgüede' neda'.

Be<sub>ne</sub>' bi žinlaže' xtolen' ca xto<sub>la</sub>' no'ole nga, cate' yezi'xena' che' bitw gactecde' neda'.

48 Nach gože' no'olen':

—Ba bezi'xena' xto<sub>lo</sub>'na'.

49 Nach be<sub>ne</sub>' ca' chesagw len Jesúsen' txen lo mesen' gwzolao chese' lježe':

—¿Nox benga chacde' le'na' chezi'xene' xto<sub>la</sub>' be<sub>n</sub>achen'?

50 Nach gož Jesúsen' no'ola':

—Dan' chejnilažo' neda' da'nan' ba de yela' mban čio' to<sub>li</sub> toca<sub>ne</sub>. Beyej to šagüe' to güen.

## 8

### *No'ol ca' gosaclene' Jesúsen'*

1 Na' gwdechle gwyej Jesúsa' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' be<sub>ne</sub>' yosozenague' che'. Na' zja'aclen be<sub>ne</sub>' šižinw ca' le', be<sub>ne</sub>' ca' zjanzi' postlw.

2 Nach to xonj no'ole lecze zja'aclene' Jesúsen' be<sub>ne</sub>' ca' ba beyone'. Bale' ba bebeje' da' xigüe' da' zjajo'o zjanyaz lo' yichjlažda'ogaque' na' yeba<sub>le</sub>' ba beyone'ne' cate' gosacšende'. Na' toe' lie' María be<sub>ne</sub>' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'.

3 Nach lecze len ben' le Juana, xo'ole ben' le Chuza, na' Chuzan', gwyo'o lo ne'e liž rey Herodes na' yežlio che' ca'. Na' lecze len ben' le Susana gwyejlene' Jesúsen', na' yezan be<sub>ne</sub>' yezica'chle. Na' no'ol ca' bosochine' bite'teze da' gota' čhegaque' cont bosonežjue' dan' byažje Jesúsen' len be<sub>ne</sub>' ca' zjanaque' le' txen.

*Jempl che bene' goz trigon'**(Mt. 13:1-9; Mr. 4:1-9)*

<sup>4</sup> Na' bene' zan besežag gan' zoa Jesúsen' bene' za'ac to to yež ca'. Na' be'e to jempl, gwne':

<sup>5</sup> —To bene' güen žin jeze' trigw na' šlac zeje' chose' trigon' late' bin jasechazen do cho'a nezen', na' bosolej bosošošj bene' len, na' be žia xil be chaš le'e yaba gosagwban'.

<sup>6</sup> Yelaten' jasechazen ga nac lo yej, na' cate' beselan' na' gosebižen, le gague bi gopa' den'.

<sup>7</sup> Yelaten' jasechazen ga nac lo yag yeše', na' gosecha'on txen, na' bosolole' yag yeše' ca' len.

<sup>8</sup> Perw na' yelaten' jasechazen ga nac yo šagüe' na' beselan', na' balen gosebian to gayoa güeje.

Na' beyož be'e diža' quinga gwne' zižje gože' legaque':

—Le'e žia nagle da' chene, le gwzenag xtiža'na'.

*Jesúsen' gwne' bixchen' bi'e jempl cate' bzejni'ide' bene'**(Mt. 13:10-17; Mr. 4:10-12)*

<sup>9</sup> Nach bene' ca' zjanaque' Jesúsen' txen gosenabde' le' bi zejen jempl da' ba bi'e.

<sup>10</sup> Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw bene' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden'.

*Jesúsen' bzejni'ide' bi zejen jempl che bene' goz trigon'**(Mt. 13:18-23; Mr. 4:13-20)*

11 'Na' ca nac jempl nga zejen quinga: Ca dan' byažen zejen xtiža' Dios.

12 Na' biñ dan' besego'onen chanezen', zejen bene' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban čhegaque' toli tocanē.

13 Na' biñ dan' besego'on ga nac lo yej zjanaquen ca bene' chesyebede' xtiža' Diosen', perw zjanaque' ca to da' bibi loe chon, šložga chesejle'e che xtiža' Diosen', na' cate' chac bi da' mal čhegaque' la' chesebejyichjte' xtižen'.

14 Na' biñ dan' besego'onen ga nac lo yag yeše', zejen ca bene' ca' ba gosende' xtiža' Diosen', perw šlac zjambane' chesyela' chesyěžejde' na' chese'nde' yeseñi'e, na' chesede' chesonteze' con da' žazen čhegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nan' bi chesejnilaže' le' ca cheyala'.

15 Na' da' ca' besego'onen lo yo šagüen', zejen ca bene' cate' chesende' xtiža' Diosen' chesezi'en chesonen' čhegaque', na' chesejnilaže' le' do yichj do laže', na' chesechejde' bite'tez dan' chac čhegaque' cont chesone' can' che'ne Diosa'.

*Jempl che yi' dan' chguala'cho*  
(Mr. 4:21-25)

16 Na' Jesúsen' gwne':

—Notno gwguala' to yi' na' gw dosen' to yeso', na' nēca gwcuāše' yin' xan xcame'. San chde'en le'e ze'e cont gwseñin' len yogo'lol bene' yeso'o lo' yo'o.

17 Le yogo'lol da' ngaše' chia' neda', lenna' gwlo'elaon, na' yogo'lol da' nono na' neze chia', žin ža yeseņezden' na' yesejni'iden'.

18 'Le gwzenag da' quinga da' chzejni'ida' le'e, le note'teze beņe' chzenague' xtiža' Diosen' gwzejni'ich Diosen' le', perw na' note'teze beņe' bi chzenague', da' daon' chacde' ba neze', yeca'a Diosen' len.

*Xna' Jesúsen' len beņe' biše' ca' besežine' gan' zoe'  
(Mt. 12:46-50; Mr. 3:31-35)*

19 Na' xna' Jesúsen' len beņe' biše' ca' besežine' gan' zoa Jesúsen', gosaclaže' yeso'e, perw catec beņe' zan že' gague goc latje yesežine' lagüe' na'ate.

20 Na' to ben' ze na' gože' Jesúsen':

—Xna'o len beņe' bišo' ca' zjanite' chyo'o na' chesaclaže' yedesene'e le'e.

21 Na' Jesúsen' gože' legaque':

—Beņe' ca' chosozenag xtiža' Diosen' na' chesezi'e cho'alao xtižen', beņe' can' zjanaque' xna'a na' biša'.

*Jesúsen' bcueze' be' bdono' lo nisdao'  
(Mt. 8:23-27; Mr. 4:35-41)*

22 Na' goc to ža Jesúsen' gwyo'e to lo barcw len beņe' ca' zjanaque' le' txen. Na' gože' legaque':

—Laga'cho yešla'ale nisdakon'.

Nach bosose'e barcon'.

23 Šlac zejen lo nisen' gwtas Jesúsen'. Nach gwzolao gwyečhj to be' bdono' lo nisdakon', na' gwzolao cheyož nis lo' barcon'. Na' besexožde' yesebiaye'e.

24 Nach bosyosbane' Jesúsen' gose'e le':

—¡Maestrw! ¡Maestrw! Bačh chbiayi'cho.

Nach gwyase' na' gwdile' be' bdono' len nisdaon', na' la' gosebe'žiten.

<sup>25</sup> Na' gože' legaque':

—¿Nacxechen' bi chejle'le chia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdaon' chosozenaguen che da' že'.

*To bene' Gadara yo'o nyaze' da' xigüe'*

*(Mt. 8:28-34; Mr. 5:1-20)*

<sup>26</sup> Na' besežine' laž bene' Gadara ca', to yež da' chi' šla'a distritw Galilean', laga'cho nisdao'.

<sup>27</sup> Na' cate' bechoj Jesúsen' lo' barcoa', to bene' lo' yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do cap-santwle.

<sup>28-29</sup> Na' bene' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzoj btine' gdenṇa' zan ni'a. Na' gosonen cont gwyeje' ga nono bene' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e zižje gwne':

—¿Bixchen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chṇeyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'.

<sup>30</sup> Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:



—Legión lia'.

Gwnan ca' le zjanaquen da' zan zjajo'on yichjlažda'ogüen'.

<sup>31</sup> Nach da' xigüe' ca' gosata'yoen Jesúsa' bi yeselen' lo yi' gabil'.

<sup>32</sup> Na' to ya'a da' zoa gała'ze chesaš zan coš chesagwba'. Nach da' xigüe' ca' gosata'yoen Jesúsén' gwnežjue' latje šjaseyo'on yichjlaždao' coš ca'. Na' Jesúsén' bnežjue' latje.

<sup>33</sup> Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ba' na' jaselažo'ba' lo' nisdao' ga gosatba' gose'ejba' nis.

<sup>34</sup> Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaque' can' ba goquen.

<sup>35</sup> Nach ja'ac bene' jasene'e bixen' goc. Na' cate' besežine' gan' zoa Jesúsén' besele'ede' bena' ba gwyo'o gwyaz da' xigüen', na'a ba chi'e gała'ze cuit Jesúsén' nyaz xalane', na' ba bezoa yichjlažda'ogüe' binlo. Na' besežebe'.

<sup>36</sup> Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'.

<sup>37</sup> Nach yogo'lol bene' ca' že' gan' mbane yež Gadaran' jasetayoede' Jesúsén' yeze'e lažgaquen', le besežebchgüe'. Nach Jesúsén' beyo'e lo' barcon' cont yeze'e.

<sup>38</sup> Na' bena' beyaque cate' Jesúsén' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsén' bi be'e latje, san gože'ne':

39 —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsén' len le'.

*Jesúsén' beyone' xi'in Jairo na' beyone' yeto no'ole bene' gwdane' xe'*

*(Mt. 9:18-26; Mr. 5:21-43)*

40 Na' cate' Jesúsén' belague' nisdaon', bene' zan ba nita' chesebeze' le'. Chesyebechgüede' da' bežine' na'.

41 Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsén' gota'yoede' le' šejlene' le' liže',

42 le ba zoa gat bi' no'ol che'. Nache' bi' tliša', na' šižinw izguebe'. Na' šlac zej Jesúsén' len le', bene' zan gosebiadi'e le' na' bosochichgüe' le'.

43 Na' len to no'ole ba goc šižinw iz chzoe' gwba'o' na' ba benditje doxen xmechue' len bene' güen rmed ca'. Na' notno goc gon le' rmed.

44 Na' gwbiga' no'olen' cože' Jesúsén' na' gwdane' lox xen', nach la' gwlezte gwba'o' dan' zoen'.

45 Na' gwna Jesúsén':

—¿Non' gwdan neda'?

Na' ne toe' ca gosechebe' še ba gosegane' le'. Nach Pedron' len bene' ca' zja'aclen Jesúsén' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

46 Nach Jesúsén' gože' legaque':

—To bene' ba gwdane' neda'. Chacbe'eda' ba beyacde' len yela' guac chia'na'.

47 Nach no'olen' cate' goche'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo' bene' ca' že'na' bixčhen' gwdane' le' na' can' goc la' beyactede'.

48 Nach gož Jesúsa' no'ola':

—Xi'ina', ba beyacdo' dan' chejnilažo' neda'. Beyej binlo.

49 Ne' choe'te Jesúsa' dižan' ca' cate' bžin to bene' gwza' liž Jairo ježe' le':

—Ba got bi' no'ol dao' chion'. Bich gondo' Maestroa' zed.

50 Perw cate' bene' Jesúsen', na' gože' Jairo:

—Bitw žebo', con gwyejnilaže' neda' na' yeyaquebe'.

51 Na' cate' besežine' liž Jairona', Jesúsen' bi be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o.

52 Na' ba chi'chgua žaš na' yogo' bene' ca' že'na' chesebežchgüe'. Na' Jesúsen' gože' legaque':

—Bitw cuežle. Biņa' gatbe', san chtasbe'.

53 Na' bosoxiže' gosonle' che' da' zjaņezde' ba gotbe'.

54 Perw Jesúsen' beḡue' taca' bi' no'ol guaten' na' bol güiže'be' gože'be':

—No'ol dao', beyas.

55 Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'.

56 Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

## 9

*Jesúsa' gwsele' bene' šižinw ca' jasedixjue'ede' xtižen'*

*(Mt. 10:5-15; Mr. 6:7-13)*

<sup>1</sup> Jesúsēn' botobe' bene' šižinw ca' gwleje' cont zjanaque' le' txen na' bnežjue' legaque' yela' gwn-  
abia' na' yela' guac cont goc besyebeje' da' xigüe' lo' yichjlaždao' bene', na' lecze ca' besyeyone' bene' ca' chesacšene.

<sup>2</sup> Na' lecze bene' mandadw šjasedixjue'ede' Diosā nabi'e yichjlaždao' bene' yosozenag che'. Na' bene' mandadw yesyeyone' no bene' güe'.

<sup>3</sup> Na' gože' legaque':

—Bibi goxe'le tnez. Bitw goxe'le xis da' gwchiše'le, nēca gua'le bzod, nē yet, nē mechw, na' bitw gua'le yeto xcamisle.

<sup>4</sup> Cate' žinle to liž bene', na'ze yega'anle šlac zoale lagüe yeža'; cate'ch yeža'le yeža', cana'ch yeža'le latja'.

<sup>5</sup> Na' še zoa ga bi yosolebe' le'e, cate' yeža'le na', le cuibe ni'alēn' yo bište cont nachbia' malēn' chesone' bi chosozenague' xtiža' Diosēn'.

<sup>6</sup> Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güēn che Jesúsēn' na' besyeyone' no bene' güe'.

*Ba gosote' Juan ben' bzoa bene' nis*

*(Mt. 14:1-12; Mr. 6:14-29)*

<sup>7</sup> Na' gobernador Herodes goque' tole bende' yogo'lol da' güēn da' chon Jesúsēn'. Gocžejlaže', le bal bene' gose'e le' ba beban da' Juan ladjo bene' guat ca'.

<sup>8</sup> Na' yebale' gosene' šeca da' Elías ben' be' xtiža' Diosen' cani' ba bela' yežlio nga da' yoble. Yebale' chesene' yeto beṇe' be' xtiža' Diosen' cani'te ba bebane' ladjo beṇe' guat ca'.

<sup>9</sup> Na' Herodesen' gwne':

—Neda' bena' mandadw gosečogue' yen Juanna', perw čnoxen' chon da' güen ca dan' chesoe' beṇe' diža'?

Na' gwdiljwlaže' nacle gone' cont le'ede' Jesúsen'.

*Bguagw Jesúsen' gayo' mil beṇe'*

*(Mt. 14:13-21; Mr. 6:30-44; Jn. 6:1-14)*

<sup>10</sup> Na' cate' besyežin postlw ca' gan' zoa Jesúsen' nach gose'e le' can' ba gosonen'. Na' gwčhi'e legacze' na' ja'aque' to latje gan' mbane yež Bet-saida.

<sup>11</sup> Cate' gosacbe'e beṇe' ca' nita' gan' zoa Jesúsen' ba gosa'aque' len beṇe' ca' zjanaque' le' txen, nach zja'aque' zjana'ogüe' legaque'. Jesúsen' blebe' legaque' na' bsed blo'ede' legaque' Diosen' nabi'e yichjlaždao' beṇe' yosozenag čhe', na' beyone' beṇe' ca' chesacšene.

<sup>12</sup> Cate' gwzolao gwxa gwbižen', nach beṇe' šižinw ca' zjanaque' Jesúsen' txen gose'ene':

—Besela' beṇe' quinga cont šjaya'aque' ga že' beṇe' do ranšw na' do yež ca' dan' nychj mbi'i cont yeseyiljue' ga yesetase' na' yeseyiljue' da' yese'ej yesagüe', le' ca' nac latje gan' zoacho nga, naquen to latje daš.

<sup>13</sup> Perw na' gož Jesúsen' legaque':

—Le'e le' güe'e da' yesagüe'.

Na' gose'e le':

—Gayo'ga yetextil na' yechopga bel ya'a de checho, lete še si'chon cont gaquen yesagw yogo'lol bene' quinga.

<sup>14</sup> Gosene' ca' le že' ca gayo' mil bene' byo, bi cuent no'ol ca' len bidao'. Nach Jesúsen' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

<sup>15</sup> Nach gosone' mandadw gosebe' yogo' bene' ca',

<sup>16</sup> na' Jesúsen' gwxi'e gayo' yetextilen' na' chope bel ya'ana', na' gwne'e yabale, be'e yeła' choxcen che Diosen' na' bzojjen' na' be'en bene' šižinw ca' cont goso'e che to to bene' ca'.

<sup>17</sup> Na' gosagüen' ca gosljde'. Nach bososše'e šižinw žome len yetextil bixjw na' len late' güeje bel da' bega'an.

*Pedron' gwne' Jesúsen' naque' bene' gwsela' Dios  
(Mt. 16:13-19; Mr. 8:27-29)*

<sup>18</sup> Na' gozac yeto, bene' ca' zjanaque' Jesúsen' txen zjanite' len le' lchojiže, na' Jesúsen' chol güiže' Diosen'. Nach gože' legaque':

—¿Bi chesena bene'? ¿Non' naca' neda'?

<sup>19</sup> Na' gose'e le':

—Bale' chesene' naco' da' Juan ben' bzoe' bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' yeto bene' be' xtiža' Diosen' cani' ben' ba beban ladjo bene' guat ca'.

<sup>20</sup> Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

*Jesúsen' gwduxjue'ede' gate'*  
(Mt. 16:20-28; Mr. 8:30-9:1)

<sup>21</sup> Nach Jesúsen' gože' legaque' nono yese'e naque' ben' gwlej Diosen' cont yedenabi'e.

<sup>22</sup> Na' gože' legaque':

—Da' zan da' saca'zi'a, neda' naca' ben' gwsela' Dios golja' benach. Na' bene' gole blao ca' chesen-  
abia' naciön chechon' na' bxoz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

<sup>23</sup> Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyala' cuejyichj cuine' yogo' ža, la'czla' saca'zi'e, na' gone' can' nia' neda'.

<sup>24</sup> Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocanē.

<sup>25</sup> ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocanē?

<sup>26</sup> Na' note'tez bene' še cheto'ede' par ye'e lježe' chejnilaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che ben' zjanac angl che'.

27 Da' li žia' le'e, balle nita'le nga na'a bina' gatle cate' žin ža le'ele gwlo'e Diosen' yela' gwnabia' chen'.

*Jesúsen' goque' ca to be'ni'*

*(Mt. 17:1-8; Mr. 9:2-8)*

28 Nag goc to xman gwna Jesúsen' ca', gwyeje' to lo ya'a jel güiže' Diosen' na' gwche'e Pedro len Juan len Jacobo.

29 Na' šlac chol güiže' Diosen' goc cho'alagüen' ca da' bža'. Na' xalanen' beyaquen' šiš xila' na' goctiten.

30 Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bosošaljlene' le'.

31 Goso'e diža' gosene' ba zoa gat Jesúsa' Jerusalén. Na' be'ni' che Diosen' gwyečhjen bseñin' legaque'.

32 Na' Pedron' len bene' ca' yečhope leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choe'lene' da' Moisésen' len da' Elíasen' diža'.

33 Na' cate' ba cheza' da' Moisésen' len da' Elíasen', Pedroa' gože' Jesúsen':

—jMaestrw, leca güenna' zoacho nga! Gonto' šone ranšw, to chio', to che Moisés, na' yeto che Elías.

Con gwne' ca' sin ca bene' xbab.

34 Ne' choe'te Pedron' diža' cate' to bejw gwyečhjen legaque' na' besežebe' lagüe dan' goc ca'.

35 Na' lo' bejon' gosende' gwne Diosen', gwne':

—Benga Xi'ina' ben chacda'. Le gwzenag che'.

36 Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan'



ba gosende' na' dan' ba besele'ede'. Con gosenita'teze' šižize.

*Beyon Jesúsēn' to bi' gwyo'o gwyaz da' xigüē'*  
(Mt. 17:14-21; Mr. 9:14-29)

<sup>37</sup> Na' beteyo cate' ba besyeyetje' ya'ana' bene' zan jasešague' legaque' gan' nite'na'.

<sup>38</sup> Na' toe' gwne' zižje, gože' Jesúsēn':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'.

<sup>39</sup> Chniz da' xigüēn' lebe' na' la' chgosya'aten lebe', chonen cont chazbe' šon na' cont chžia bžina' cho'abe' na' chonen lebe' zi', na' cane chsanen lebe'.

<sup>40</sup> Ba gota'yoeda' bene' ca' zjanaque' le' txen cont yesyebeje' da' xigüēn' yo'o nyazbe', perw bitw gosezaque'de'.

<sup>41</sup> Nach Jesúsēn' gože' bene' ca' že' na':

—iLe'e bene' bi chejnilaže', chonchguale clele! ĵšna chyažjen soalena' le'e cont šejnilaže'le? ĵBatca' zelao na'lagua' le'e?

Nach gože' xa bidao'na':

—Ben bidao' chion' nile.

<sup>42</sup> Na' šlac zjasane'be' lao Jesúsēn', da' xigüēn' benen cont gwyazbe' šon, na' bchix btolen lebe' lo yo. Na' Jesúsēn' gwdile' da' xigüēn' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'.

<sup>43</sup> Na' yogo' ben' že'na' besyebande' cate' besele'ede' yela' guac che Diosen'.

*Da'yoble Jesúsēn' gwdixjue'ede' gate'*  
(Mt. 17:22-23; Mr. 9:30-32)

Na' besyebande' che yogo'lol dan' chon Jesúsén', na' šlac nite' ca', Jesúsén' gože' beñe' ca' zjanaque' le' txen:

<sup>44</sup> —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwsela' Diosen' golja' benach.

<sup>45</sup> Perw legaque' bitw gosejni'ide' diža' dan' be' Jesúsén', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

*Gosacyože' noe' nacch blao*

*(Mt. 18:1-5; Mr. 9:33-37)*

<sup>46</sup> Na' beñe' ca' zjanaque' Jesúsén' txen gosacyože' noe' nacch blao.

<sup>47</sup> Jesúsén' gocbe'ede' xbab dan' chesonen', na' beñue' to bidao' na' bzeche'be' cuite'na'

<sup>48</sup> na' gože' legaque':

—Note'teze beñe' chone' güen len to bidao' ca bi' nga neche da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwsela' neda'. Na' note'tez le'e cate' chonle xbab che cuinle bibi zaca'teclé, canan' ba nacle beñe' blao.

*Beñe' bi chon contr chio' txenczen' chone' len chio'*

*(Mr. 9:38-40)*

<sup>49</sup> Nach Juanna' gože'ne':

—Maestrw, bežagto' to beñe' cho'e lao' na' chebeje' da' xigüe' da' yo'o nyaz beñe'. Na' bžonto' gone' ca', le bi chone' chio' txen.

<sup>50</sup> Nach Jesúsén' gože'ne':

—Bitw gwžonle gone' ca', le še to bene' bi chone' contr chio', txenczen' chone' len chio'.

*Jesúsen' gwdile' Jacobo len Juan*

<sup>51</sup> Na' lagüe' ba zoa bagwze yezi' yeca'a Diosen' le', bechoglaže' šje' Jerusalén.

<sup>52</sup> Na' gwsele' to chope bene' gosebialao lagüe'na'. Na' ja'aque' to yež gan' mbane distritw Samaria cont šjasesini'e gan' soa Jesúsen' len bene' ca' zjanaque' le' txen.

<sup>53</sup> Perw bene' Samaria ca' bi bosolebe' Jesúsen' len bene' ca' nžague', le gosache'ede' zja'aque' Jerusalén.

<sup>54</sup> Na' chope bene' ca' zjanaque' Jesúsen' txen, Jacobon' len Juanna', cate' besele'ede' can' goson bene' Samaria ca', nach gosenabde' Jesúsen':

—Maestrw, ¿che'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen bene' qui?

<sup>55</sup> Nach Jesúsen' gwyechje' gwdile' legaque' gwne':

—Le'e bitw nezele non' chnabia' yichjlažda'ole.

<sup>56</sup> Neda' bitw za'a cont gwžiaya'a benach, san za'a cont gwnežjua'ne' yela' mban toli tocané, neda' naca' ben' gwseła' Diosen' golja' benach.

Nach ja'aque' yež yoble.

*Can' gož Jesúsen' bene' ca' gosaclaže' yesaque' le' txen*

*(Mt. 8:19-22)*

<sup>57</sup> Šlac zja'aque' na', to bene' gože' le':

—Sa'lena' le' gate'teze šjo'.

<sup>58</sup> Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwseła' Diosen' golja' beṇačh.

<sup>59</sup> Nach Jesúsen' gože' yeto beṇe':

—Yo'o len neda'.

Perw bena' gože' le':

—Xana', za' got xa'. Beṇšca latje zgua'tec šjaycuaša'ne'.

<sup>60</sup> Na' gož Jesúsen' le':

—Beṇe' ca' zjanac yichjlažda'ogüe' ca che beṇe' guat, legaque' guacze yosocuaše' yezica'chle beṇe' guat. Perw le', jatixjue'e beṇe' Diosa' nabi'e yichjlaždao' beṇe' yosozenague' che'.

<sup>61</sup> Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxna'a len diaža chia'.

<sup>62</sup> Jesúsen' gože' le':

—Beṇe' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to beṇe' chṇe'e coscože'le šlac chgua'ane' go'n.

## 10

*Jesúsen' gwsele' gayonši beṇe' šjasedixjue'ede' xtiže'*

<sup>1</sup> Na' gwdechle Xancho Jesúsen' gwleje' yegayonši beṇe' na' bene' mandadw yesebialagüe' šja'ac chope güeje' to to yež ga za' šej le'.

<sup>2</sup> Na' cate' za' yesa'aque' gože' legaque':

—Chyažje beṇe' zan yeseyixjue'ede' xtiža' Diosen', perw to chopga beṇe' nita' yeseyixjue'eden'. Na' beṇe' yosozenag che Diosen'

zjazaca'lebe' ca to coseš xen da' chyažje yedobe. Da'nan' le nabe Xancho Diosen' sela'che' bene' yesaclene' chio' yotobcho coseš čhen'.

<sup>3</sup> Le šja'ac, le neda' chsela' le'e šjatixjue'ele xtižen' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo.

<sup>4</sup> Bitw gua'le bzod, ne mechw, ne yel, na' bi šele guaple bene' tiox bene' yežagle chanez.

<sup>5</sup> Note'tez liž šo'le zgua'tec nale: “Chnablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.”

<sup>6</sup> Na' še zoa to bene' chaclaže' soa cueze' binlo len yichjlažda'ogüe'na', nach gac can' gwnablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwnablaže'len'.

<sup>7</sup> Na' lo' yo'o na'teze yega'anle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to bene' güen žin cheyala' si' laxjue', lecz ca' le'e zaca'le yesone' da' ye'ej gagwle.

<sup>8</sup> Na' cate' žinle to yež ga chesonxene' le'e, le ye'ej le gagwteze da' yesone' le'e.

<sup>9</sup> Le yeyon bene' güe' bene' nita' yež gan' žinle, na' le' ye'e: “Ba bžin ža gwzenagle che Diosen' cont nabi'e yichjlažda'ole.”

<sup>10</sup> Perw na' cate' žinle to yež ga bi yosolebe' le'e, le šja'ac la cay na' le ye'e:

<sup>11</sup> “Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen'.”

<sup>12</sup> Da' mal xen goson bene' ciuda Sodoma cani',

perw žia' le'e, žan' gac juisyw beṇe' ca' bi bosolebe' le'e ližen', yesale'chde' clel ca beṇe' Sodoman'.

*Beṇe' ca' bi chosozenag xtiža' Jesúsen'*

*(Mt. 11:20-24)*

<sup>13</sup> Nach gozna Jesúsen':

—jNyaše'chguaze gac che le'e beṇe' Corazín! jNyaše'chguaze gac che le'e beṇe' Betsaida! Beṇe' ca' nita' Tiro na' Sidón ba' besyetiṇjde' xtoḷa'gaque' šaca' blo'egacda'ne' yeḷa' guac chia' ca da' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e beṇe' ba boša' yichjlažda'ogüen'.

<sup>14</sup> Saca'zi'chle clel ca beṇe' že' Tiro na' Sidón cate' žin ža gac juisyw.

<sup>15</sup> Le'e nita'le yež Capernaum chonle xbab šeca Diosen' gonchgüe' le'e yeḷa' bala'an. Bi gone' le'e yeḷa' bala'an san gone' le'e castigw toḷi tocaṇe dan' bi chejle'le chia'.

<sup>16</sup> Nach Jesúsen' goze'e beṇe' gayonši ca':

—Beṇe' gwzenag xtiža'len' lecze gwzenague' xtiža'na', na' beṇe' goncze yichjlagüe' bi gwzenague' xtiža'len', lecze bi gwzenague' chia' neda'. Na' beṇe' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwseḷa' neda'.

*Besyěžin beṇe' gayonši ca'*

<sup>17</sup> Beṇe' gayonši ca' cate' beyož jasedixjue'ede' xtiža' Jesúsen', besyěžine' gan' zoen' na' besyebchgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandaw yesyechojen lo' yichjlaždao' bene' choe'to' lao'.

<sup>18</sup> Na' gože' legaque':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'.

<sup>19</sup> Ba beña' le'e yela' guac cont gwlej gwšošjle no bel znia na' no bexjoni' na' cont soele Satanásen' bi gonon le'e gan. Na' bibi de da' gonon le'e zi'.

<sup>20</sup> Perw bi yebele neche da' xigüen' chosozenaguen chele, san le yebe da' ba bzoj Diosen' lale le'e libr gan' nyoj la yogo'lol xi'ine' ca'.

### *Bebechgüe Jesúsen'*

*(Mt. 11:25-27; 13:16-17)*

<sup>21</sup> Za' beyožte gwna Jesúsen' ca' nach ben Spiritw che Diosen' cont bebechgüede' na' bol güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela' choxclen chio' ba bzejni'ido' bal bene'. Ba bzejni'ido' bene' ca' gosacbe'ede' cheseyažjde' no gwsed gwlo'e legaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. Beno' ca' Xa', le can' gwyazlažo'.

<sup>22</sup> Nach gože' bene' ca' že'na':

—Xan' ba bene' lo na' chona' cont chombia' bene' le'. Le' nombia'yañe' neda', na' neda' nombia'yaña' le'. Na' bene' ca' ba gwleja' ba zjanombi'e Xan'. Na' nono nochle zjanombia' Xa' ñe neda'.

<sup>23</sup> Na' gwyechj Jesúsen' gwñe'e bene' ca' zjanaque' le' txen na' gože' legaque':

—Mbachgua zoale chle'ele neda' na' chle'etele da' ca' chona'.

<sup>24</sup> Na' chnia' le'e zan be<sub>ne</sub>' ca' goso'e xtiža' Diosen' cani' len be<sub>ne</sub>' zan rey gosac<sub>la</sub>že' yesele'ede' dan' chle'ele na'a, perw bitw go<sub>la</sub>' yesele'eden', na' gosac<sub>la</sub>že' yesende' dan' chenelen', perw bitw go<sub>la</sub>' yesenden'.

*Jempl che to be<sub>ne</sub>' güen, be<sub>ne</sub>' Samaria*

<sup>25</sup> Na' gwzoža' to be<sub>ne</sub>' nsedchgüe' ley dan' bzoj da' Moisés, goc<sub>la</sub>že' cueje' Jesúsen' diža' da' gw<sub>ch</sub>ine' contr le' na' gože'ne':

—Maestrw, ¿bi da' cheya<sub>la</sub>' gona' cont gata' yela' mban chia' to<sub>li</sub> toca<sub>ne</sub>?

<sup>26</sup> Na' gož Jesúsen' le':

—¿Bi nyoj le'e ley<sub>na</sub>'? ¿Nac žan?

<sup>27</sup> Na' ben' chejni'ichgüe' ley<sub>na</sub>' boži'e xtiža' Jesúsen', gože' le':

—Ley che Diosa' žan: “Cheya<sub>la</sub>' gaquecho Xancho Diosen' con ca zelao chejni'icho, do yichj do laže'cho, do fuers valor checho, na' gaque lježcho ca chaque cuincho.”

<sup>28</sup> Nach gož Jesúsen' le':

—Da' licze can' ba gw<sub>nao</sub>'na'. Can' cheya<sub>la</sub>' gono' cont bano' to<sub>li</sub> toca<sub>ne</sub>.

<sup>29</sup> Na' bena' goc<sub>la</sub>že' gwlo'ede' choncze' can' ža ley<sub>na</sub>', na' gože' Jesúsen':

—¿Non' nac be<sub>ne</sub>' lježa' ben' cheya<sub>la</sub>' gacda'?

<sup>30</sup> Na' Jesúsen' gože' le':

—To be<sub>ne</sub>' beza' Jerusalén par yežine' yež Jericó, jasyexen be<sub>ne</sub>' gwban le'. Na' goseyine' xalane' na' gosot goseyine' le'. Nach besyeya'aque' bosocua'a<sub>ne</sub>' le' cacze to be<sub>ne</sub>' guat.



31 Na' to b̄xoz c̄he bene' Israel ca' gwdie' lo neza', na' cate' ble'ede' bena' dena', nach gwcuae' to šla'ale neza' na' con gwdeze'.

32 Lecz ca' ben to diaža c̄he da' bene' Leví ca'. (Xi'ĩn diaža c̄he da' Leví yo'o lo na'gaque' chesone' mandadw lo' yodao' blao.) Bena' zeje' tnez na' cate' ble'ede' ben' dena', na' gwcuae' to šla'ale neza' na' con gwdeze'.

33 Nach to bene' Samaria ngüe'e neza' nlague' xpurrue' na' bžine' gan' de bena', perw na' le' cate' ble'ede' ben' beyaše'laže'.

34 Na' gwbigue' gan' de' na' bene' le' rmed, bšone' set len vino lao güe' c̄he'na' na' b̄c̄hejen' lache'. Na' božie' le' cože' xpurrue' na' beče'e le' ga zoa to mesón ga gwñe'e le'.

35 Na' beteyo cate' beza' bene' Samaria, gwleje' mechw da' zaca' ca' chop ža žin na' bnežjuen' xan mesónna' ca' laxjue', na' gože' le': "Gwñna' benga na' še žan bichle da' gono' gastw na' chixjuan' cate' zeza'a."

36 Beyož be' Jesúsen' diža' can' goc c̄he ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone' gocde'ne' ca' bene' lježe'?

37 Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecz ca' cheyała' gono' le', yeyaše' yeži'ilaže'do' yogo'lol bene'.

*Jesúsa' jañe'e Marta na' María*

38 Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyeje' liže'na'.

39 Na' zoa to bile' le María. Na' Marían' gwchi'e cuit Jesúsen' bzenague' xtiže'na'.

40 Perw na' Martan' belalchgüede' bsini'e da' yesagüe'. Na' gwyeje' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

41 Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan.

42 María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyala' gonle.

## 11

*Jesúsen' blo'ede' can' yosol güiže' Diosen'*

*(Mt. 6:9-15; 7:7-11)*

1 Na' gwzoo Jesúsa' to latje chol güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyala' yol güižto' Diosen', can' bzejni'i da' Juanna' bene' ca' gosaque' txen len le'.

2 Na' Jesúsen' gože' legaque':

—Cate' yol güižle Diosen', quinga nale:

Xato' bene' zoa yaba,

chnabto' yogo'lol bene' yesonxene' le'.

Zelaže'to' nabi'o yichjlaždao' yogo' neto' benach.

Gacšca can' chazlažo' yežlio nga can' chac yabana'.

3 Ca nac dan' che'ej chagwto' tža tža, benšca cheto' na'a.

<sup>4</sup> Na' bezi'xenšca cheto', le lencze neto' chezi'xento'  
 che ljež beṅachto' bite'tez da' chesonde'  
 neto'.

Na' bitw go'o latje soa da' gwžigan' neto' gonto' da'  
 mal,

san bcuase bcue'ejšca neto' len da' mala'.

<sup>5</sup> Nach gož Jesúsen' legaque':

—Le gon xbab še šejle liž beṅe' migw chele do  
 chel na' ye'lné: “Migw chia', beṅšca neda' šone  
 yetextil.

<sup>6</sup> Ba bla' to beṅe' migw chia' beṅe' za' zito', na'  
 bibi de chia' da' gua'ane' gagüe.”

<sup>7</sup> Na' chixe še migw chelen' yo'e lo' yo'ote yoži'e  
 xtiža'len': “Bitw gondo' neda' zed, le ba nyeyjw  
 cho'a yo'o na' ba deto' chtasto' len bi' cheto' ca'. Bi  
 gac chasa' goṅa' dan' chyažjdo'.”

<sup>8</sup> Chnia' le'e, la'czla' naque' migw chele, bitw  
 ye'nde' chase' goṅe' dan' chyažjele, perw še  
 gata'yoelne' sša na' chasšaze' goṅe' bite'tez da'  
 chyažjele.

<sup>9</sup> Na' chnia' le'e, še žan bi da' chyažjecho,  
 chṅabchon. Še žan to da' chaclaže'cho želecho,  
 chyiljwchon. Še žan chaclaže'cho saljw beṅe' cho'a  
 yo'o che', na' necho cho'a yo'on cont saljue'. Na'  
 ca'cze cheyała' ye'le Diosen' cate' bi da' chyažjele o  
 bi da' chaclaže'le gone'.

<sup>10</sup> Na' note'tezle še bi da' nabelene', goṅczen'.  
 Na' še bi dan' che'nele gwzejni'ide' le'e, gwze-  
 jni'iczen'. Na' note'tezle še žan chaclaže'le gac to  
 da' gac, yol güižle Diosen' can' chon to beṅe' chṅie'  
 cho'a yo'o, nach Diosen' gone' cont gacczen.

11 'Na' le'e nacle xa bidao', še xi'inle nabebe' le'e yetextil, ĩgwnežjwlebe' to yej? Na' še nabebe' le'e yid bel gagwbe' ĩgwnežjwlebe' to be xigüe'?

12 Na' še nabebe' le'e to žit gagwbe' ĩgwnežjwlebe' to be xjoni'? Cabi gonle ca'.

13 La' nacle bene' mal, nezzele gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw chen' soan lo' yichjlaždao' bene' chñab len.

*Gosene' Jesúsen' bebeje' da' xigüe' len yela' guac che Beelzebú*

*(Mt. 12:22-30; Mr. 3:19-27)*

14 Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc benie'. Na' bene' ca' že'na' besyebanchgüede'.

15 Perw bale' gosene':

—Beelzebú dan' chnabia' da' xigüe' ca' chacle-nen le' cont chebeje' da' xigüe' zjayo'o zjanyaz yichjlaždao' bene'.

16 Na' yebale' cont gosagüe' xya che' gosenabde'ne' gone' to yela' guac da' yesele'ede'le'e yaban' cont yesenezde' še da' licze Diosa' gwsele'le'.

17 Perw Jesúsen' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gobiernna' bi sibi'e. Na' še bene' to lo' yo'o yesechoje' chople na' yesedile' legacze', gague sša yesenite' txen.

18 Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chacle-nen neda' cont chebeja' da' xigüe' zjajo'o zjanyaz yichjlaždao' bene'.

19 Šaca' naquen can' žalen', lecze zejen dan' chnabia' da' xigüe' ca' chacle-nen bene' lježle ca' chesyebeje' da' xigüe' zjajo'o zjanyaz yichjlaždao' bene'. Bene' lježle ca' yese'e le'e cleden' žale.

20 Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

21 'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'.

22 Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len bene' migw che' ca'.

23 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

*Da' xigüe'na' yeyo'on da' yoble lo' yichjlaždao' bene'*

*(Mt. 12:43-45)*

24 'Na' še to da' xigüe' da' gwyo'o gwyaz lo' yichjlaždao' bene' yechojen, nach lažen nile na'le yeyiljon ga soan mbalaz. Na' še bibi latje želen, nach nan: "Da' yoblecze šjajo'a lo' yichjlaždao' ben' gan' ba gwyo'a."

25 Nach yeyejen da' yoble gan' zoa ben'. Cate' le'en ba<sub>ch</sub> cheyone' güen, na' ba zoache' bin<sub>lo</sub>,

26 nach šjaytoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še ba<sub>ch</sub> goc ca', gacch mal che bena' clel ca dan' ba goc che' da' nechw.

*Mbalaz nita' be<sub>ne</sub>' ca' chosozenag xtiža' Diosen'*

27 Šlac be' Jesúsen' diža' quinga, gwzoa to no'ole gachol be<sub>ne</sub>' ca' že' gan' bsed blo'ede', na' no'ola' gw<sub>ne</sub>' zižje, gože'ne':

—Mbalaz zoa no'ola' gw<sub>xan</sub> le' na' bguaže' le'.

28 Perw na' Jesúsen' gože'ne':

—Nacchxe mbalaz nita' be<sub>ne</sub>' ca' chosozenag xtiža' Diosen' na' chesone' can' žanna'.

*Be<sub>ne</sub>' bi chosozenag che Diosen' chese<sub>nabe</sub>' gon Jesúsen' to yela' guac*

*(Mt. 12:38-42; Mr. 8:12)*

29 Na' be<sub>ne</sub>' zan gosebigue' gose<sub>chj</sub>de' Jesúsen', nach Jesúsen' gw<sub>ne</sub>':

—Le'e zoale na'a nacchgualé be<sub>ne</sub>' laždao' xi'a. Ch<sub>n</sub>able gona' yeto yela' guac da' le'ele cont nezele še Diosa' gwse<sub>le</sub>' neda', perw bi gona' ca dan' ch<sub>n</sub>abléna', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' can'.

30 Na' ca dan' goc che Jonásen' blo'en be<sub>ne</sub>' Níneve ca' Diosen' gwse<sub>le</sub>' le', ca'cze dan' gac chia' gwlo'en le'e zoale na'a Diosen' gwse<sub>le</sub>' neda' golja' be<sub>n</sub>a<sub>ch</sub>.

31 Cate' žin ža gon Diosen' castigw che yogo'lol be<sub>ne</sub>' cheson da' mal, da' no'olen' gwnabi'e be<sub>ne</sub>' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont

bedezenague' diža' sina' dan' be' da' rey Salomón len le', na' neda' zoa' nga naccha' beṇe' blaoch ca da' Salomón na' bitw chzenagle chia'.

<sup>32</sup> Na' cate' žin ža gon Diosen' castigw che yogo'lol beṇe' cheson da' mal, lecze žana' yesyeban beṇe' Nínive ca' na' yosocuiše' le'e nita'le ža na'aža. Le legaque' besyetiṇjde' xtola'gaque' cate' da' Jonásen' gwduxjue'ede'ne' can' gwna Diosen'. Na' neda' zoa' nga naccha' beṇe' blaoch ca da' Jonása' na' bi chzenagle chia'.

*Dan' bsed blo'e Jesúsen' naquen ca to yi'*  
(Mt. 5:15; 6:22-23)

<sup>33</sup> 'Notno gwguala' to yi' na' gw dosen' caj, na' neca gwcuāšen' ga yoble ga nono le'e len, san chde'en le'e ze'e cont gwsen'in' len yogo'lol beṇe' yeso'o lo' yo'ona'.

<sup>34</sup> Žia yejlaocho cont le'echo. Con še bibi chaquen chle'eczecho binlo. Perw še ncholcho, bi chle'echo. Ca'czen' naquen len yichjlažda'ochon'. Še naccho beṇe' laždao' güen, yo'o be'ni' che Diosen' lo' yichjlažda'ochon'. Perw še naccho beṇe' mal, chol nac yichjlažda'ochon'.

<sup>35</sup> Da'nan' le gon cont gacle beṇe' laždao' güen, na' šo' be'ni' che Diosen' yichjlažda'ole.

<sup>36</sup> Še nyeni' yichjlažda'olen' na' bibi da' mal yo'on, gwseni'czen xnezele can' chseni' to yi' ga nac chol.

*Jesúsen' gože' beṇe' fariseo ca' zjanape' doła' na' len beṇe' ca' chososed chosolo'e ley*  
(Mt. 23:1-36; Mr. 12:38-40; Lc. 20:45-47)

<sup>37</sup> Cate' beyož be' Jesúsen' diža' quinga, to beṇe' fariseo gwche'e le' liže' cont yesagüe'. Na'

gwyo'o Jesúsén' liž bene' fariseon' na' gwchi'e cho'a mesen'.

<sup>38</sup> Na' bene' fariseon' bebande' ble'ede' bitw bona' Jesúsén' cate' za' gagüe' can' cheson legaque' chesacde' chebe Diosen' legaque' dan' chesone' ca'.

<sup>39</sup> Na' Xancho Jesúsén' gože' le':

—Le'e bene' fariseo nacle ca xiga' ye'en da' chchin bene' na' chyibe' cožen' binlo perw bi chyibe' do lo'en. Chonle cont chesaque bene' nacle bene' güen, perw chebele chca'ale bi da' de che bene' na' nacle bene' mal juisyw.

<sup>40</sup> Biczé bi chejni'ile. Chi' yichjle gacle xilaže' len cuerp chelen'. Lecz ca' cheyala' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'.

<sup>41</sup> Le yeyaše' bene' na' le gwnežjo bi da' cheseyažjde'. Še gonle ca', nacia' nacle bene' laždao' xilaže'.

<sup>42</sup> 'iNyaše'chguaze gac che le'e bene' fariseo! La'czla' chnežjwle Diosen' to part lao ši part che yixe'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

<sup>43</sup> 'iNyaše'chguaze gac che le'e bene' fariseo! Chze-laže'le cue'le lo' yodao' txen len bene' blao ca', na' cate' chejle do gan' chac ya'a chaclaže'le yesonxen bene' le'e.

<sup>44</sup> 'iNyaše'chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nacia' gan' xoa ba che bene' guaten', le



ley chechon' žan zjanaquen zban na' bi cheyala' gwlejchon. Perw le'e nacle ca ba da' bi zjanachia'. Chosozenag bene' chele na' bi chesache'ede' nacle bene' laždao' zban.

<sup>45</sup> To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

<sup>46</sup> Na' gož Jesúsen' legaque':

—Lecze ca' le'e chsed chlo'ele ley da' bzoj da' Moisés, įnyaše'chguaze gac chele! Da' žale da' zan da' cheyala' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

<sup>47-48</sup> 'įNyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani'! Chacle toze len da' xozxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

<sup>49</sup> 'Da'nan' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle bale' na' gwchi gwsaca'le yebale'.

<sup>50</sup> Na' da' li ba chonle can' gwnen'. Da'nan' si'le castigw che yela' got che yogo' bene' ca' gosoe' xtižen' gwzolaon caten' gwxete yežlion' chžinten ža na'aža.

<sup>51</sup> Zan bene' gosot bene' yoble legaque' gwzolaon len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chyo'o yodao' gan' chesote' beyixe' cont chesonxene' Diosen'.

Na' le'e mban<sub>le</sub> na'a si'le castigw che yela' got che yogo' bene' ca'.

<sup>52</sup> 'iNyaše' chguaze nac le'e chsed chlo'ele ley che Diosen! Bitw chzejni'ile bene' leyna' to licha can' naquen, neca chzenagle chen. Na' bene' chesaclaže' yosozenaguen', neca choe'le latje yosozenaguen'.

<sup>53</sup> Na' cate' beyož be' Jesúsén' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža'

<sup>54</sup> le gosaclaže' choj dižan' cho'e da' yosode'ede' yesagüe' xya che'.

## 12

### *Yela' güexoayag che bene' fariseo*

<sup>1</sup> Na' goc zan mil bene' besežague' gan' zoa Jesúsén', catec bene' zan besežag bosolej bosošošte ni'a lježe'. Na' Jesúsén' zgua'tec gwzologüe' be'e diža' len bene' ca' zjanaque' le' txen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gon<sub>le</sub> can' chesonen'.

<sup>2</sup> Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'.

<sup>3</sup> Da'nan' bite'teze da' gwnale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

*Non' cheyalá' žebcho  
(Mt. 10:28-31)*

4 'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e.

5 San zoa ben' cheyala' žeble, cheyala' žeble Diosen', le cate' bačh beque'e yela' mban chele, lecze nape' yela' chnabia' cont yesele' le'e gabil. Da' yoble chnia' le'e, cheyala' žeble Diosen'.

6 'Nezecho byin dao' ca' bibi zjazaca'tecba', perw na' Diosen' ne toba' bi chanlaže'.

7 Na' ca' nac chio', da' leca chaque Diosen' chio' neztede' bal yiša' yichj to tocho žia. Da'nan' bitw žeble, le zaca'ch le'e clal ca' yogo' byin dao' ca'.

*Cheyala' ye'cho bene' nombia'czcho Jesucriston'  
(Mt. 10:32-33; 12:32; 10:19-20)*

8 'Na' chnia' le'e, note'tez bene' še cho'e diža' len beñačen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' beñačh.

9 Na' note'teze bene' še cho'e diža' len beñačen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque neda' txen.

10 'Na' note'teze bene' še ne' yela' ya' chia' neda' naca' ben' gwsela' Diosen' golja' beñačh, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

11 'Na' cate' yeseche'exoxje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale.

12 Lo hor na'teze gwzejni'i Spiritw che Diosen' le'e bin' cheyała' nalen'.

*Bitw cheyała' cuec yichjcho tlaoze bi da' de checho*

13 To bene' bchoje' ladjo bene' zan juisyw ben' zjanžag na', na' gože' Jesúsen':

—Maestrw, gonšco' mandadw cont bene' bišan' gone' neda' bien che da' xaxna'to' da' cheyała' si'a.

14 Na' Jesúsen' gože' le':

—Bitw naca' neda' juez chele. Bi cheyała' gua' neda' laze da' de chele.

15 Nach gože' yogo'lol bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

16 Na' be'lene' legaque' to jempl, gwne':

—To bene' gwni'a gocchgua coseš che',

17 na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwže'šagua' coseš chian'.”

18 Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'.

19 Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.”

20 Perw Diosen' gože' bena': “Chono' xbab da' bibi zaca'. Na'aže' bžin hor gato', na' ¿nola lo na' gac yogo' da' de chio'?”

21 Can' gac che note'tez be<sub>ne</sub>' še con chbec yichje' tlaoze da' de che' šlac mbane' na' bi chone' da' chazlaže' Dios.

*Diosen' chapši'e xi'ine' ca'*

*(Mt. 6:25-34)*

22 Na' gož Jesúsen' be<sub>ne</sub>' ca' zjanaque' le' txen:

—Da'nan' žia' le'e, bi gacžejlaže'le bi da' gagwle šlac mbanle, na' lecz ca' bi gacžejlaže'le che xałana'le.

23 Zaca'ch yela' mban chelen' ca yela' guagw. Lecze ca' cuerp chelen', zaca'chen ca xałana'le.

24 Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu' no goš chegacba' ga že' da' yesagwba', perw na' Diosen' chguagwcze'ba'. ¡Nacchle zaca' le'e ca be ca' zjažia xil!

25 Na' ne tole bi gac yoston cuinle gašje metr še con cue' yichjle tonle.

26 Nezele bitw gac yoston cuinle, na' neca naquen da' zaca'. Da'nan' bi gacžejlaže'le che bica'chle da' chyažjele.

27 'Le gon xbab ca nac yej ca' da' zjaze yixe'. Chesecha'oczen, bibi žin chesonen, neca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xałane'na' ca yela' xdan che yej ca'.

28 Diosen' none' xdan da' ca' ze yixen' la'czla' to chop žaze nitan' na' chosozeyen'. ¡Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'!

29 Da'nan' bitw güe'laže'le cont gata' da' ye'ej da' gagwle. Bitw gacžejlaže'le chen.

30 Bene' ca' bi chesonxene' Diosen' con chesoe'laže' che bi da' gata' yese'ej yesagüe' na' che xalana'gaque'. Perw Xacho Diosen' nezczede' bi da' ca' chyažjele.

31 Cheyala' güe'laže'le gwzenagle che Diosen' cont nabi'e yichjlažda'olen', na' yogo' da' ca' chyažjele, goncze Diosen' len.

*Da' zaca'ch gata' checho yežincho yaba  
(Mt. 6:19-21)*

32 'Bitw žeble la'czla' nac to chople. Diosen' chbede' chnabi'e yichjlaždao' le'e chzenagle che' na' chaclene' le'e.

33 Le yeyote' da' de chele cont gata' da' gwnežjwle bene' ca' cheseyažje. Še gonle ca', Diosen' gone' le'e da' zaca'ch na' da' cbi te chen cate' yežinle yaba gan' zoe'na'. Na' bitw gac šo' bene' gwban que'en, na' neca gac šo' be dao' gwžiai' len.

34 Gan' de dan' chaquele nan' zoa yichjlažda'olen'.

*Cheyala' soa cuezcho batcan' yide Criston' yeto*

35-36 'Le soa le cueze batcan' yida' yeto. Le soa can' nita' bene' chesape' liž xangaquen' šlac zeje' to yela' güešagna'. Zjanyaz xalana'gaque' na' chala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e.

37 Mba gac che bene' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yese'ej yesagüe'.

38 Mba gac chegaque' še chesebeze' batcan' yežine' la'czla' yežine' do chel o do šbal.

39 Le gon xbab che da' nga. Šaca' neze xan yo'on baten' žin bene' gwban liže'na', le gwna'ze' cont bi güe'e latje šo' bena' liže'na' cuane' xšinlazen'.

40 Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwsela' Diosen' golja' benach.

*Mos ben' chon güen, na' mos ben' bi chon güen  
(Mt. 24:45-51)*

41 Pedroa' gože' Jesúsen':

—Xanto', ¿cho'o jempl nga par neto'ze o še par yogo'lol benach?

42 Nach gož Xanchon' Pedroa':

—Naquen par note'tez bene' še chone' can' chon mos blao ben' chejni'i, ben' chon can' cheyala' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'.

43 Še to bene' mos chonteze' can' ben xanen' mandadw gone', mba soe' cate' yežin xanen'.

44 Da' li chnia' le'e, xanen' cue'e lo na' mosen' yogo'lol da' de che'.

45 Perw na' še mosen' gone' xbab na' ne': “Ba gwže xanan’”, na' solagüe' got chine' mosa' yezica'chle na' ye'ej gagwxate' na' sožde',

46 nach xane'na' yežine' to ža senyale' le' cate' bi gacbe'ede'. Na' da' bi chon mosen' can' cheyala' gone', xane'na' got chinchgüe' le' na' gone' cont si'e castigw txen len yezica'chle bene' bi cheson can' cheyala' yesone'.

47 'Na' mos ben' nac bene' güedenag, la'czla' ba neзде' can' che'ne xanen' gone', bi chone' ca'.

Bi zoe' chbeze' batcan' yežin x̄anen', na' da'nān' x̄anen' got chinchgüe'ne'.

48 Na' beñe' bi ñezde' bin' non x̄anen' mandaw gone' na' da'nān' chone' da' zaca' chine' le', na' x̄anen' bi chinteque' le' zi'. Note'teze beñe' zjanye'chgua xbab, chesego'o beñe' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

*Yesediñ beñe' ñeche da' bid Jesúsēn'*  
(Mt. 10:34-36)

49 Nach gwna Jesúsēn':

—Dan' zedeyena' yežlio nga naquen ca to yi' da' cuec beñe'. Na' yebeda' šaca' ba chi' yi'na'.

50 Za'a cont saca'zi'a na' gata'. Na' chžaglagua' šlac chbeza' žin ža yeyož gaquen.

51 ¿Chonle xbab beñe' že' yežlio yesezoa yesebeze' binlo len lježgaque' ña'a dan' ba bidan'? Chnia' le'e, bi yesezoa yesebeze' binlo len lježgaque' ña'a ba bida', san yesediñe' na' yosošaše'.

52 Quinga solao gac ña'a, še žan nita' gayo' beñe' to lo' yo'o, yesediñ legacze', chope' contr šone' na' šone' contr chope'.

53 Yesediñ beñe' byo len xi'ine' na' xi'ine' len le'. Na' yesediñ no'olen' len xi'ine' no'ole, na' xi'ine' no'olen' len le'. Na' yesediñ no'olen' len xo'oliže' na' xo'oliže' len le'.

*Bitw gosacbe'ede' bi zeje da' ca' chon Diosēn'*  
(Mt. 16:1-4; Mr. 8:11-13)

54 Nach lecze gož Jesúsēn' beñe' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'.



55 Na' cate' chečj be' da' za' ži'le na' žale: “Guac zeye”, na' chac zeye'.

56 Be<sub>ne</sub>' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixčhen' bi chache'ele bi zejen da' ca' chon Diosen' tiemp nga zoacho na'a?

*Cheyala' goncho cont yezoacho binlo len bene' che'e chio' lao justis*

(Mt. 5:25-26)

57 ¿Bixčhen' bi chonle xbab cont nezele can' cheyala' gonle?

58 Cate' to bene' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yososeyjue' le'e ližya.

59 Chnia' le'e bitw yebeje' le'e še bina' čixjwle doxen da' čala'le.

## 13

*Cuiayi' cho še bitw yetinjecho xtoła'chon'*

1 Na' len bene' ca' že'na' gwnita' ba<sub>l</sub> bene' gosoe'lene' Jesús'en' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xčhengaquen' len che beyixe' ca' ba gosote' cont yesonxene' Diosen'.

2 Nach boži'i Jesús'en' xtiža'gaquen' gože' legaque':

—¿Chonle xbaba' gosac čhegaque' ca' lagüe dan' gosonche' da' malech clal ca bene' Galilea ca' yezica'chle?

3 Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le.

<sup>4</sup> Nezele che bene' šino'šone ca', šlac zjanite' yež Siloé gwbi<sup>x</sup>e to campanaryw na' gwdenen legaque' na' gosate'. Ć<sup>l</sup>ecze chon<sup>l</sup>e xbab goc ca' dan' zjanac-che' bene' mal cl<sup>l</sup>e ca' bene' ca' zjaže' Jerusalén?

<sup>5</sup> Chnia' le'e, gague can'. Še le'e bi yetin<sup>j</sup>eje xto<sup>l</sup>a'le, lecze gwžin ža cate' cuiayi'le.

*Jempl che yag yixgüigw da' bibi chbia*

<sup>6</sup> Na' be'lene' legaque' jempl nga, bzejni'ide'ne' cheya<sup>l</sup>a' yesy<sup>e</sup>tin<sup>j</sup>e' xto<sup>l</sup>a'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' ja<sup>n</sup>e'e še de toga yixgüigw gagüe', perw bitw bi bželde'.

<sup>7</sup> Na' gože' ben' chape' yag che' ca': “Ba chac šon iz chedena'a yag nga še chbian yixgüigw, perw bitw bi chbian. Gw<sup>ch</sup>oguen, lažjw con zolan n<sup>l</sup>anen, na' neca bi chbiazen.”

<sup>8</sup> Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb.

<sup>9</sup> Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

*Jesúsen' beyone' to no'ole ža che Dios*

<sup>10</sup> Na' to ža che Dios bsd blo'e Jesúsen' bene' že' to lo' yodao'.

<sup>11</sup> Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdo<sup>b</sup>e cuerp che'na', na' gague gocch se' to licha.

<sup>12</sup> Na' cate' ble'e Jesúsen' le', goxe'ne' na' gože'ne':  
—No'ole, na'a yeyacdo' yižgüe' chio' nga.

<sup>13</sup> Na' gw<sup>x</sup>oa ne'e cuerp che no'ola', na' la' bezete' to licha. Na' no'ola' benxene' Diosen'.

14 Perw na' bene' gwnabia' che yodao'na' bloque' da' beyon Jesúsén' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yižgüe' chelen' perw bitw yidle ža che Dios cont yeyacle.

15 Nach Xancho Jesúsén' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle go'n chele o burr chele ga zjada'ba' chjasanlba' güe'ej nis?

16 No'ole nga naque' xi'in diaža che da' Abraham, na' Satanásén' dan' chnabia' da' xigüe' ca' benen cont ba bdohe cuerp chen' šino'šone iz. Da'nán' nacczen licha ba beyona'ne' ža che Dios.

17 Cate' gwne' ca', bene' ca' chesegue'e le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesúsén', le leca güen zjanac dan' benen'.

*Yela' gwnabia' che Diosen' naquen ca bin che xomdas*

*(Mt. 13:31-32; Mr. 4:30-32)*

18 Nach gwna Jesúsén':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'.

19 Da'nán' yela' gwnabia' che Diosen' naquen ca bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo xoze' yaga'.

*Yela' gwnabia' che Diosen' naquen ca levadura*

*(Mt. 13:33)*

20 Nach da' yoble gozne':

—Na'a n̄ia' le'e yelate' nac nac yela' gwnabia' che Diosen'.

<sup>21</sup> Naquen ca levadura dan' gwlec no'olen' len to rob yezj cont gwcha'o doxenen.

*Cheyala' chiljwlaže'cho nac goncho cont soacho binlo len Diosen'*

*(Mt. 7:13-14, 21-23)*

<sup>22</sup> Na' gwda Jesúsen' bsed blo'ede' bene' ca' že' ciuda ca' na' yež ca' gan' bedie' cont bežine' Jerusalénna'.

<sup>23</sup> Na' to bene' gože' Jesúsen':

—X̄anto', ¿con to chopze bene' šjasyenite' len Diosen'?

Nach Jesúsen' gože' legaque':

<sup>24</sup> —Chnia' le'e, bene' zan chese'nde' yesenite' binlo len Diosen', perw gwžin ža cate' bich gac yesone' cont yesenite' binlo len le'. Da' nac žialao gonle, chiljwlaže'le nac gonle cont soale binlo len Diosen'

<sup>25</sup> cont bi gone' len le'e ca ben to x̄an yo'o cate' bžin hor gwseyjuen'. Gwzože'e bseyjue', na' gwdechle besežin bene' bososiže' le'e puert che'na' na' bich gwsaljue' cont yeso'e. Na' gose'ene': “Gwsaljwšca cont šo'to'.” Na' gože' legaque': “Bitw nombi'a le'e, neca nezda' ga za'acle.”

<sup>26</sup> Can' gac che balle. Nach solaole ye'lne': “Güe'ej gwdagwto' len le' na' bsed blo'edo' neto' la cay lažto'.”

<sup>27</sup> Perw na' da' yoble ye'e le'e: “Bitw nezda' ga bene' le'e. Le šjaya'ac yogo' le'e bene' güen da' mal.” Can' ye'e le'e.

<sup>28</sup> Na' le'ele Abraham na' Isaac na' Jacob na' yogo'lol bene' ca' gosoe' xtiža' Diosen' cani' nite'

yaba gan' zoa Diosen' chnabi'e. Na' le'e bitw gac šo'lena'. Nach cuežyaše'le na' gagwxejte layle dan' leca žaglaole cate' gacbe'ele bich gac šo'le.

<sup>29</sup> Beņe' zan beņe' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'.

<sup>30</sup> Nita' beņe' zjanaque' beņe' bzebe na'a perw gwžin ža cate' yesaque' beņe' žialao. Na' nita' beņe' zjanaque' beņe' žialao na'a, perw gwžin ža cate' yesaque' beņe' bzebe.

*Begüine' Jesúsen' neche xtola' beņe' Jerusalén ca'  
(Mt. 23:37-39)*

<sup>31</sup> Lo ža na'teze bal beņe' fariseo ca' besežine' gan' zoa Jesúsen' gose'ene':

—Cheyala' yoxonjo' nga gan' chnabia' rey Herodes, le chaclaže' gote' le'.

<sup>32</sup> Jesúsen' gože' legaque':

—Herodesen' naque' ca to beza' yela' gwxiye' chen'. Le šja'ac na' ye'ln'e' yeto chope žazen' soa' yebejcha' da' xigüe' ca' zjajo'o zjanyaz yichjlaždao' beņe' na' yeyoncha' beņe' chesacšene. Ba zoa yeyož gona' dan' cheyala' gonan'.

<sup>33</sup> Perw ca nac dan' chona' na'a gonchczan' gwxe güižj. Gague ngan' chesote' beņe' ca' chesoe' xtiža' Diosen', san Jerusalén chesote' beņe' ca'.

<sup>34</sup> 'Le'e beņe' Jerusalén, chotle beņe' ca' chesoe' xtiža' Diosen' na' ca nac nochle beņe' ca' chseļa' Diosen' len le'e, chchellene' yej. Zan ni'a goclaža' yotoba' le'e ca to jed xcaca' be nche' xi'in na' chyežba' legacba', perw bitw goclaže'le.

<sup>35</sup> Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale:

“Mbalaz ben' za' nga nsel<sub>a</sub>' Xancho Diosen' le' cont nabi'e”, cana'ch le'ele neda' da' yoble.

## 14

### *Jesúsen' beyone' to bene' de yi*

<sup>1</sup> Na' to ža che Dios Jesúsen' gwyeje' jatagüe' liž to bene' fariseo ben' nac bene' blao. Na' yezica'chle bene' fariseo ca' chosogüia chesene'e bixen' goncze' cont gata' da' yosode'ede' yesagüe' xya che'.

<sup>2</sup> Na' lagüe'na' zecha to bene' chacšene, de cuerp chen' yi.

<sup>3</sup> Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés:

—¿De lsens len ley chechon' yeyoncho to bene' güe' ža che Dios o še bitw bi lsens de?

<sup>4</sup> Perw notno boži'i xtiže'na'. Nach Jesúsen' be<sub>x</sub>ue' na' bena' na' beyone' le', na' gože'ne':

—Guac yeyejo'.

<sup>5</sup> Nach gož Jesúsen' bene' ca' že' liž bene' fariseon':

—Le'e še zoa to burr o to go'n chele na' lažo'ba' to lo' yechw sitjw, ¿cabi la' yebejteleba' la'saze nac ža che Dios?

<sup>6</sup> Na' nono goc yoži'i xtiža' Jesúsen'.

### *Bene' ca' gosaxe' gan' chac güešagna'*

<sup>7</sup> Na' ble'e Jesúsen' can' cheson bene' ca' gosaxe' liž bene' fariseon', gosebeje' gan' zjachi' bene' blao ca' cont gosebi'ena'. Na' Jesúsen' be'e to jempl, gože' legaque':

8 —Cate' to be<sub>ne</sub>' gaxe' le'e gan' chac güešagna', bitw cue'le gan' cheya<sub>la</sub>' cue' be<sub>ne</sub>' blao ca', le še cue'le na', guacte yid be<sub>ne</sub>' nacch be<sub>ne</sub>' blao

9 na' xan yo'ona' ye'e le'e: “Le soža' cont cue' benga.” Nach do chaquele zto' soža'le cue'le ga yoble len be<sub>ne</sub>' ca' bitec bi zjazaca'.

10 Na' cate' gan' gaxe' le'e cue'le len be<sub>ne</sub>' bitec bi zjazaca', na' cate' yid xan yo'ona' na' ye'e to tole: “Be<sub>ne</sub>' migw chia', da cui'o len be<sub>ne</sub>' blao ca'.” Nach gacxenle lao be<sub>ne</sub>' ca' zjachi' len le'e cho'a mesen'.

11 Le note'teze be<sub>ne</sub>' chonxen cuine', Diosen' gone' cont si'e zto' lagüen'. Na' note'teze be<sub>ne</sub>' chzexjwlaže' lagüen', Diosen' gone' cont gacxene'.

12 Na' lecze gož Jesúsen' ben' goxe' le ližen':

—Cate' gono' to l<sub>ni</sub> na' gaxo' be<sub>ne</sub>' yesagüe' len le', bitw gaxo' be<sub>ne</sub>' biše' lježo', be<sub>ne</sub>' migw chio' o be<sub>ne</sub>' zjanaque' be<sub>ne</sub>' gwni'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'.

13 Cate' gono' to l<sub>ni</sub> gox be<sub>ne</sub>' yaše' na' be<sub>ne</sub>' nchog no ni'a na'gaque', be<sub>ne</sub>' nxinj ni'e, na' be<sub>ne</sub>' lchol.

14 Še gaxo' legaque', Diosen' gone' so' mbalaz, le be<sub>ne</sub>' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo be<sub>ne</sub>' guat ca' txen len yezica'chle ben' ja'ac to liča cate' gosebane'.

### *Jempl che to be<sub>ne</sub>' ben l<sub>ni</sub> xen*

15 Na' to be<sub>ne</sub>' chi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo l<sub>ni</sub> da' gac caten' ba chnabia' ben' se<sub>la</sub>' Diosen'.

16 Nach Jesúsen' gwne':

—To be<sub>ne</sub>' bene' to l<sub>ni</sub> xen, na' goxe' be<sub>ne</sub>' zan šja'ac ližen' cont yesagüe'.

17 Na' cate' bžin hor yesagüe', na' x<sub>an</sub> yo'ona' gwse<sub>le</sub>' xmosen' cont šjatobe' lega<sub>que</sub>' yesagüe'. Na' cate' ja<sub>ne</sub>'e to toe', gože' lega<sub>que</sub>': "Le šo'o, ba bs<sub>ni</sub>'e dan' gagwchon'."

18 Na' yogo'l<sub>ole</sub>' gose'e ben' bi zjazoe' latje šja'aque' gan' chone' l<sub>ni</sub>n'. Be<sub>ne</sub>' nechon' gwne': "Za' gw<sub>xia</sub>' to yežlio, na' cheya<sub>la</sub>' šja<sub>na</sub>'an. Na' ye'šco' x<sub>anon</sub>' bitw gac yida'."

19 Na' yetoe' gwne': "Za' gw<sub>xia</sub>' gayo' cue' go'n na' na'a šjengaca'ba' prueba. Ye'šco' x<sub>anon</sub>' si'xene' čhia', bitw gac yida'."

20 Na' yetoe' gože'ne': "Za' bšagna'. Da'nan' bitw gac yida'."

21 Na' mosen' beyeje' na' jayeže' x<sub>anen</sub>' can' gose' be<sub>ne</sub>' ca' le'. Nach x<sub>an</sub> yo'ona' ben' chon l<sub>ni</sub>n' bže'e. Nach gože' xmosen': "Gwyej jata to to cay na' to to nez lo ciudan', na' gwtobo' be<sub>ne</sub>' yaše' na' be<sub>ne</sub>' nchog ni'a na'ga<sub>que</sub>' na' be<sub>ne</sub>' nx<sub>inj</sub> ni'e, na' be<sub>ne</sub>' l<sub>chol</sub> cont yeside' yesagüe'."

22 Gwde bene' ca' nach gože' le': "X<sub>ana</sub>', ba jatoba' be<sub>ne</sub>' ca' ba gwnaon', na' ne' dechcze latje par be<sub>ne</sub>' yoble."

23 Nach x<sub>ane</sub>'na' gože' le': "Bchoj lo' ciudan' na' gono' byen yesid ben' nita' chanez. Na' šja<sub>xi</sub>'o be<sub>ne</sub>' ca' zjaže' yi<sub>xe</sub>'. Gono' byen yeside' liža' nga yesagüe' cont yežan' bich bi latje šo'.

24 Na' ca nac be<sub>ne</sub>' ca' goxa' da' nechw, bich gua' latje yesagw lega<sub>que</sub>' dan' ba bs<sub>ni</sub>'ana'."



*Dan' cheyala' goncho cont gaccho txen len Jesu-  
criston'*

<sup>25</sup> Na' bene' zan juisyw zjana'ogüe' Jesúsén', na' gwyeçhje' gože' legaue':

<sup>26</sup> —Note'teze bene' še chaclaže' šejnilaže' neda' na' gwzenague' chia', še bi gacchde' neda' cled ca xaxne'e, no'ol che', xi'ine', biše', zane', na' lente cuine', bi gac gone' neda' txen.

<sup>27</sup> Na' note'teze bene' bi chzanlaže' cuine' saca'zi'e o gate' ne chia' neda', lecze bitw gac gone' neda' txen.

<sup>28</sup> Še tole che'nele gonle to campanaryw, zgua'tec cue'le na' gonle xbab gwsaca'le ca do gaca'da' chyažjele cont gonlen, še gaque xmechwle cont yeyož campanaryon'.

<sup>29</sup> Še bi gwchix gwtole xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožén, na' yogo' bene' yesele'ede' lenenna' yesezi'diže' le'e,

<sup>30</sup> yesene': "Benga gwzolao chone' to campanaryw perw bitw beyož xšinen'."

<sup>31</sup> Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw.

<sup>32</sup> Na' še chache'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo.

<sup>33</sup> Ca' naquen len le'e, note'tezle še bi cuejyichjele yogo'lol bi da' de chele, bitw gac gonle neda' txen.

*Cate' zeden' bich naquen zxi'  
(Mt. 5:13; Mr. 9:50)*

34 'Zeden' naquen güen, perw na' še bich naquen zxi', ¿nacxe goncho cont yeyaquen zxi' da' yoble?

35 Bibi zacan', n̄eca gaclenen yežlio, n̄eca gaquen par beb, lete cho'oñchon. Le'e žia nagle da' chene, le gwzenag xtiža'na'.

## 15

### *Jempl che xila' ben' gocžeje*

*(Mt. 18:10-14)*

1 Na' bene' güeçhixjw ca' na' yebale bene' güen da' xinj, yogüe' gosebigue' gan' zoa Jesúsen' cont gosende' xtiže'na'.

2 Na' bene' fariseo ca' na' bene' ca' chošosed chosolo'e lēy dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

3 Nach Jesúsen' be'e to jempl, gože' legaque':

4 —Še nita' to gayoa xila' chele na' gacžeje toba', ¿bi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'?

5 Na' cate' yeželban' yebechgüele na' yexoalba' ya'axiçhje yeyoa'lba'.

6 Na' cate' yežin ližle, gwtoble bene' migw chele na' bene' gualiž chele na' ye'lnē': “Le yebe len neda'. Ba bežel xila' chia' ben' gocžeje.”

7 Chnia' le'e, gwbeche Diosen' txen len angl che' ca' cate' to bene' chon da' mal yetiñjde' xtole' clēl ca' yesyebede' che taplalj togalj bene' zjanaque' bene' güen bene' bitw de xtoła'gaque' da' yesyetiñjde'.

### *Jempl che mechw dan' gwnit*

8 'Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen.

9 Na' cate' yeželenna', na' yotoble no'ole migw chele ca' na' bene' gualiž chele na' ye'le legaque': "Le yebe len neda', le ba beželda' mechw chia' dan' gwnit."

10 Chnia' le'e lecze chesyebe chesyenzaque' angl che Diosen' bene' zoa yaba cate' to bene' chon da' xinj chetinjde' xtole'na'.

### *Jempl che ben' benditje xi'inen' xmechue'*

11 Na' lecze gože' legaque':

—Gwzoa to bene' na' gwnita' chop xi'ine' bene' byo.

12 Na' bžin ža bene' xcuiden' gože' xen': "Xa', ben neda' dan' cheyala' sia' da' de chio'." Nach xen' bnežjue' dan' cheyala' si'en.

13 Goc to chop ža nach bene' xcuiden' btobe' yogo'lol bi da' de che' na' gwze'e gwyeje' nación zito' na' zlez da' bi zaca' jene'. Na' benditjde' xmechue'na' zejlene' da' malen'.

14 Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'.

15 Da'nan' gwyeje' gan' zoa to bene' naciónna' gwñabe' žin, na' bena' gwsele' le' yixe' ga že' be zan xcoše' na' jayoe'ba'.

16 Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'.

17 Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon.

18 Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le',

19 na' bich zaca' gone' neda' cuent ca xi'ine', con še gone' latje gaca' ca to xmose'."

20 Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnope'ne'.

21 Nach gož xi'ine'na' le': "Xa', ba bena' da' mallao Diosen' na' lagu' le'. Bich zaca' gono' neda' cuent ca xi'ino'."

22 Na' xe'na' gože' xmose' ca': "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcue' yel na' gwdelen ni'abe'.

23 Na' le šjaxi' goṅ dao' ben' čane' na' le gotba' cont gagwchoba', le goncho lni.

24 Xi'ina' nga ba bena'be' cuent ca to bi' guat, perwne' zoabe' mbambe' na'a. Gwlejyichjbe' chio', perw na'a ba bela'be'." Na' gosezolaogüe' chesone' lni.

25 Na' xi'ine' bene' nechon' zeje' yixe' cate' bežin xi'inen' yeto ben' benditje xmechuen', na' cate' zeza' ben' gwey yixen', ba zoa yežine' liž xen' cate' bende' chosocueže' na' chosoye'e.

26 Na' goxe' to mosen' na' gwṅabde' le' bixchen' chesone' lni.

27 Na' mosen' gože'ne': "Bi' bišo'na' ba bela' na' xaon' ba betue' goṅ daon' ben' čane'chgua da' bela'be' to šagüe' to güen."

28 Nach xi'ine' nechua' bže'e na' bi goclaže' yeyo'e liž xen'. Na' bchoj xen' na' gota'yoede' le'

yeyo'e yo'o.

<sup>29</sup> Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' bina' gaca' bene' güedenag. Na' ne to šib dao' caña' gono' neda' cont gota'ba' gona' lni len bene' migw chia' ca'.

<sup>30</sup> Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' go'n dao' ben' čane'."

<sup>31</sup> Na' xe'na' gože'ne': "Xi'indagua', le' zoatezo' len neda', na' yogo'lol da' de naquen čio'.

<sup>32</sup> Perw cheyala' goncho lni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejyichjbe' čio', perw ba bela'be'."

## 16

*Jempl che to mos blao ben' benditjde' da' de che xane'*

<sup>1</sup> Nach gož Jesúsen' bene' ca' zjanaque' le' txen:

—Gwzoa to bene' gwni'a na' gwzoa to mos blao che' ben' gwyo'o lo ne'e yogo'lol da' de che'. Na' bene' gwni'ana' bende' rson xmose' blaon' ba benditjde' bi da' de che'.

<sup>2</sup> Na' xanen' goxe' le' na' gože'ne': "Ba benda' diža' can' chonon'. Cheyala' yodio' cuent yogo'lol da' ba benditjedo' chia'. Bich gac gono' xšinan' na'a."

<sup>3</sup> Nach mosen' bene' xbaben': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida.

<sup>4</sup> Nezda' bi gona' cont nita' bene' yesene'e neda' cate' bich chona' žin che xanan'."

5 Nach goxe' yogo'lo<sub>l</sub> bene' ca' chesala' xmechw xane'na' tgüej tgüje' na' gože' bene' nechw: “¿Gaca' chalo' che xana'?”

6 Na' bena' gože'ne': “Chala' che tap mil litrw set.” Nach gož mos blaona' le': “Bedao'nez gwche'edo' na' bzoj lo cuenten' bzoan chalo' che chop mil litrwze seten'.”

7 Gwde na' gože' bene' gwchopen': “¿Gacan' chalo' che xanan'?” Nach bena' gože'ne': “Chala' che to mil rob trigw.” Nach mosen' gože' bena': “Gwche'edo' na' bzoj lo cuent chio'na' bzoan chalo' che xono' gayoa robze trigon'.”

8 Na' xan mos gwxiyen' goche'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjayo'o be'ni' che Diosen' lo' yichjlažda'ogaque' bitw chesone' xbab naclen' yosochine' dan' de chegaque'.

9 Na' chnia' le'e, dan' de chele yežlio nga da' te chen', perw le gwchinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežinle yaba gan' soale toli tocanē.

10 Še to bene' chone' can' cheyala' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheyala' gone' len da' bibi zaca'tec, lecz bitw gone' can' cheyala' gone' len da' zaca'chgua.

11 Še le'e bi chonle can' cheyala' gonle len dan' de chele yežlio nga da' te chen', bitw gon Diosen' le'e da' zaca'ch da' bi te che.

12 Dan' de chele yežlio nga, che Diosen' gague chelen'. Na' še bitw chonle can' cheyala' gonle len da' nac che', bitw gone' le'e da' zaca'ch da' bi te chen.

13 Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwni'a.

14 Na' lecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwni'a.

15 Na' gož Jesúsen' legaque':

—Le'e chonle cont benachen' chesacde' chdac-zle lica, perw Diosen' neze nle'ede' yichjlažda'ole, na' Diosen' chgue'ede' bal da' chesaque benachen' zjanaquen da' žialao xen.

*Ley che Diosen' na' bene' ca' chnabia' Diosen' yichjlažda'ogaque'*

16 Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

17 'La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyo-jen, ne late' daon' cbi te chen.

*Bi cheyała'yela'acho len no'ol chechon' cont soalencho no'ole yoble*

(Mt. 19:1-12; Mr. 10:1-12)

18 'Note'teze beñe' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che beñe' yoble. Na' note'teze beñe' yošagna'lene' to no'ole beñe' bela'a len beñe' che', lecze tozcze ca da' xinj gone' len dan' chon beñe' chata'lene' no'ol che beñe' yoble.

*Beñe' gwñi'a na' Lázaro*

19 Nach gozna' Jesúsen':

—Gwzoa to beñe' gwñi'a na' xdanchgua goc xalane'na', na' leca gwdagwšagüe' yogo' ža.

20 Na' to beñe' yaše' le' Lázaro, yogo' ža jasedixjue' le' cho'a puert zaguan che beñe' gwñi'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'.

21 Na' catec gwdone' goclaže' gagüe' bla'a dao' yela' guagw da' beselažo' cho'a mes che beñe' gwñi'an'. Na' beco' ca' ja'acba' jasele'eba' yežo' dan' gwžia cuerp che'na'.

22 Na' got beñe' proben' nach angl beñe' že' gan' zoa Diosen' besyezi' besyeque'e le' yaban' gan' zoe' na'a len da' xoxxta'ocho Abraham. Na' lecze got beñe' gwñi'ana' na' bosocuaše'ne'

23 na' beyeje' lo yi' gabil. Na' šlac chžaglagüe' na' gwliš lagüen' na' ble'ede' zito'le nita' da' Abraham len Lázaron' yabana'.

24 Nach beñe' gwñi'an' gwñe' zižje gwne': “Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwlapa' xbene'na', le leca chžaglagua' lo yi' nga.”



25 Perw na' Abrahanna' gože' le': "Xi'ina', bosa'laže' cate' gwbano' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'.

26 Bi gac gona' can' chaclažon', le Diosen' bach nze' to bđinj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga."

27 Nach bene' gwni'ana' gože' Abrahanna': "Bene' gol dao', chata'yoeda' le' gwsela'sca Lázaron' liž xan'.

28 Nita' gayo' bene' biša' na' che'nda' šjatixjue'ede' legaue' nac yesone' cont Diosen' bi yesele' legaue' latje nga gan' yesežaglagüe'."

29 Na' Abrahanna' gože' le': "Decze dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani'. Cheyala' yosozenague' che da' ca' zjanyojen."

30 Na' gože' Abrahanna': "Bitw, bene' gol dao'. Še to bene' yebane' ladjo bene' guat na' güe'lene' legaue' diža', nach yesyetinjde' xtola'gaquen'."

31 Nach gož Abrahanna' le': "Še bitw chosozenague' che dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen', la'czla' še yeban to bene' ladjo bene' guat ca', bi yesejle'cze' che Diosen'."

## 17

*Bitw cheyala' goncho cont gon bene' da' xinj  
(Mt. 18:6-7, 21-22; Mr. 9:42)*

<sup>1</sup> Na' gož Jesúsen' bene' ca' zjanaque' le' txen:

—Decze da' gonen cont lažo' be<sub>ne</sub>' yesone' da' xinj, perw nyaše' chguaze gac che be<sub>ne</sub>' chone' cont be<sub>ne</sub>' yoble yesone' da' xinj.

<sup>2</sup> Yejni'a šaca' yosočeje' yene' to yiše na' šjasezale' le' lo' nisdao' clel ca soe' gone' cont to be<sub>ne</sub>' za' gwzolaküe' chejnilaže' neda' lažoe' gone' da' xinj.

<sup>3</sup> Da'nan' le gwsaca' cont bi gonle ga lažo' be<sub>ne</sub>' gone' da' xinj.

'Na' še to be<sub>ne</sub>' lježle gonde' le'e mal, le tile' na' še gwše'e xbab na' ne' bich gone' ca', le yezi'xen che'.

<sup>4</sup> La'czla' gaž ni'a lao tža gone' da' mal contr be<sub>ne</sub>' lježen', še gaž ni'ate ne': “Ba betinjda' che dan' benan', bezi'xen chia”, na' cheyala' yezi'xene' che'.

### *Gosaclaže' yesejle' che' che Diosen'*

<sup>5</sup> Na' gose' postlw ca' Xancho Jesúsén':

—Gaclenšco' neto' cont šejle' chto' che Diosen'.

<sup>6</sup> Nach gož Xancho' legaque':

—Xsa yag xomdas naquen da' dao' riz, na' la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclne', še šejnilaže'lné', guaque ye'le yag nga: “Gwcuase nga na' jayzoa lo' nisdan”, na' guacze can' nalna'.

### *Dan' cheyala' yeson mos ca'*

<sup>7</sup> Le'e še mos chelen' chgua'ane' go'ñ, o še chyoe' xila', cate' chele'e güeyeban' bitw che'lné': “Beyo'o ngale, gwche'edo' gago' xše'.”

<sup>8</sup> San che'lné': “Bsiñi'a da' ye'ej gagua' na' goñon'. Te yedaguan' nach gago'.”

<sup>9</sup> Na' bitw cho'elne' yela' choxc<sub>len</sub> cate' ba bene' dan' gožlene'.

10 Na' lec̄ ca' le'e, cate' ba ben̄le yogo'lōl dan' ža Diosen' gon̄le, cheyāla' nāle: “Bitw zaca'to' no gon̄ yela' chōxc̄len ch̄eto' ca dan' ba bento', le bento' con da' cheyāla'c̄ze gonton'.”

*Jesúsen' beyone' ši ben̄e' chese'ede' yižgüe' da' nzi' lepra*

11 Na' zej Jesúsen' Jerusalén̄na' len ben̄e' ca' zjanaque' le' txen na' gw̄die' gan' ndīl distritw Samaria len distritw Galilean'.

12 Na' besežine' to cho'a yež dao' na' besechoj ši ben̄e' chese'e yižgüe' da' nzi' lepra jasešague' Jesúsen'. Na' gosezie' zito'

13 na' gosēne' zižje gosene':

—Maestrw Jesús, beyaše'laže' neto'.

14 Na' Jesúsen' cate' ble'ede' legaque' na' gože'ne':

—Le šjaya'ac lao b̄xoz ca' cont yesene'e le'e še ba beyacle.

Na' goquen' lo neza' besyeyacde'.

15 Nach toe' cate' goche'ede' bāch beyaque', na' bebi'e na' gw̄nie' zižje benxene' Diosen',

16 na' bzoa xibe' lao Jesúsen' bi'e le' yela' chōxc̄len. Ben' ben ca' naque' to ben̄e' Samaria.

17 Nach gwna Jesúsen':

—Beyona' ši ben̄e'. ¿Gānxe ben̄e' ca' yega?

18 ¿Toz ben̄e' zito' nga bebi'e chonxene' Diosen'?

19 Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

*Yela' chnabia' che Diosen'  
(Mt. 24:23-28, 36-41)*

20 Na' be<sub>ne</sub>' fariseo ca' gosen<sub>abde</sub>' le' batxen' yid ben' se<sub>la</sub>' Diosen' nabi'e naci<sub>ón</sub> Israelen'. Nach boži'i Jesúsen' xtiza'gaquen' gwne':

—Ca nac yela' gwnabia' che Diosen', bi naquen da' le'echo.

21 Nono cheya<sub>la</sub>' güe' diža' ne': “Gw<sub>na</sub>' nga chnabi'e”, o “Gw<sub>na</sub>' na' chnabi'e.” Le ba zoe' len le'e na'a chnabi'e.

22 Nach gože' be<sub>ne</sub>' ca' zjanaque' le' txen:

—Gwžin ža cate' nale: “Šaca' na'a ba chnabia' ben' gwsela' Diosen'”, perw bitw gac can' nabraže'len'.

23 Yesenita' be<sub>ne</sub>' yesi'e le'e: “Gw<sub>na</sub>'šc nga zoa ben' gwsela' Diosen'”, o “Gw<sub>na</sub>'šc na' zoa ben' gwsela' Diosen'.” Perw bitw ga'ole ben' yesi'e le'e ca'.

24 Can' chac cate' chep yes, chsenin' doxen le'e yaban' zejzenez, lecze can' gac cate' žin ža yida' da' yoble, neda' naca' ben' gwsela' Diosen' golja' be<sub>nach</sub>. Yida' zejzenez na' yogo'lo<sub>l</sub> be<sub>ne</sub>' yesele'ede' neda'.

25 Zgua'tec de da' zan da' cheya<sub>la</sub>' saca'zi'a na' be<sub>ne</sub>' ca' že' na'a bitw yesejle'e chia'.

26 Lecz ca' goc ca tiemp che da' Noé, lecze ca' gac cate' ba zoa žin ža yida' da' yoble, neda' naca' ben' gwsela' Diosen' golja' be<sub>nach</sub>.

27 Be<sub>ne</sub>' gwnita' ca tiemp che da' Noén' gosaše' gose'ej gosagüe' goso'elaže' bosošagne'e na' bosošague' na' no xi'in che' cate' bžin ža gwyo'o Noén' lo' barcon'. Nach goc to yejwsio' juisyw. Na' gosebiayi' yogo' be<sub>ne</sub>' ca' bi goso'o lo' barcon'.

28 Lecz ca' goc ca tiemp che da' Lot, be<sub>ne</sub>' Sodomán' gose'ej gosagüe' gosote' bi da' de

čhegaque', na' gosezi'e bi da' beseyažjde', na' gosaz gosa'añe', na' goson liže'.

<sup>29</sup> Perw na' žan' beza' Loten' Sodoman', Diosen' bene' cont byiñj yi' na' azufre yaba na' gosebiayi' yogo'lole'.

<sup>30</sup> Can' gac cate' yida' da' yoble, neda' naca' ben' gwsela' Diosen' golja' benach, na' yogo'lol bene' yesele'ede' neda'.

<sup>31</sup> Na' ža caten' yida' še chda to bene' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yiže', bitw gadde' yeyej liže'.

<sup>32</sup> Le šjayza'laže' can' goc che no'ol che Loten'.

<sup>33</sup> Note'tez bene' chacde' gone' cont cbi saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne chia' neda', ba de yela' mban che' toli tocañe.

<sup>34</sup> Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an.

<sup>35</sup> Na' chop no'ole nite' txen chesote', toe' yeca'a Diosen' na' yetoe' yega'an.

<sup>36</sup> Na' chope bene' nite' do yiže', toe' yeca'a Diosen' na' lecze yega'an yetoe'.

<sup>37</sup> Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen che ben' že': “Gan' de be guat nan' chesežag šod ca'.”

## 18

*Jempl che to no'ol güezeb len to juez mal*

1 Na' be'len Jesúsen' legaque' to jempl bsd blo'ede' legaque' cheya<sub>l</sub>a' nita'teze' yesonchachlaže' yosol güiže' Diosen'.

2 Na' gože' legaque':

—Gwche' to ciuda ga gwzoa to juez na' juezen' bi gwda<sub>p</sub>e' Diosen' bala'an' na' neca gwche'yichje' še chesazlaže' benachen' can' chonen'.

3 Na' ciudan' gwzoa to no'ol güezeb, na' goxje cheje' lao juezen' na' che'e le': “Ben yela' justis chia' len bene' chgue'ede' neda'.”

4 Ba goc sša bi chzenague' che', perw gwdechle bene' xbab, gwne': “Bitw chapa' Diosen' bala'an' na' neca chi'yichja' še chesazlaže' benachen' can' chonan'.

5 Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'.”

6 Nach gož Xanchon' legaque':

—Le gon' xbab che dan' gwna juezen' ben' bi zej to licha.

7 Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'?

8 Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwsela' Diosen' golja' benach, ¿ne' nita'ch bene' chesejnilaže' neda'?

*Jempl che to bene' fariseo len to bene' güechixjw*

9 Gwnita' bal' bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjzaque' len

Diosen'. Na' Jesúsen' bi'e jempl nga da' bcuišen beñe' ca', gwne':

<sup>10</sup> —Chope beñe' ja'ac yodao' blao jasel güiže' Diosen', toe' beñe' fariseo na' yetoe' beñe' güechixjw.

<sup>11</sup> Beñe' fariseon' gwzeze' bol güiže' Diosen' na' con chonxen cuine', gwne': “Dios, neda' chona' yela' choxc̄len chio' bitw chona' cana' cheson yezica'chle beñe'. Bitw chca'a bi da' de che beñe' yoble, na' bitw chona' bichle da' māl. Bitw chata'lena' no'ol bi nac no'ol chia', na' neca naca' beñe' mal can' nac beñe' güechixjw ni.

<sup>12</sup> Chope ñi'a to xman chona' gwbas, na' yogo'lol da' chona' gan, chbecan' ši cuen na' chnežjua' to cuen che yodao'.”

<sup>13</sup> Na' beñe' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': “Dios, beyaše'laže' neda' naca' beñe' güen da' xiñj.” Da'na'z da' gwna beñe' güechixjon'.

<sup>14</sup> Na' chnia' le'e, Diosen' bezi'xene' che beñe' güechixjon' na' beyej liže' bibi xtole' gota'. Perw bi goc ca' len beñe' fariseon'. Le note'tez beñe' chonxen cuine', Diosa' gone' cont si'e zto', na' note'tez beñe' chzexjwlaže' lagüen', Diosen' gone' cont gaxene'.

*Jasesane' bidao' lao Jesúsen'*

*(Mt. 19:13-15; Mr. 10:13-16)*

<sup>15</sup> Na' jasesane' bidao' lao Jesúsen' cont xoa ne'e yichjgacbe'. Na' cate' beñe' ca' zjanaque' le' txen besele'ede' can' chesonen', gosedile' legaque'.

16 Perw na' Jesúsen' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogüe'.

17 Na' da' li žia' le'e, note'teze bene' bi yosozenague' che Diosen' ca cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

*To bene' gwni'a be'lene' Jesúsen' diža'  
(Mt. 19:16-30; Mr. 10:17-31)*

18 To bene' gwnabia' gože' Jesúsen':

—Maestrw, le' naco' bene' güen. ¿Bi cheyala' gona' cont gata' yela' mban chia' toli tocanē?

19 Nach Jesúsen' gože'ne':

—¿Bixchen' žo' naca' bene' güen? Toz bene' güen zoa, na' len' Dios.

20 Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le.”

21 Na' gož ben' le':

—Yogo'lol da' quinga gwzolagua' chonczan' cate' ne' nactia' bidao'.

22 Nach cate' bene' Jesúsen' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.



23 Perw na' bena' cate' beyož bende' diža' dan' gož Jesúsen' le', gocyasē'chgüede', le bene' gwñi'achgua goque'.

24 Na' Jesúsen' gwñe'e bene' gwñi'ana' na' gože'ne':  
—Leca zdebe naquen to bene' gwñi'a gwzenague' che Diosen' cont Diosen' ñabi'e yichjlažda'ogüe'.

25 Bedao'ch te to be xen be nzi' camello to lo' nag yeše' clev ca to bene' gwñi'a gwzenague' che Diosen' cont Diosen' ñabi'e yichjlažda'ogüe'.

26 Na' bene' ca' bosozenague' xtiže'na' gose'ene':  
—¿Noxen' šjayzoa len Diosen' še ca'?

27 Na' Jesúsen' gože' legaque':  
—Da' bi gac gon beñachen', bitw ñacho bi gac gon Diosen' len.

28 Nach Pedroa' gože' le':  
—Neto' ba gwlejjyichjto' yogo' da' de cheto' cont nacto' le' txen.

29 Na' gož Jesúsen' legaque':  
—Da' li žia' le'e, note'teze bene' ba gwlejjyichje' liže', xaxñe'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe',

30 yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli tocañe.

*Da' yoble gosyixjue'e Jesúsen' ba zoa gate'  
(Mt. 20:17-19; Mr. 10:32-34)*

31 Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'lol dan' nyoj chia' dan' bosozoj da' bene' ca' gosoe'

xtiža' Diosen' cani', neda' naca' bena' gwsela'  
Diosen' golja' be<sub>n</sub>a<sub>ch</sub>.

<sup>32</sup> Gaca' lo na' be<sub>n</sub>e' ca' bi zjanac be<sub>n</sub>e' Israel, na'  
yesezi'diže' neda', na' yese<sub>n</sub>e' ye<sub>l</sub>a' ya' čhia', nach  
yosoži'e xene' cho'alagua'.

<sup>33</sup> Yesot yeseyine' neda' na' yesote' neda', perw  
yeyo<sub>n</sub> ža yebana' ladjo be<sub>n</sub>e' guat ca'.

<sup>34</sup> Perw be<sub>n</sub>e' ca' zjanaque' Jesúsen' txen  
bi gosejni'ide' dan' gože' lega<sub>q</sub>ue', le zjančho<sub>l</sub>  
yichjlažda'ogüen', da'n<sub>a</sub>n' bi gosejni'iden'.

*To be<sub>n</sub>e' lčho<sub>l</sub> be<sub>n</sub>e' Jericó bele'ede'*

*(Mt. 20:29-34; Mr. 10:46-52)*

<sup>35</sup> Nach cate' ba zoa yežin Jesúsen' Jericó, to be<sub>n</sub>e'  
lčho<sub>l</sub> čhi'e chanezen' ch<sub>n</sub>abe' yosonežjo be<sub>n</sub>e' le'  
con gaca' da' chesezande'.

<sup>36</sup> Na' bende' chesede be<sub>n</sub>e' zan gan' čhi'ena', na'  
gw<sub>n</sub>abe' bin' chac.

<sup>37</sup> Na' gose'ene':

—Jesús be<sub>n</sub>e' Nazaret chdie' laguo' nga.

<sup>38</sup> Na' bosya'adie' gwne':

—Jesús, xi'ī<sub>n</sub> diaža čhe da' rey David,  
beyaše'laže'šca neda'.

<sup>39</sup> Nach be<sub>n</sub>e' ca' zjažialao lao Jesúsen' gosedile'  
be<sub>n</sub>e' lčho<sub>l</sub>en', gose'e le' cheya<sub>l</sub>a' soe' šize, perw  
nachle bosya'adiache', gwne':

—Xi'ī<sub>n</sub> diaža čhe da' rey David, beyaše'laže'šca  
neda'.

<sup>40</sup> Jesúsen' gwleze', nach bene' mandadw  
šjasexi'e be<sub>n</sub>e' lčho<sub>l</sub>en' lagüe'na'. Na' cate' gwbiga'  
be<sub>n</sub>e' lčho<sub>l</sub>en' lao Jesúsen', nach gože'ne':

<sup>41</sup> —¿Bi chaclažo' gonda' le'?

Na' be<sub>n</sub>e' lčho<sub>l</sub>en' gože'ne':

—Xana', benšca cont yele'eda'.

<sup>42</sup> Jesúsen' gože'ne':

—Bele'e. Dan' chejnilažo' neda' baḥ beyac yejlagon'.

<sup>43</sup> Na' la' bele'ete beṇe' lḥoḷa' na' gwda'ogüe' Jesúsen' benxene' Diosen'. Na' lecze ca' yogo' beṇe' ca' besele'ede' can' goquen' gosonxene' Diosen'.

## 19

### *Jesúsen' na' Zaqueo*

<sup>1</sup> Nach Jesúsen' gwyo'e yež Jericó na' gwdeze' yešla'a ciudan'.

<sup>2</sup> Na' zoa to beṇe' le' Zaqueo. Naque' beṇe' gwnabia' ḥe beṇe' güeḥixjw ca', na' naque' beṇe' gwni'a.

<sup>3</sup> Gwdiljwlaže' naclen' gone' le'ede' Jesúsen', perw bitw goc, le gwnita' beṇe' zan len Jesúsen' na' Zaqueon' goque' to beṇe' bḥecw dao'.

<sup>4</sup> Da'nán' gwza'sese' gwdie' lao beṇe' ca' cont gwyep'e to lo yag da' zoa gala'ze gan' te Jesúsen'.

<sup>5</sup> Perw na' cate' bžin Jesúsen' xan yaguen', gwṇe'e lo yaguen' na' gože'ne':

—Zaqueo, bedao'nez beyetj. Cheyala' yega'ana' ližo' na'aže'.

<sup>6</sup> Nach Zaqueon' beyetjsese' chebede'. Nach beḥe'e Jesúsen' liže'na' na' benxene' le'.

<sup>7</sup> Perw na' beṇe' ca' zjanžague' len Jesúsen' cate' besele'ede' can' goquen', yogüe' gosenie' ḥe Jesúsen' gosene':

—Ba zeje' zjazoe' to liž beṇe' güen da' xinj.

<sup>8</sup> Nach Zaqueon' gwzeche' na' gože' Xanḥon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zcha'och ca dan' cheyala' yeseyixjue', yonežjwgaca'ne' tap ca'te'le.

<sup>9</sup> Na' Jesúsen' gože'ne':

—Na'aža ba beṅ Diosen' yela' mban chio' toli tocaṅe len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejni-lažo' Diosen' can' ben da' xozxta'ocho Abraham.

<sup>10</sup> Ca nac neda', gwsela' Diosen' neda' golja' beṅach cont zedyediljua' note'tez bene' ba mbiayi', na' gwnežjua' legaque' yela' mban toli tocaṅe.

*Jempl che ši bene' bnežjw xanguaque' legaque' mechw xen*

<sup>11</sup> Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le ba nite' gala'ze Jerusalénna' na' gosacde' la' solaote nabi'e nación Israelen'.

<sup>12</sup> Nach gwne':

—To bene' blao gwyeje' to yež zito' jene' dan' cheyala' gone' cont jaxi' lo' ne'e nabi'e yež che', le gosebeje'ne' nabi'e yež chen' cate' yežine'.

<sup>13</sup> Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': “Mechw nga gonele negosyw šlac bi zoa”.

<sup>14</sup> Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw cha-claže'to' nabi'a' benga neto'.”

<sup>15</sup> Perw la'czla' bi gosaclaže' bene' gualaž chen', bia'cze gwxi' lo' ne'e nabi'e. Nach cate' bežin lažen' da' yoble, bene' mandadw šja'ac xmose' bene' ši

ca' lagüe'na', beñe' ca' bocua'añlene' xmechuen'. Goclaže' ñezde' gaca' gosone' gan len mechw dan' bocua'añlene' to toe'.

16 Beñe' nechw bžine' lagüen' na' gože'ne': "Xana', xmecho' dan' bocua'añleno' neda' benen gan ši ca'te'le ca dan' bocua'añon'."

17 Nach xanen' gože'ne': "Ba beno' da' güen. Naco' mos güen. Beno' can' cheyała' gono' len da' daon' bocua'añlena' le', da'nan' gona' cont ñabi'o ši ciuda."

18 Na' beñe' gwchopen' bžine' lao xanen' na' gože'ne': "Xana', xmecho' dan' bocua'añleno' neda' benen gan gayo' ca'te'le ca dan' bocua'añon'."

19 Nach gože' le': "Le' ñabi'o gayo' ciuda."

20 Nach bžin yetoe' lao xane'na' na' gože'ne': "Xana', nga de xmecho' dan' bocua'añleno' neda'. Ba blažechachan' bay nga.

21 Bžeba' le' dan' naco' to beñe' znia. Chono' gan da' bi beno' žin na' chelapo' dan' gosaz beñe' yoble."

22 Nach gož xanen' le': "Dan' ba gwnao' ca' chlo'en napo' doła'. Naco' mos mal. Chacdo' naca' to beñe' znia, na' ñezdo' chona' gan da' bi bena' žin na' chelapa' dan' gosaz beñe' yoble.

23 Na' še ñezdo' chona' ca', žbičhen' bi gwlejo' xmechuan' beñe' yoble cont yezian' len yichjen ña'a ba bela'a?"

24 Nach gože' beñe' ca' zjaze cuite'na': "Yeca'ale xmechuan' dan' bocua'añlena'ne' na' gwnežjwlen ben' ba noxe' ši ca'te' ca dan' bocua'añlena'ne'."

25 Nach gose'e le': "Xanto', ba noxe'cze' ši ca'te' ca dan' bocua'añleno'ne'."

26 Nach gož beñe' gwnabian' legaque': "Chnia'

le'e, ben' chon güen len dan' chnežjua'ne', gwnežjua'ne' da' zcha'och, perw na' bena' bi chgone' žin dan' chnežjua'ne', yeca'a da' daon' noxe'na'.

<sup>27</sup> Na' ca nac be<sub>ne</sub>' ca' chesegue'ede' neda', be<sub>ne</sub>' ca' bi chesaclaže' n<sub>ab</sub>ia'gaca'ne', le šja<sub>x</sub>i'e na' gotlene' lagua' nga.”

*Gosonxene' Jesúsen' cate' beyo'e Jerusalén  
(Mt. 21:1-11; Mr. 11:1-11; Jn. 12:12-19)*

<sup>28</sup> Na' cate' beyož be' Jesúsen' jem<sub>pl</sub> nga nach gwze'e zeje' ciuda Jerusalén.

<sup>29</sup> Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwse<sub>le</sub>' ch<sub>op</sub> be<sub>ne</sub>' ca' mandadw ben' zjanaque' le' txen,

<sup>30</sup> gože' le<sub>ga</sub>que':

—Le šja'ac yež dan' chi' ga<sub>la</sub>'ze, na' cate' žin<sub>len</sub>' na' yeže<sub>le</sub>le to burr dao' da'ba' yag, be nono n<sub>a</sub>' cuia. Le sežba' na' le che'ba' nga.

<sup>31</sup> Še no n<sub>ab</sub> bix<sub>chen</sub>' chsežleba', na' ye'ln<sub>e</sub>': “X<sub>anto</sub>' chyažjde'ba'.”

<sup>32</sup> Nach be<sub>ne</sub>' ca' gwse<sub>la</sub>' Jesúsen' gosa'aque' na' besele'ede'ba' da'ba' gan' gož Jesúsen' le<sub>ga</sub>que' ca'.

<sup>33</sup> Nach šlac cheseseže'ba', x<sub>amba</sub>' ca' gose'e le<sub>ga</sub>que':

—¿Bix<sub>chen</sub>' chsežle burr daon'?

<sup>34</sup> Nach be<sub>ne</sub>' ca' gwse<sub>la</sub>' Jesúsen' gose'e le<sub>ga</sub>que':

—X<sub>anton</sub>' chyažjde'ba'.

<sup>35</sup> Nach gose<sub>che</sub>'eba' lao Jesúsen' na' gose<sub>x</sub>oa xagaque' cože'ban' nach bosožie' Jesúsen'.

36 Na' šlac zeje' ngü'e nez bene' ca' zjanžag gosonxene'ne', na' goseyixjw no xagaque' lo nez cont blej burron' len.

37 Nach ba zja'aque' gała'ze Jerusalénna' na' be-sežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', zižje cheso'e diža' che yogo'lol yela' guac da' ba be-sele'ede' da' ben Jesúsén'.

38 Nach gosene':

—jMbalaz rey chechon' ben' ba za' nga gwsela' Xancho Diosen' le' cont nabi'e! Cheyała' gonxencho Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

39 Na' len bene' zan ca' zja'aclene' Jesúsén' zja'ac bal bene' fariseo. Nach to chope' gose'e Jesúsén':

—Maestrw, ben mandadw len bene' ca' za'ac len le' txen cont yesenite' šize.

40 Nach boži'i Jesúsén' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxenen neda'.

41 Cate' bžine' gała'ze Jerusalénna', gwne'e ciudan', na' bene' xbab che bene' lo' ciudan' na' gwchežyaše',

42 na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'.

43 Gwžin ža cate' bene' ca' chesegue'ede' le'e yesone' to yež de yej da' šečhjen ciudan' cont nono gac yoxonj.

44 Na' yesote' le'e len xi'inle ca'. Na' yosyočinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

*Jesúsen' bebeje' beṇe' ca' cheson ya'a yodao' blaon'*

*(Mt. 21:12-17; Mr. 11:15-19; Jn. 2:13-22)*

<sup>45</sup> Jesúsen' gwyo'e chyo'o yodao' blaona' na' gwzomagüe' bešaše' beṇe' ca' chesote' na' beṇe' chesa'o na'.

<sup>46</sup> Na' gože' legaque':

—Nyojcze Xtiža' Diosen' žan: “Ližan' naquen to latje gan' yesoḷ güiž beṇe' neda”, perw le'e ba benlen ca to latje ga že' beṇe' gwban.

<sup>47</sup> Na' bsed blo'ede' beṇe' ca' že' yodao' blaona' yogo' ža. Na' bḫoz gwnabia' ca' na' beṇe' ca' chososed chosolo'e dan' bzoj da' Moisésen' na' nochle beṇe' blao che beṇe' Israel ca', gosey-iljwlaže' nacle yesone' yesote'ne'.

<sup>48</sup> Perw bi besyeželde' nacle yesone' le' neche yogo' beṇe' besyebchgüede' xtiže'na'.

## 20

*Yela' gwnabia' che Jesúsen'*

*(Mt. 21:23-27; Mr. 11:27-33)*

<sup>1</sup> To ža šlac chsed chlo'e Jesúsen' beṇe' ca' chyo'o yodao' blaona' na' chyixjue'ede' diža' güen che Diosen', besežin bḫoz gwnabia' ca' na' len beṇe' gol ca' chesenabi'e naciónna' na' beṇe' ca' chososed chosolo'e dan' bzoj da' Moisés.

<sup>2</sup> Na' gose'e le':

—Gwnašč neto' bi yela' gwnabia' napo' chono' da' qui, na' no beṇ yela' gwnabian' cont chonon'.

<sup>3</sup> Na' boži'e xtiža'gaquen', gwne':

—Lecze de to da' nabda' le'e. Le našč neda'

<sup>4</sup> ¿non' gwseḷa' da' Juanna' bzoe' beṇe' nis? ¿Dios nan' gwsele'ne', še beṇachen'?



<sup>5</sup> Na' legacze' gose' lježe':

—¿Bi nacho? Še ye'chone' Dios gwsela' le', na' ye'e chio': “¿Bixchen' ca gwyejle'le che'?”

<sup>6</sup> Na' bi gac ye'chone' benach gwsela' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

<sup>7</sup> Na' gose'e Jesúsen':

—Bi nezeto' non' gwsela' da' Juan.

<sup>8</sup> Nach Jesúsen' gože' legaue':

—Lecz ca' neda' bi yapa' le'e bi yela' gwnabian' chonlenda' da' ca'.

### *Jempl che mos mal ca'*

*(Mt. 21:33-44; Mr. 12:1-11)*

<sup>9</sup> Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gwyeye' zito' na' jasoe' šša.

<sup>10</sup> Cate' bžin ža yosyotobe' cosešen', nach gwsela' to xmose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'.

<sup>11</sup> Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'.

<sup>12</sup> Na' xan yežlion' gwsela'che' mos gwyone, na' lecze gosotlate'ne' gosone'ne' güe', na' besye-beje'ne' gan' že' yag uvas ca'.

13 'Na' xan yežlion' gwne': "¿Nacxe gona'?" Nach beyone' xbab gwne': "Sela' xi'ina' ben' chac-chgüeda', le šeca güesezi'e xtiža' le'."

14 Perw beņe' ca' nac lo na'gaque' yag uvasen' cate' besele'ede' xi'ine'na', gose' lježe': "Benga yega'anlene' yežlio nga cate' gat xe'. Le da gotchone' cont yega'anlenchon."

15 Nach besyebeje' le' gan' že' yag ca' na' gosote'ne'.

Nach Jesúsen' gwñabde' beņe' ca' zjanžaguen':

—¿Nacxe gon xan yežlion' len beņe' ca' bocua'anlene' yežlio chen'?

16 Šeje' šjetue' legaque' na' yodie' yežlion' lo na' beņe' yoble.

Na' beņe' ca' že'na' cate' gosende' diža' quinga dan' be' Jesúsen' gosene':

—¡Catec da' mal juisyw dan' goc!

17 Na' Jesúsen' gwñachgüe' legaque' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosaclašē' güen yo'o ca' yosočhine', len ba naquen yej squin.

18 Na' ca nac yejna', note'tez beņe' lažo' lo yeja' na' cue'žošje', na' note'tez beņe' chiže' yeja' cate' lažon' na' gwšošjen le'.

### *Ca nac dan' cheyala' gaxjw*

*(Mt. 21:45-46; 22:15-22; Mr. 12:12-17)*

19 Na' beņe' ca' chososed chosolo'e dan' bzoj da' Moisés na' bxož gwnabia' ca' la' besyeyiljwlašē'te nacle yesone' yesezene' Jesúsen', le gosacbe'ede' Jesúsen' be'e jemplna' neče dan' bi chesejnilaže'

le'. Perw bibi gosone', le besežebe' bi yeson bene' ca' že'na' bene' chesejle'e che Jesús'en'.

<sup>20</sup> Da'nan' gosesele' bene' yosogüia yesene'e Jesús'en' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'.

<sup>21</sup> Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to licha. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho.

<sup>22</sup> Na' da'nan' zedenabeto' le' ¿naquen binlo no chixjo da' cheyal'a' chixjwcho che ben' nac la'zelagüe bene' gwnabia' ben' chi' Roma, še bi?

<sup>23</sup> Na' gocbe'e Jesús'en' gague do lažen' chese'ene' ca', san chesaclačže' yesagüe' xya che xtižen'. Na' gože' legaque':

—¿Bixchen' chaclaže'le yoslažo'le neda' len xtižan'?

<sup>24</sup> Le gwlo'e neda' to mechw. ¿No lao dan' da' le'e mechw nga? na' ¿no la' dan' nyoj le'en ni?

Nach gose'ene':

—Che César ben' nac la'zelagüe bene' gwnabia' ben' chi' ciuda Roma.

<sup>25</sup> Nach gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

<sup>26</sup> Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

*Cate' yesyeban beṇe' guat ca'  
(Mt. 22:23-33; Mr. 12:18-27)*

27 Na' lecze besežin baḷ beṇe' saduceo gan' zoa Jesúsen'. Beṇe' ca' chesene' beṇe' guaten' bi yesyebane'. Nach gosenabde' le', gose'ene':

28 —Maestrw, da' Moisésen' bzoje' can' cheyaḷa' goncho, gwne' še to beṇe' byo gate' na' chzeb no'ol chen' perw na' nono bi güezeb chga'an, na' beṇe' biše' ben' ba gota' cheyaḷa' yošagna'lene' no'ol güezeba' cont yesenita' xi'in diaža che da' bišen'.

29 Na' gosenita' beṇe' gosac gaž biše'. Na' beṇe' nechua' bšagne'e, na' gote' nono xi'ine' gwnita'.

30 Na' beṇe' gwchopen' bošagna'lene' no'ol güezeba', na' lecze gote' nono xi'ine' gwnita'.

31 Na' beṇe' gwyona' lecze bošagna'lene' no'olen', na' lecz ca' goc len le'. Na' ca' goc gosedaš beṇe' gaža' bosošagna'lene' no'ola', na' ne toe' ca' gosezoa xi'ine' len le'.

32 Gwde gosat yogo'lol beṇe' ca', nach got len no'ola'.

33 Na' cate' yesyebane' ladjo beṇe' guat ca', ¿nox beṇe' ca' soalene' no'ola' ca' xo'ole'?, le yogo' beṇe' gaža' bosošagna'lene' le'.

34 Na' Jesúsen' boži'e xtiža'gaquen', gože' legaque':

—Beṇe' ca' nita' lo yežlio nga chosošagne'e na' lecze chosošague' na' no xi'ingaque'.

35 Perw na' beṇe' ca' chaque Diosen' zjazaque' cont yosbane' legaque' ladjo beṇe' guat ca' cont šjasyenite' len le' toḷi tocanē, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e.

36 Bich yesate', le yesaque' ca angl ben' že' yaba, na' yesaque' xi'in Dios lagüe dan' ba bosban Diosen' legaue' ladjo bene' guat ca'.

37 Na' lecze da' Moisésen' bzoje' che dan' chesye-ban bene' guat ca'. Bzoje' can' gož Diosen' le' caten' bol güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob.

38 Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

39 Na' bal bene' chososed chosolo'ede' ley dan' bzoj da' Moisés gose'e Jesús'en':

—Maestrw, binlo boži'o xtiža'gaquen'.

40 Na' bich besyeyaxjde' bi yesenabde' le'.

*Criston' naque' xi'in diaža che da' rey David  
(Mt. 22:41-46; Mr. 12:35-37)*

41 Jesús'en' gože' legaue':

—¿Nacxečen' chesena bene' Criston' ben' yedenabi'e naque' xi'in diaža che da' rey David?

42 Cuin Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

43 na' gona' cont yogo' no chesegue'e le' yosozexjw yichje' yosozengue' chio'.”

44 ¿Nacxe gac nacho Criston' naque' xi'in diaža che da' rey David? le' cuin Davin' gože' le': “Xana”.

*Xtol'a' bene' ca' chososed chosolo'e dan' bzoj da'  
Moisésen'*  
(Mt. 23:1-36; Mr. 12:38-40; Lc. 11:37-54)

45 Be<sub>ne</sub>' zan zjanžag chosozenague' cate' gože' be<sub>ne</sub>' ca' zjanaque' le' txen:

46 —Le gwsaca' cont bi gonle can' cheson be<sub>ne</sub>' ca' chososed chosolo'e ley dan' bzoj da' Moisés. Legaque' chesyebede' chesaše' zjanyaze' lache' ton. Na' chesyebede' chesonxen be<sub>ne</sub>' legaque' cate' chesyěžague' lagüe ya'a. Chesyebede' chesebi'e gan' chesebe' be<sub>ne</sub>' blao cate' chja'aque' yodao' na' cate' chac l<sub>ni</sub>.

47 Na' chesyequ'e yo'o che no'ole güezeb ca'. Na' cate' chosol güiže' Dios, sša cheso'e diža' cont yesaque be<sub>ne</sub>' leca chesonxene' Diosen'. Be<sub>ne</sub>' can' chesacche' castigw clal ca yezica'chle be<sub>ne</sub>' güen da' xinj.

## 21

*To no'ole güezebe bnežjue' Diosen' xmechue'na'*  
(Mr. 12:41-44)

1 Šlac zoa Jesúsen' chyo'o yodao', gw<sub>ne</sub>'e na' ble'ede' be<sub>ne</sub>' gw<sub>ni</sub>'a ca' gosego'o xmechwgaquen' lo' cajen' gan' chesegüe'e mechw che yodaon'.

2 Na' lecze ble'ede' to no'ol güezebe be<sub>ne</sub>' yaše' gwlo'e chop centav dao' che'na'.

3 Nach Jesúsen' gw<sub>ne</sub>':

—Da' li žia' le'e, no'ol güezebe yaše' nga ba gwlo'oche' mechw da' zaca'ch clal ca yogo' be<sub>ne</sub>' ca' yezica'chle.

4 Le yogo' legaque' chesegüe'e da' checho'onen lo yela' gw<sub>ni</sub>'a chegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chachbande'.

*Gwžin ža yosyočinje' yodao' blaona'*  
(Mt. 24:1-2; Mr. 13:1-2)

<sup>5</sup> Na' ba<sub>l</sub> be<sub>n</sub>e' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo be<sub>n</sub>e'. Nach Jesúsen' gwne':

<sup>6</sup> —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' čože' lježen. Yogon' yosyočinje'.

*Dan' gac cate' ba za' bagwze yeyož yežlion'*  
(Mt. 24:3-28; Mr. 13:3-23)

<sup>7</sup> Na' gosenabde' Jesúsen' gose'ene':

—Maestrw, ¿do bat gac dan' žo' nga? na' ¿nac gac nezeto' cate' ba zoa gac yogo' da' ca'?

<sup>8</sup> Na' gwne':

—Le gwsaca' cont nono siye' le'e. Le be<sub>n</sub>e' zan yesaš yežlio nga be<sub>n</sub>e' yesaclaže' yosolane' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'.

<sup>9</sup> Na' cate' yenele chac gwdile nile na'le o yenele chi' žaš contr be<sub>n</sub>e' ca' chesenabia', bi žeble, le zgua'tec da' quinga cheya<sub>l</sub>a' gac. Perw gague len<sub>n</sub>a' n<sub>a</sub>cho n<sub>a</sub>'tec n<sub>a</sub>'a yeyož yežlion'.

<sup>10</sup> Nach gože' legaque':

—Na' yesedile to yež len yeto yež yoble na' to nación len yeto nación yoble,

<sup>11</sup> na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e be<sub>n</sub>e' le'e yaban' da' zaca' yesyebande', na' yesežebchgua benachen' neche dan' chac.

12 'Perw za' gac yogo' da' quinga cate' yesezene' le'e na' yoso<sub>chi</sub> yososaque' le'e na' yesone' le'e lo na' be<sub>ne</sub>' gwnabia' che yodao' che<sub>len</sub>', na' yeseyixjue' le'e ližya. Na' yeseche'xo<sub>xje</sub>' le'e do lao rey na' do lao nochle be<sub>ne</sub>' gwnabia' dan' chejnilaže'le neda'.

13 Na' cate' gac da' quinga güe'le xtiža'na'.

14 Na' le gon xbab zoacza' chaclena' le'e, nach cate' gacle lo na' be<sub>ne</sub>' ca' bi cuec yichjle nacle yoži'ile xtiža'gaquen',

15 le neda' go<sub>na</sub>' le'e xbab len yela' sina' chian' cont yoži'ile xtiža'gaque' sin cbi bi gac yesene'.

16 Na' ba<sub>lle</sub> xa<sub>xna</sub>'le na' be<sub>ne</sub>' biše'le na' biše' lježle na' be<sub>ne</sub>' migw chele yesechje' yesone' le'e lo na' be<sub>ne</sub>' chesegue'e le'e. Na' yesote' ba<sub>lle</sub>.

17 Na' yogo'ze be<sub>ne</sub>' yesegue'ede' le'e dan' chejni-laže'le neda'.

18 Perw chape Diosen' le'e na' bitw güe'e latje cuiayi'le,

19 na' go<sub>ne</sub>' yela' mban chele to<sub>li</sub> toca<sub>ne</sub> še soale gwyo gwchejle yogo'lo<sub>l</sub> dan' yesonde' le'e.

20 Na' cate' le'ele ba besela'ac soldadw zan cue'ej cuit Jerusalén<sub>na</sub>' ben' yesedillen le'e, canan' nezele ba zoa cuiayi' ciudan'.

21 Cana' be<sub>ne</sub>' yesenita' Jerusalén cheya<sub>la</sub>' yosoxonje'. Na' be<sub>ne</sub>' že' yezica'chle yež ga mbane Judea cheya<sub>la</sub>' šja'aque' do ya'adao'. Na' be<sub>ne</sub>' yesenita' yix<sub>e</sub>', bi cheya<sub>la</sub>' yesone' xbab yesyeyo'e lo' ciuda.

22 Cana' gwnežjo Diosen' castigw che xto<sub>la</sub>' be<sub>ne</sub>' ca' že' Judean', cont gac can' nyojen le'e Xtiža' Diosen'.



23 ¡Nyaše' zjanac no'ol ca' zjanao' xi'in na' no'ol ca' ñe' chosoguaže' bidao' lo ža ca'! Leca yesesaca'zi' beñe' ca' že' doxen Judean', le Diosen' ža'achgüe' legaque'.

24 Soldadw ca' yesote' bale' lo gwdile na' yebale' yeseche'xoxje' nación ca' dan' zjachi' doxen yežlion'. Na' beñe' ca' bi zjanaque' beñe' Israel yosyočinje' yo'o ca' dan' že' Jerusalénna' na' yosolej yosošošjen'. Perw ba bžia' Diosen' bia' žin ža cate' beñe' ca' bi zjanaque' beñe' Israel bich yesenabi'e nación Israel.

*Yid Jesucriston' da' yoble*

(Mt. 24:29-35, 42-44; Mr. 13:24-37)

25 'Ca nac gwbiž, bio' na' beljw ca', gac da' yebanecho len legaquen. Na' beñe' že' yežlion' yesaque' tole na' yesacžejlaže' catec sšag gon nisdaon' chas chata' gaquen.

26 Na' beñe' že' yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'.

27 Na' cana'ch beñe' že' yežlion' yesele'ede' neda' naca' ben' gwsela' Dios golja beñach, za'a to lo' bejw len yela' guac xen na' yela' beñe' zaca' juisyw chia'.

28 Na' cate' solao gac da' quinga, le gonchach laže'le na' le yebe. Ba zoa žin ža yida' da' yoble yebeja' le'e lo da' malen'.

29 Na' Jesúsen' be'lene' legaque' to jempl, na' gože' legaque':

—Le ña'šc can' chon yag yixgüigw na' bite'teze yag yoble,

30 cate' chle'ele ba chebian laga' che'en dao' nach ñezele bačh zoa yela' tiemp ba.

<sup>31</sup> Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

<sup>32</sup> 'Da' li žia' le'e, biṇa' yenit diaža' che le'e nita'le na'a cate' yeyož gac yogo'lol da' ca'.

<sup>33</sup> Le'e yaba na' yežlion' yesede čhen, perw ca nac xtižan', gague da' te cbi gac can' žanna'.

<sup>34</sup> 'Na' le gon xbab cont bi gacle beṇe' lia na' beṇe' borrašw na' cont bi soale yela' yežejele. Beṇe' ca' yesac beṇe' lia na' borrašw na' beṇe' ca' yesyela' yesyežejde' bi yesebeze' batcan' gac yogo' da' quinga.

<sup>35</sup> Na' toz can' gac che beṇe' že' doxen yežlion', yesac yogo' da' quinga cate' nono chon xbab.

<sup>36</sup> Perw yogo' ža le soa le cuez batcan' gac da' quinga na' le yol güiž Diosen' cont bibi gac chele na' gac yedyesoale len neda' naca' ben' gwsela' Diosen' golja' beṇač.

<sup>37</sup> Yogo' ža gwzoa Jesús'en' bsed blo'ede' beṇe' yodao' blao, na' yogo' že' beyeje' lo ya'a da' nzi' Ya'a Olivos.

<sup>38</sup> Na' yogo' zil besežin beṇe' zan bosozenague' che' šlac bsed blo'ede' legaque' chyo'o yodao' blao.

## 22

*Bosoxi'e cont yesezene' Jesús'en'*

(Mt. 26:1-5, 14-16; Mr. 14:1-2, 10-11; Jn. 11:45-

53)

<sup>1</sup> Na' ba zoa gala' lni pascw caten' chesagüe' yetextil da' bibi levadura yo'on.

<sup>2</sup> Na' bꝛoz gwnabia' ca' na' beṇe' ca' chososed chosolo'e ley dan' bzoj da' Moisés'en' beseyiljue' nacle yesone' na' bi da' yosode'ede' cont yesezene'

Jesúsen' na' yesote'ne', le besežebe' še cate' bi yesone yezica'chle beṇe' legaque'.

<sup>3</sup> Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len beṇe' šižinw ca' zjanaque' Jesúsen' txen,

<sup>4</sup> na' gwyeye' jaṇe'e bḡoz gwnabia' ca' na' beṇe' gwnabia' che beṇe' ca' chesape' yodao'na' cont bosoxi'e nacle gone' gwdie' Jesúsen' lo' na'gaque'.

<sup>5</sup> Na' leca besyebede' na' gose'e le' yosonežjue'ne' mechw.

<sup>6</sup> Na' Judasen' gwxenlaže' len legaque', na' gwzolaḡüe' gwdiljwlaže' nacle gone' gwdie' Jesúsen' lo' na'gaquen' cate' bi že' beṇe' zan.

*Jesúsen' blo'ede' legaque' can' cheyaḡa' yesone' šjasyeza'laže' dan' gaten'*

*(Mt. 26:17-29; Mr. 14:12-25; Jn. 13:21-30; I Co. 11:23-26)*

<sup>7</sup> Na' bžin ža gaḡa' lṇi caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo' na' beṇe' Egipto ca'.

<sup>8</sup> Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasiṇi'a dan' gagwcho lo lṇin'.

<sup>9</sup> Na' gose'ene':

—¿Ga che'ndo' šjasiṇi'ato'?

<sup>10</sup> Nach gože' legaque':

—Le šja'ac na' cate' ba gwyo'ole ciudan' na' yežagle to beṇe' byo no'e to che'e nis. Na' šejlenṇe' na' gan' yežinen'

11 le ye' xan yo'on': "Maestron' že': Gonšco' to yo'o ga gagua' xše' že' lni nga len be<sub>ne</sub>' ca' zjanaque' neda' txen."

12 Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

13 Na' gosa'aque' na' yogo' can' gož Jesúsen' legaque' goc. Nach bososini'e xše' že' lnina'.

14 Na' cate' ba<sub>ch</sub> gwchi'e cho'a mesen' len postlw che' ca',

15 na' gože' legaque':

—Leca gwzelaža' gagua' yela' guagw che lni nga len le'e na'a za' saca'zi'a na' gata'.

16 Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

17 Na' gwxi'e vas gan' yože nis uvasen', na' beyož be'e yela' cho<sub>x</sub>clen che Dios, nach gwne':

—Le sin', na' le ye'ej yogo'le late' güeje dan' yože lo' vas nga.

18 Chnia' le'e na'a zelao che'eja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

19 Nach gwxi'e yetextilen' na' be'e yela' cho<sub>x</sub>clen che Diosen' na' bzo<sub>x</sub>jen' na' bnežjuen' legaque'. Na' gože' legaque':

—Da' nga cuerp chia' chzan<sub>la</sub>ža' neche le'e. Quinga gon<sub>le</sub> cont šjayze'ele bi zejen len le'e dan' yesote' neda'.

20 Na' lecze be<sub>x</sub>ue' vasen' cate' ba beyož gosagüe' xšen' na' gože' legaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwłalj xchenan' neche le'e.

21 'Na' da' li ben' gwđie' neda' lo na' beņe' ca' chesegue'e neda' nga chagwlene' neda' txen.

22 Na' gac chia' can' nžia bia' gac, neda' naca' bena' gwsela' Diosen' golja' beņach, perw nyaše'chguaze nac ben' gwđie' neda' lo na' beņe' ca'.

23 Nach gosezolagüe' gosenabe lježgaque' noen' gon da' malen' nac ca'.

### *Gosacyože' noe' nacch blao*

24 Na' lecze gosezolagüe' gosacyože' noe' nacch blao.

25 Na' Jesúsen' gože' legaque':

—Nita' beņe' gwnabia' che to to nación ca' na' chesone' byen chosozenag beņe' chegaque', na' beņe' gwnabia' ca' chesaclaže' yesoe' beņe' diža' chegaque' zjanaque' beņe' güenchgua.

26 Perw le'e gague can' cheyala' gonle. Še no le'e nacchle beņe' blao, cheyala' gwzexjwlaže'le len beņe' lježle na' gonle ca beņe' xcuide' ben' bibi na' neze. Na' še no le'e chnabia'le, cheyala' soale gaclen lježle.

27 Le gon xbab noe' nacch beņe' blao, še bena' chi' cho'a mesen' o še xmosen' ben' chon mandaw che'. Nacbja'cze ben' chi' cho'a mesen' nacze' beņe' blaoch. Perw neda', zoa' cont gaclena' le'e la'cze naca' Xanle.

28 'Le'e biņa' cuejyichjle neda' la'czla' beņe' zan ba chesegue'ede' neda'.

<sup>29</sup> Na' ca nac Xan' ba none' chia' cont nabi'a txen len le', lecze neda' ba nona' chele cont nabia'le txen len neda'.

<sup>30</sup> Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabia'le šižinw cuen bene' ca' zjanaque' xi'in diaža che da' Israel.

*Jesúsen' gwne' Pedroa' bi chebe' še nombi'e le'  
(Mt. 26:31-35; Mr. 14:27-31; Jn. 13:36-38)*

<sup>31</sup> Nach Jesúsen' gwne':

—Simón, ben xbab chio', Satanásen' dan' chn-  
abia' da' xigüe' ca' ba gwñaben gaco' lo ne'en cont  
gonen cuejyichjo' bich šejnilažo' neda'. Na' dan'  
gonen len le' naquen ca dan' chon bene' caten'  
chdie' trigon' lo' rner.

<sup>32</sup> Perw na' neda' ba gwñaba' gaclen Diosen' le'  
cont bi cuejyichjo' dan' chejnilažo' neda'. Na' cate'  
ba betinjdo' xtoło'na', gono' chačh laže' bene' lježo'  
quina.

<sup>33</sup> Nach Pedroa' gože'ne':

—Ba bečhoglaža' sa'alena' le', gague ližya na'ze,  
san gatlencza' le'.

<sup>34</sup> Na' Jesúsen' gože'ne':

—Pedro, žia' le', biña' cuež jean' na'aže' cate' gac  
šon ni'a bi chčebo' še nombi'o neda'.

*Gwne' ba zoa yosoči yososaca' bene' legaque'*

<sup>35</sup> Na' gože' bene' ca' zjanaque' le' txen:

—¿Byažjele bi da' byažjele cate' gwseła' le'e  
jatixjue'ele xtiža'na'? Gwseła' le'e sin cbi bia'le  
mechw, ne bzod, na' neca bia'le xelle.

Na' gose'ene':

—Bitw bi byažjeto'.

<sup>36</sup> Na' gože' legaque':

—Perw na'a še napple mechw, cheyala' gua'len, na' lecze ca' gua'le bzod. Na' še bitw bi spada chele de, le gote' xadon chelen' cont si'le to spada.

<sup>37</sup> Chnia' le'e gonle ca', le gac chia' can' nyojzen le'e Xtiža' Diosen' žan: “Gosone'ne' ca bene' güen da' xinj.” Na' cheyala' gac yogo'lol dan' nyojen.

<sup>38</sup> Nach gose'ene':

—Xanto', gwna'šc nga noa'to' chope spada.

Na' gože' legaque':

—Güesaquezen.

*Jesúsen' chol güiže' Diosen' latje gan' nzi' Getsemani*

*(Mt. 26:36-46; Mr. 14:32-42)*

<sup>39</sup> Nach gwze'e gwyeje' Ya'a Olivos can' ba yolagüe' chone', na' bene' ca' zjanaque' le' txen zjana'ogüe' le'.

<sup>40</sup> Nach cate' besyežine' latjen' na' gože' legaque':

—Le yol güiž Dios cont bi gon gwxiyen' le'e gan.

<sup>41</sup> Na' gwle'e len legaque' zito' ca gan' zelao žin to yej da' gwzala'cho, na' bzoa xibe' na' bol güiže' Dios,

<sup>42</sup> gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

<sup>43</sup> Na' to angl bene' za' yaba blo'elagüe' le' na' be'e le' fuerz valor.

<sup>44</sup> Na' šlac chžaglaochgüe' len yichjlažda'ogüe'na' gwzolao chžaglaoche' chol güiže' Diosen' beyaclolite' yes. Na' nis yes che'na' beyaquen ca tlaba' güeje chen dan' zjanaquen chelson, besyeyinjten lo yo.

45 Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše' chgüede'.

46 Na' gože' legaque':

—¿Bixchen' chtasle? Le chas, le yol güiž Dios cont bi gon gwxiyen' le'e gan.

*Gosezene' Jesúsen'*

*(Mt. 26:47-56; Mr. 14:43-50; Jn. 18:2-11)*

47 Ne' choe'te Jesúsen' diža' cate' besežin bene' zan gala'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnope' xague', perw gague do lažen' bene' ca'.

48 Na' Jesúsen' gože' le':

—Judas, ¿chnopo' neda' cont gw dio'nda' lo na' bene' quinga? neda' naca' bena' gwseła' Diosen' golja' beňach.

49 Na' cate' bene' ca' zjanaque' Jesúsen' txen be-sele'ede' can' gac che'na' nach gose'ene':

—Xanto', ¿gwyinto' bene' quinga spada cheton'?

50 Na' toe' gw dinen' mos che bxož blaon', gwchogtechgüe' nague' licha.

51 Perw Jesúsen' gože'ne':

—Bich gonle ca'.

Nach gw dane' nag mosen' na' beyone' le'.

52 Jesúsen' gože' bxož gwnabia' ca' na' bene' ca' chesenabi'e bene' ca' chesape' yodao', na' bene' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to bene' gwban za'acle zedexi'le neda' len spada na' len yag?



<sup>53</sup> Yogo' žaze gwzoa' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' beņe' ca' chesaš lo cholēn'.

*Pedroa' bi gwchebe' še nombi'e Jesúsen'*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Nach gosoxe' Jesúsen' na' goseche'ene' liž ben' naque' bχoz blao che nación Israelen'. Nach Pedroa' na'ogüe' Jesúsen' zito' zito'le.

<sup>55</sup> Na' bosoxene' yi' chyo'o che bχoz blaona' na' gosebi'e cho'a yi'na'. Na' gwche' Pedroa' len legaque'.

<sup>56</sup> Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len benga naque' txen len Jesúsen'.

<sup>57</sup> Perw Pedroa' bitw gwchebe' še nombi'e Jesúsen'. Gože'ne':

—No'ole, bitw nombi'ane'.

<sup>58</sup> Na' gocze šlož, yeto beņe' ble'ede' Pedroa' gože'ne':

—Lenczo' naco' txen len beņe' ca'.

Na' Pedroa' gože'ne':

—Bitw lena' len legaque'.

<sup>59</sup> Gwde to hor yetoe' gwne':

—Da' licze nac benga txen len Jesúsen', le naque' beņe' Galilea.

<sup>60</sup> Na' Pedroa' gože'ne':

—Beņe', bi nežda' bi dižan' cho'o.

Na' ne' choe'te Pedroa' dižan' ca', gwchež to jea.

<sup>61</sup> Na' Xancho Jesúsen' gwychje' gwne'e Pedroa' na' jayze'e Pedroa' diža' dan' gož Xancon' le'

caten' gwne': "Bi<sub>na</sub>' cuež jean' na'aže' cate' gac šone  
ni'a bi chebo' še nombi'o neda'."

<sup>62</sup> Na' Pedroa' beze'e leca gwchežyaše'.

*Gosezi'diže' Jesúsen'*

*(Mt. 26:67-68; Mr. 14:65)*

<sup>63</sup> Na' bene' ca' goseche'e Jesúsen' gosezi'diže' le',  
na' gosot goseyine' le'.

<sup>64</sup> Na' bosocheje' to lache' lao Jesúsen' na'  
goseyine' le' na' gose'ene':

—Gwneya'ašč non' chyin le'.

<sup>65</sup> Na' zanch diža' da' gosene' gosezi'diže'  
Jesúsen'.

*Goseche'e Jesúsen' lao bene' ca' chesenabia'  
nación Israelen'*

*(Mt. 26:59-66; Mr. 14:55-64; Jn. 18:19-24)*

<sup>66</sup> Na' cate' gwyeni', bene' gole blao ca'  
chesenabia' nación Israelen' na' b<sub>x</sub>oz gwnabia'  
ca' na' bene' ca' chososed chosolo'e ley dan'  
bzoj da' Moisés besežague' na' gosone' mandadw  
gwyej Jesúsen' laogaque' gan' chesenabi'ena', nach  
gose'ene':

<sup>67</sup> —Gwnašč neto' še le' naco' ben' gwlej Diosen'  
cont nabi'o nación chechon'.

Nach gože' legaque':

—Šaca' n<sub>ia</sub>' le'e neda' naca' Criston' ben' gwlej  
Diosen' cont nabia' nación chechon', bitw šejle'le  
čhia'.

<sup>68</sup> Na' šaca' bi nabda' le'e, n<sub>eca</sub> yoži'ile xtižan', n<sub>eca</sub>  
gwsanlenda.

<sup>69</sup> Neda' naca' ben' gwsela' Diosen' golja' ben<sub>a</sub>ch.  
Na' na'a cui'a cuit Diosen' nabi'a txen len le', Dios  
ben' chnabia' doxen.

<sup>70</sup> Nach yogüe' yose'ene':

—¿Len' naco' dogualje Xi'in Diosen'?

Na' gože' legaue':

—Le can' žale nan' naca'.

<sup>71</sup> Na' gosene':

—iNoch no chyažje no gagw xya che'! Chio' ba benecho na'a chne' che Diosen' dan' že' ca'.

## 23

### *Bosocuiše' Jesúsen' lao Pilaton'*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Na' yogo'lol beņe' ca' gosezože'e na' goseche'ene' lao Pilaton' ben' nac gobernador.

<sup>2</sup> Na' gwzolao bosocuiše' Jesúsen' gosene':

—Ba gwchoglaoto' che benga cheyała' gate' dan' chde' chgo'oyele' nación Israelen' cont yesejle'e che' na' lecze chžone' chixjwto' da' cheyała' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.

<sup>3</sup> Nach Pilaton' gwnabde'ne' gože'ne':

—¿Len' naco' rey che beņe' Israel?

Nach Jesúsen' boži'e xtižen', gwne':

—Can' gwnao'na', can' naquen.

<sup>4</sup> Nach Pilaton' gože' bχoz ca' len yogo'lol beņe' ca' zjanžag lagüe'na':

—Bibi nla'lagüe' še bi dola' nap benga.

<sup>5</sup> Perw na' goseneche', gosene':

—Chde' chgo'oyele' yogo' beņe' že' distritw Judea nga yesejle'e dan' chsed chlo'ede'. Gwzolaogüe' bsd blo'ede' distritw Galilean' perw lencze nga bač chsed chlo'ede' na'a.

*Pilaton' gwsele' Jesúsen' lao Herodes*

<sup>6</sup> Cate' bene Pilaton' can gosene', nach gwñabe' še Jesúsen' naque' beñe' Galilea.

<sup>7</sup> Na' cate' gocbe'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalénna'.

<sup>8</sup> Cate' Herodes ble'ede' le' bebede', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'.

<sup>9</sup> Nach da' zan da' gwñabde' Jesúsen', perw ñe to xtižen' ca boži'i Jesúsen'.

<sup>10</sup> Bxoz gwnabia' ca' na' beñe' ca' chososed chosolo'e ley dan' bzoj da' Moisés gosezeche' gala'ze na' bosocuiše'ne' len zan diža'.

<sup>11</sup> Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyož bosoguacue'ne' to lache' xdan juisyw, gosesele'ne' da' yoble lao Pilaton'.

<sup>12</sup> Na' žana' Pilaton' len Herodes gwzolao gosaque' migw, la'czla' cate' za' gac ca' besegue'e lježe'.

*Gosechoglagüen' gat Jesúsen'*

*(Mt. 27:15-26; Mr. 15:6-15; Jn. 18:39-19:16)*

<sup>13</sup> Nach Pilaton' botobe' bxoz gwnabia' ca' na' beñe' ca' chesenabia' nación Israelen' len yezan beñe' yež, gan' chesone' yela' justisen'.

<sup>14</sup> Nach gože' legaque':

—Le'e bedesanle benga lagua' nga, na' gwnale chde' chgo'oyele' beñe' Israelen' yesone' contr go-biernna'. Neda' bač gwñabyožda'ne' lao le'e ca xyan' dan' chagwle che', ñe to da' xinj ca chželda' še bi dan' none'.

15 Na' lecz ca' Herodes bitw bi xtole' bželde', na' besele' le' laoto' nga. Na' nacia' bibi ben benga da' cheyala' gate'.

16 Na' na'a con gona' mandadw yeseyine' le' na' gwsana'ne'.

17 Gwne' ca', le yogüiz chsane' to bene' pres lo lni pascw čhegaque'.

18 Na' yogo' bene' ca' že' bososye'e toz ca gosene':  
—Chojtega benga gate' na' gwsano' Barrabásen'.

19 Na' Barrabásen' goseyixjue'ne' ližya da' bxie' gwdile lo' ciudan' na' goque' to bene' güet bene'.

20 Na' da' yoble Pilaton' gwñabde' legaque' še gwsane' Jesúsen',

21 perw bososye'e zižjech gosene':

—¡Bde'e le'e yag cruz! ¡Bde'e le'e yag cruz!

22 Da' gwyon ni'a gož Pilaton' legaque':

—¿Bixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

23 Perw gosone' byen bososye'e yelate' zižjech gosenabe' gwde'ene' le'e yag cruz. Nach Pilaton' bzenague' čhegaquen'

24 na' gwčhoglagüe' che' gac can' gosenabde' le'.

25 Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdile na' bene' güet bene'. Na' Pilaton' bodie' Jesúsen' lo' na'gaque' cont yesone' len le' ca chesaclaže'.

*Bosode' Jesúsen' le'e yag cruz*

*(Mt. 27:32-44; Mr. 15:21-32; Jn. 19:17-27)*

26 Na' šlac zjanche'ene' gan' yesote'ne' besyežague' to bene' yež Cirene le' Simón, za'

zeze'e yixe'. Na' bosogüe'ene' yag cruz che Jesúsén' na' gweje' gwda'ogüe' Jesúsén'.

27 Na' bene' zan zjana'ogüe' le' na' zjalén zan no'ole. Na' no'ol ca' gwzolao bososye'e gosebeže' che'.

28 Na' Jesúsén' gweche' na' gože' legaque':

—No'ole Jerusalén, bitw cuežle chia'. Yejni'a le cuež chele na' che xi'inle.

29 Da' li gwžin ža cate' yesene': “Mbalaz nita' no'ole güiž no'ole cono gwxa na' nono bguaže'.”

30 Cana' yesenablaže' yesebiže ya'a ca' cont chenen legaque'. Yesenablaže' che' bdiņ goten legaque'.

31 Še yesot bene' neda' len bibi xtoła' de, įnacchxe yesonde' le'e nacle bene' güen da' xiņj!

32 Na' lecze goseche'e chop bene' güen da' xiņj cont bosode'e legaque' le'e yag cruz can' gosone' len Jesúsén'.

33 Na' cate' besežine' latje gan' nzi' Latje che Žit Yichj Bene' Guat, bosode'e Jesúsén' le'e yag cruzén'. Na' lecze bosode'e bene' mal ca' chop le'e yag cruzén' len le', toe' gwda' cuit Jesúsén' licha, na' yetoe' gwda' cuiten' robes.

34 Na' Jesúsén' gwne':

—Xa', bezi'xen che bene' quinga chesegue'ede' neda'. Gague zjaņezde' bin' chesone'.

Na' gosone' rifa cate' besyele'e xalane' cont gota'bia' noe' yechelen.

35 Na' bene' zan besyežejde' le'. Na' bene' gwn- abia' chegaque' ca' gosonle' che', gosene':

—Yezica'chle be<sub>ne</sub>' bosle'. Še da' li naque' Criston' ben' gwlej Diosen' yedenabi'e, ¿bix<sub>chen</sub>' bi chosla cuine'?

<sup>36</sup> Nach soldadw ca' lecz ca' gosonle' che'. Gosebigue' ga<sub>la</sub>'ze gan' zoa yag cruzen' na' bosonežjue'ne' vino zichj.

<sup>37</sup> Nach gosene':

—Še len' naco' rey che be<sub>ne</sub>' Israel, bosla cuino'.

<sup>38</sup> Na' yichj yag cruz che'na' gwzoa to dan' nyojen, žan: “Bengan' rey che be<sub>ne</sub>' Israel.” Na' byojen diža' griego, diža' latín na' diža' hebreo.

<sup>39</sup> Na' to be<sub>ne</sub>' mal ben' da' le'e yag cruz cuit Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación chechon', bosla cuino' na' lecze bosla neto'.

<sup>40</sup> Na' ben' yeto gwdile' be<sub>ne</sub>' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le',

<sup>41</sup> na' dan' gat chio' naquen licha cont si'cho castigw che xto<sub>la</sub>'chon'. Perw benga, bitw bi do<sub>la</sub>' nape'.

<sup>42</sup> Nach gože' Jesúsen':

—Jesús, šjayza'laže'go' neda' cate' žin ža nabi'o.

<sup>43</sup> Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

*Can' goc caten' got Jesúsen'*

*(Mt. 27:45-56; Mr. 15:33-41; Jn. 19:28-30)*

<sup>44</sup> Na' cate' bžin guagwbiž goc cho<sub>l</sub> doxen lo yežlion' bžinte do cheda šone.

<sup>45</sup> Bitw bse<sub>ni</sub>' gwbižen'. Na' ca nac lache' dan' ze lo' yodao' blaona', bcheza' gacholen.

46 Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

47 Na' cate' ble'e xan soldadon' can' goquen',  
benxene' Diosen' na' gwne':

—Da' licze benga goque' bene' gwyej to licha.

48 Na' bene' zan bene' besežag besele'ede' can'  
goc na' yogo'lole' besyeya'aque' chesebaže' lcho'e  
gosacde' da' juisyw ba goc.

49 Na' yogo' bene' ca' zjanombia' Jesúsen', na'  
len no'ol ca' zjanao' le' caten' beze'e Galilean',  
gosezeche' zito'le besele'ede' da' ca' goquen'.

*Bosocuaše' Jesúsen'*

*(Mt. 27:57-61; Mr. 15:42-47; Jn. 19:38-42)*

50 Na' zoa to bene' ciuda Arimatea gan' mbane  
Judean' na' le' José. Naque' txen len bene' ca'  
chesenabia' nación Israel, na' naque' to bene' güen  
bene' zej to licha.

51 Ba zoe' chbeze' batcan' solao nabia' ben'  
sela' Diosen'. Bitw bene' txen len bene' ca'  
gosechoglagüen' yesote' Jesúsen'.

52 Bena' gwyeje' lao Pilaton' jaynabe' cuerp che  
Jesúsen'.

53 Na' beletje'ne' le'e yag cruzen' na' btobe' le'  
to lache' xen na' la' bcuaše'te' le' to lo' bloj da'  
nche'ene' le'e yej. Na' naquen to ba cobe ga nono  
na' yosocuaše'.

54 Na' yogo' da' ca' goc ža cate' chososiñi'e che ža  
che Dios. Na' ba bžin hor cate' cheyała' yosocueze'  
bite'teze žin o mandadw da' chesone'.

55 Na' no'ol ca' za'aclene' Jesúsen' cate' gwze'e  
distritw Galilean' ja'aclene' Josén' cont besele'ede'  
ba che Jesúsen' gan' gwxoax cuerp che'na'.



<sup>56</sup> Nach gosa'aque' na' gosone' to da' chla' zix da' yeseyebe' cuerp che Jesús'en'. Na' ža che Diosen' gosenita'cze can' ža ley čegaquen', bibi žin gosone'.

## 24

*Jesúsen' bebane' ladjo bene' guat*

*(Mt. 28:1-10; Mr. 16:1-8; Jn. 20:1-10)*

<sup>1</sup> Bał dmigw ja'ac no'ol ca' da' yoble cho'a bloj gan' bosocuaše' Jesús'en' na' gosoxe' da' ca' ba gosone' da' chla' zix, na' yebał no'ole ja'aclene' legaque'.

<sup>2</sup> Na' cate' besežine' na' besele'ede' ba bga'a yejen' dan' bosode'e cho'a blojen'.

<sup>3</sup> Na' goso'e, na' bitw besyeželde' cuerp che Xancho Jesús'en'.

<sup>4</sup> Šlac zjanite' chesyebande' che da' quinga, besele'ede' čhope bene' zjazecha cuitgaquen' zjanyaze' lache' da' chactitchgua.

<sup>5</sup> Na' no'ol ca' besežebe' na' bosoccheque' yichjgaquen' gosene'e lo yole. Nach bene' ca' gose'e no'ol ca':

—¿Bixčen' cheyiljwle to bene' mban nga ladjo bene' guat?

<sup>6</sup> Notoch no nla' nga. Ba bebane' ladjo bene' guat na' mbancze'. Le šjayza'laže' can' gwne' cate' ne' zoale Galilean'.

<sup>7</sup> Gwne' le' naque' ben' gwsela' Diosen' golje' benač. Na' gwne' cheyala' gaque' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

<sup>8</sup> Na' no'ol ca' jasyeze'ede' xtiže'na'.

9 Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle beṇe' ca' nita' txen len legaue'.

10 Na' no'ol ca' jasedixjue'ede' postlw ca' zjanaque' beṇe' quinga: María beṇe' Magdala, na' Juana, na' María xṇa' Jacobo, na' len yebale no'ole.

11 Na' postlw ca' bitw gosejle'e che no'ol ca', gosacde' chesenazen'.

12 Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

*Blo'elao Jesús'en' chop beṇe' ca' šlac zja'aque' Emaús*

*(Mr. 16:12-13)*

13 Na' lecze ža dmigwna' chop beṇe' ca' gosaque' Jesús'en' txen ja'aque' yež dan' nzi' Emaús, do šnej mil metr zito' par Jerusalénṇa'.

14 Na' legacze' bosošalje' che yogo' da' ca' ba goquen'.

15 Ne' chesone' xbab na' ne' chesoe'te' diža' chen cate' Jesús'en' gwbigue' len legaue' na' gwza'lene' legaue' txen,

16 perw bitw gosacbe'ede' noxen' zejlen legaue'.

17 Nach gože' legaue':

—¿Bi dižan' choe'le šlac ngo'ole nezen'? ¿Bixchen' chacyaše'le?

18 Na' toe' le' Cleofas boži'e xtižen' gože'ne':

—¿Nacxe chaquen' gwza'o Jerusalén na' biṇa' gacbe'edo' da' ca' ba goc lo' ciudan'? ¡Tozo' le' zo' Jerusalén na' biṇa' gacbe'edo'!

19 Na' Jesús'en' gože' legaue':

—¿Bi goquen' žale ca'?

Nach gose'ene':

—Dan' goc che Jesús bene' Nazaret. Goque' to bene' gwsela' Dios cont be'e xtižen', na' Diosen' len benachen' besyebede' yela' guac chen' dan' blo'e na' diža' dan' be'e.

<sup>20</sup> Perw na' b̄xoz gwnabia' checho ca' len bene' ca' chesenabia' nación chechon' gosone' le' lo na' bene' ca' gosechoglagüe' che' cheyala' gate', na' bosode'e le' le'e yag cruz.

<sup>21</sup> Ba goc šone ža na'a goc da' quinga. Na' neto' gwzoato' lez Diosen' gwsele' le' cont yebeje' nación checho lo da' malen'.

<sup>22</sup> Na' no'ol ca' zjanac txen len neto', bale' goso'e diža' da' chebaneto', ja'aque' cho'a ban' be'e

<sup>23</sup> na' bitw besyeželde' cuerp che'na'. Cate' besyela'aque' gosene' besele'eda'ogüede' angl bene' gose'e legaque' ba bebane' ladjo bene' guat ca'.

<sup>24</sup> Na' lecze to chop bene' byo bene' ca' zjanaque' txen len neto' ja'aque' cho'a ban' na' besele'ede' cayanen' gosena no'ol ca' naquen, perw bi besele'ede' Jesús'en'.

<sup>25</sup> Na' gož Jesús'en' legaque':

—Nyaše'chguaze le'e bi chejni'ile na' bi chejle'le yogo' dan' bosozoj bene' ca' gwsela' Diosen' goso'e xtižen' cani'.

<sup>26</sup> ¿Chaquele bi cheyala' gac dan' ba goca'? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

<sup>27</sup> Na' be'e diža' len legaque' bsed blo'ede' legaque' yogo' dan' nyoj che'na' le'e Xtiža' Diosen', gwzo-

laoteque' len dan' bzoj da' Moisés na' len dan' bosozoj yezica'chle beṇe' gwsela' Diosen' goso'e xtižen' cani'.

<sup>28</sup> Na' besežine' gala'ze yežen' gan' zja'aquen', na' Jesúsen' bene' ca chon beṇe' šejch yelate' zito'ch.

<sup>29</sup> Perw beṇe' ca' gosone' byen yega'aṇe' len legaque', gose'ene':

—Yega'aṅczo' len neto', le ba chaḷ na' ba nac bagwže' par šejo'.

Na' gwyo'e cont yega'aṇlene' legaque'.

<sup>30</sup> Na' šlac zjachi'e cho'a mesen' txen, Jesúsen' gwxi'e yetextilen' na' be'e yela' choxcḷen che Diosen' na' bzojxen' bnežjuen' legaque'.

<sup>31</sup> Cana'ch gosacbe'ede' le'na'. Na' šlac ne' nite' ca' con beṇite'.

<sup>32</sup> Nach gose' lježgaque':

—Leca bebe lažda'ochon' cate' be'lene' chio' diža' chanez na' bsd blo'ede' chio' can' nyojen che' le'e Xtiža' Diosen'.

<sup>33</sup> Na' la' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len beṇe' ca' yezica'chle.

<sup>34</sup> Na' beṇe' šnej ca' gose'e beṇe' ca' za' besyežin:

—Da' licze ba beban Xanchoṇ'. Ba blo'elagüe' Simónna'.

<sup>35</sup> Nach beṇe' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzojxe' yetextilen' cont yesagüen'.

*Jesúsen' blo'elagüe' beṇe' ca' zjanaque' le' txen  
(Mt. 28:16-20; Mr. 16:14-18; Jn. 20:19-23)*

<sup>36</sup> Ne' chesoe'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

<sup>37</sup> Perw leca besežebe' na' besyebande', gosacde' še chesele'ede' bxin che da' bene' guata'.

<sup>38</sup> Nach Jesúsen' gože' legaque':

—¿Bičen' chacle tole? na' ¿bičen' chonle xbab ca' lo' yichjlažda'olen'?

<sup>39</sup> Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' bene' guat, bi nac žit bela' chia' ca dan' chle'ele nga.

<sup>40</sup> Beyož gwne' ca', blo'ede' legaque' ni'a ne'e ca'.

<sup>41</sup> Na' legaque' bina' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

<sup>42</sup> Nach bosonežjue'ne' late' yid bel gagüe' na' late' chixe beser da' yože šina'ba'.

<sup>43</sup> Gwxi'en na' gwdagüen' laogaquen'.

<sup>44</sup> Nach gože' legaque':

—Ba gwnia' le'e cate' ne' zoalena' le'e cheyala' gac yogo'lol da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj bene' ca' goso'e xtiža' Diosen' cani', na' lecz ca' da' nyoj le'e Salmos ca'.

<sup>45</sup> Nach ben Jesúsen' cont gosejni'ide' da' ca' zjanyoj che' le'e Xtiža' Diosen'.

<sup>46</sup> Na' gože' legaque':

—Benen byen goc da' quinga cont goc can' ny-  
ojen žan neda' gata' na' yebana' ladjo bene' guat  
yeyon ža, neda' naca' Cristo ben' gwlej Diosen'  
yedenabia'.

47 Na' le'e cheya<sub>la</sub>' güe'le xtiža'na' len bene' že' yogo' nación. Solaotecle güe'len Jerusalén. Güe'le xtižan' nale cheya<sub>la</sub>' yesyete<sub>nje</sub> be<sub>n</sub>a<sub>ch</sub>en' xto<sub>la</sub>'gaquen' cont Diosen' yezi'xene' chegaque'.

48 Le'e cheya<sub>la</sub>' güe'le diža' che da' quinga ba ble'ele dan' ba goc chia'.

49 Na' le<sub>ce</sub>ze se<sub>la</sub>' Spiritw che Xa' Diosen' yedesoan len le'e can' gwnen'. Na' le yega'an lo ciuda nga na'a cuezle go<sub>n</sub> Xa' Diosen' le'e ye<sub>la</sub>' guac da' za' yaba.

### *Beyep Jesúsena' yaba*

*(Mr. 16:19-20)*

50 Na' Jesúsena' gwche'e lega<sub>que</sub>' ja'aque' gan' chi' yež dan' nzi' Betania na' gw<sub>lis</sub> ne'e gw<sub>n</sub>abde' Diosen' gone' cont nite' mbalaz.

51 Na' ca beyoža' beyepe' yaban'.

52 Na' bene' ca' gosa<sub>que</sub>' le' txen besyega'ane' yešlož dao' gosonxene' Jesúsena' nach jaya'aque' Jerusalénna', chesyebchgüede'.

53 Na' gwnita'teze' lo' yodao' blaona' chesonxene' Diosen'. Da' na'ze chzoja' na'a.

**Diža' güen che ancho Jesucristo  
New Testament in Zapotec, Zoogocho  
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Zoogocho

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
de7d40fb-3909-53d8-8bea-744cf1ce0e41